



**SADHU  
SUNDAR SINGH**

---

*By*

**MRS. ARTHUR PARKER**





## UIATSOANI.

Sadhu Sundar Singhni gimin segipa ki'tap, Achik Kristona Book Club Seriesni gnigipa ki'tap on'ga. Iako Mrs. Anthu Parkerni segiminoniko pe'skaaha. Ian Sadhuni janggi tangianini gimin matchote segimin ki'tap on'ga. indiba Sadhuni gisik aro kamni gimin kan'dike segimin ki'tapsan on'ga. Iako poraigipa sakanti Sundar Singhni an'tangko kakketo Kristona on'kanganiko uigija poraina man'jawachim.

Adita manderang ia ki'tapko chu'sokatna gita namen dakchakbeaha. Christian Literature Society iako chapa ka'atna gita on'aha. Mr. Wilson K. Marak, a'bachenge pe'skaaniko dakaha aro uko matchote type dokaha. Mr. Jibonsing Areng, chapa ka'na tarianio namen dakchakbeaha. Tura Book Roomo kamka'igiparang chapa ka'atna gita bon kame type dokaha. Ia pilak dakchakgiparangkong chinga mitelbeaa.

Iako poraianichi bang'a manderangko Kristoona salbana aro bang'ani janggirangko Kristona on'kange janggi tangatna dakchakani ong'gen ine chinga ka'donga.

June 1967,

James M. Wood.  
MEGHALAYA.

# CONTENTS

OIDHAI NO.	PAGE NO.
Oidhai I	1—11
Oidhai II	12—29
Oidhai III	30—40
Oidhai IV	41—55
Oidhai V	56—58
Oidhai VI	59—64
Oidhai VII	65—69
Oidhai VIII	70—77
Oidhai IX	78—85
Oidhai X	86—113

## ODHAI—I

### SUNDAR SINGH

#### Sadhu aro Sainasi

Indiani manderang toromko kakket ong'e manianirangko namen gamchatnika, aro toromo name janggi tanggiparangko mandera-bea. Chasongoni chasongona Indiani manderang dakgrike ame sason ka'giparangko dal'nikana bate a'gilsaknirangko wate toromi ong'gipa manderangko dal'nikbata. Toromigipa manderangni gisepo kamalrang toromni gimin skigiparang aro bilko man'giparang ong'a ine an'ching pilakan uia. Lekka pora aro skia man'ani kamalrangni bilko komiatahaoba Indiani nokdangrangko kamalrang sason ka'engpiti. Indiba kamalrangna agre manderangoniba toromi ong'giparang donga. Uamang'oni mangsongbatgiparanga Sadhu aro sainasirang ong'a. An'chingoni bang-batan Sadnu aro Sainasi apsan ong'a ine chanchia. Indiba Sadhu aro Sainasini dingtangani donga, maina Sadhuara chonengaoni siaona kingking an'tangko toromo janggi tangna an'tangko on'kanggipa mande, aro Sainasiara uni janggi tangani je somoioniba an'tangko toromna on'kanggipa mande ong'a.

Mitam Indiani manderang uamang'ni janggi tangani bon'kamachibarao jensalo uamang nok jam aro jik dedrangko wate janggi tangna man'gnok ine chanchia unon uamang ong'a. Uni gimin Sainasirangde a'gilsakni bewal gita mandeni pilak dakna nanggnirangko dakmangimin mande-rangsa ong'a. Indiba Sadhude chonengaonin a'gilsaknirangko wate janggi tangna an'tangko on'kanggipa mande

ong'a. Ua jik kimja aro a'gilsakni bewalrangko dakpaani ong'jaha. Namako dakna Sadhuna bang'a cholrang donga indiba una dakmajoanirangba bang'a. Je Sadhu dakmajoaniko ame Sadhuna krakra chu'soke janggi tangna man'a uko Indiani dal'batgipa manderangba mandera'genchim.

Sadhu aro Sainasirang rimitgipa aro ro'gipa cholako ganronga. Ian uamangna kragipa ganani ong'a ine Indiani manderang chanchia aro uko gane uamang jechiba jakgitele re'na man'a. Uamang nok jam gri aro tangka sona gri manderangni ka'sae on'aosa janggi tangaia.

Chengoni Indiani manderang indakgipa janggi tangniko dal'nika aro uamang a'gilsaknirangko wate duk aro saknarangko chake an'tangtangni skaniko chu'sokata. An'ching mitam Sadhurangni gojalni palango tue, jak songdokame aro wal'sareo wingwange an'tangtangko duk ong'atengarangko Indiani bang'a songjinmarango nikna man'a. Indake dakanichi uamang gisikni tom'tomaniko man'na joton karongna.

Indiani manderangni toromko olakiani bewalrangko nike uamang Isolko am'chongmotgiparang ong'a ine gipin a'songoni Indiaona re'bagipa manderangba uina man'a. Uamang'ni indake gisikni tom'tomaniko am'engako nike Kristianrang uamang'na uko man'ani cholko mesokgija dongna man'ja.

India ding'gipa a'song ong'ani gimin bangbango dongna nangoba ba'rarangko bang'e nanggija altuae janggi tangna man'a. Aro bang'bata Indiani manderang ramram cha'ringanirango janggi tangna namnikengpiti. Uni gimin gisikni tom'tomaniko am'anio uamang'ni ramram janggi tangani baksa neng'nikanirang aro dukrangko gatdapna nangoba uarangko chakchikna amaia. Chong'motgipa Sadhude cha'na ringna aro dongchakna man'gipa biapni gimin chanchigija

jechiba re'angaia. Uade gankapa cholamangmangko ganari nok gri jam gri biapsaoni biapsaona re'roroe janggi tanga.

Dr. Farquhar Hindu Toromni gimin segipa ki'tapo (Crown of Hinduism) indine agana :

"A'gilsak dongenga dipet manderang Indiani Sainasirangni gimin aiao inmane aganangkugen. A'gilsakni man'gnirangni gimin chanchironggija uamang'ni ma'manti dukrangko chakchikna amani bil, chanchirakgipa Indiani manderangko pilak chasongrangona gisik' nangatbeani ong'chongmotgen. Indiani Sainasirang bilsa hajalgitammangna uamang'ni man'rikgimin gisikni biding namgipa guno janggi tanganichi a'gilsaknirangna bate nambata ine saki on'angaha."

Iani miksongani dal'a. Ia miksonganiko Kristianrangni bebera'aniona ra'baskaode a'gilsako nambatsranggipa chusokaniko an'ching nikna man'genchim. Maina Kristianrang gipinrangni a'sel antangnirangko watgalna aro a'gilsaknirangko chanchigija, gipinni janggiko jokatna dukrangko chakchikna heng'nikja.

### Sundar Singh-Sadhu

Madrasni songbad kingsa "Christian Patriot" indake sea :-

"Re'anggimin ruutbea chasong intal Indiani mande sakantini chanchianiko Sadhu Sundar Singh mesoka. Ua nok gri jam gri baoniko cha'aniko man'gen uko uisogija. manderangni mikkango Sadhu ong'e mesokon, uamang'ni gisiko a'gilsakko jeani dal'gipa chanchianiko naata"

Ia chanchiani Sadhu Sundar Singho bang'a chusokanirangko nikna man'aha. Maina ua antangna ong'gija gipinrangni janggina pilakkon gimaa ine chane agansokpilgija dukrangko chakaha.

Uni ka'sabegipa ma'gipa sagini skako manie Sundar Singh Sadhu ong'aha. Indiba uni Hindu ma'drangrang uko ka'onangbeaha, aro mitam Kristian ripengrang aro Missionaryrang uni Sadhu ong'ako namnikjaha. Uni napbolaoni sal kolatchi gitam ong'on ua bilsu chi'dokni pantesan ong'aiengachim. Unon Isol indakgipa janggi tanganiona aro an'tangni kamna uko okamaha ine ua bebera'aha. Ua sal intal ua Hindurangna skotangko donchakna biap grigipa Jisuni janggi tanganiko mesokna dondikjaha. Indake Sundar Singh Jisuni janggi tangani aro skianiko Indiani bewalchi a'songtangni manderangna mesokaha. Uni Kristoko skiani bewalko mitam manderang a'bachengao jeachim. Unigimin ua indake toe aganaha : Hindurang Sainasi pil'oba gipin jatni ringchakanioni chiko ringjawa indiba jattangni ringchakanioniko ringgen.

Kristian toromko Hindurangna aganprakna Indiani Kristianrangna gital dakbewalrangko jarikna nangani sal sokaha. Maina umang a'songtangni manderangni nangako uia aro uamang'ni dakbewalrang apsan ong'a. Sundar Singhni Sadhu ong'anichi Indiani manderangna bang'a patiani ong'a.

Sadhurangni ganronggipa gandingko gananichi Sundar Singh Indiani pilak dolrangna skina jakgitel ong'aha. Aroba Indiani me'chikrangni donnuenggipa dongramonaba re'ange Gitelni gimin aganprakna chol ong'aha.

Sadhu ong'ani salon indakgipa gandingko gangen ine ua kurachakaha. Aro uko skatang galjawa ine Sundar Singh aganaha.

Basakona kingking na'a pilakkon wate janggi tanganio tanggen ine uko pil'nipil sing'anina ua aganchakaha : "Anga a'gilsako tangenga dipet angni janggiko Jisunan on'kangaha aro Uni ka'sachakachi anga angni mikchetako pe'jawa.



Ua apsan biapo dongkamaigija India gimikon re'roroaha aro pilak rokomni manderangkoba grongaha. Travancore aro Ceylonni ding'begipa biaprangoni suuri tin'kagipa Tibetona kingking ua pilakon wenroroaha. Tangkako ra'bitgija salsaoni salsaona maironga cha'aniko aro gana-chinanirangko man'gen aro bano tuna nanggen uarangko uigija Sundar Singh Kristoni rasongna aro a'songtangni manderangni janggirangna re'roroe kam ka'aha. Sin'oba ding'oba ua apsan ba'rarangko gana chinaha. Tibetni sin'batbegipa biaprangoba ua ja'kopko ga'jachim. Maina uni ja'arangoni an'chi ong'anichi ua manderangko Kristoona salbana man'batachim. Ua jechi re'oba Niam Gital Sastroko ra'bitrongachim. Aro ua Sastroni gimin an'tangni uigiminrangni gimin aro ong'telaigiparangni gimin agananichi bil gnange skiprakna man'achim.

(The Manhood of the Master) minggipa ki'tapo Dr. Fosdick indine aganaha : Jisu uni chasongo Palestineo katchakosan mesokaigipa mande ong'enggenchim. Kristoni duk chakna uni kusi ong'ani ong'a, aro uni mikkango ning'tugipa tom'tom ong'aniko mesoka aro ka'sagipa jokatgipa Kristoo chu'soksrange kusi ong'a ine Sadhu Sundar Singkho nie uina man'achim. Sadhu ong'e bilsu chi'bri janggi tanganio Sundar Singh pilak rokom ruraanirangko uiaha, duk aro a'rikarangko chakchikaha. Watata Paul gita, "Pilakchin ch nga. (gisiko) sinjetako man'a, ndiba changketja; jajara, indiba jajasranga ong'ja; a'rikako man'a indiba watgalako man'ja; galonako man'a ndiba gimaatako man'ja; Jisuni janggi tanga maikai chingni be'eno parape'ako man'gen, chinga chingni be'eno pangnan Jisuni siako ra'roroa." II Kor.. 4 : 8-10.

### **Sundar Singh-Mande.**

Saoba Sundar Singkho grongode uni gipin Kristianrangoni dingtangani aro Kristoona manderangko salbana

amani bilni gimin uina skani uni gisiko bang'en donggenchim. Sundar Singhni pilakkon watsranganichi Kristoni skana an'tang ko bamatsrangachi aro uni ka'otong gimikchi Jokatgipana ka'saanichi uni gipin Kristianrangoni dingtangako aro Jisuona manderangko salbana bilko man'aniko uina man'genchim.

Sundar Singhni Kristian ong'ania una pilakkon gima-aniko ra'baasan ong'aigija una a'rikani aro dukrangkoba ra'baaha, ine an'ching oidhai gnio nikna man'gen. Uni Kristian ong'e man'a gimikara Kristo ong'a. Indiba ia uni gamchatbegipa man'aniara uni pilakkon gimaatskaaha. Ua somoi intal Sundar Singh Nokgipana duk chakakosa kusi ong'n ikskaaha. Jensalo Indiani manderangoni bang'an Jok-atgipako Sundar Singh gita gisiko ra'chakgen unon ia a'songni Mondolirang ua man'rikani chong'moto napgen, aro India gimikko Jokatgipaona rimbana skiprakna man'gen.

Manderangko Kristoona salbana ua baoniko bilko man'achim ? Sundar Singhni bi'samitingo janggi tanganini gimin poraiode ia sing'anina aganchakaniko man'gen. Ua ruuten gipin toromni rongtalgipa ki'taprangoniko gisikni tom'tomaniko am'aha. Indiba uni am'enggipa gisikni tom'tomaniko ua ki'taprangoniko man'na am'jae, Niam Gitaloniko am'skaaha. Ua Niam Gitalo uni am'enggipa gisikni tom'tomanina agreba chong'motgipa Isol aro janggiko man'aha.

Ia Hindu bi'sani bol ja'pango asonge Urdu kursikchi sea Niam Gitalko poraie grapengako nikode an'ching mikchi ong'gija dongna man'jawachim. Bi'sa Sundar Singh gita an'ching an'chingni ka'tong gimikchi Jisuna ka'saahama ine an'tangtangko sing'na nanggenchim.

Sundar Singh Sadhu ong'na a'bachengaoni siaona kingking Niam Gital Sastroko ra'bite aro Jisuni katarango bebera'e aro ka'donge India gimikko re'roroaha.

(The Goal of India) minggipa ki'tap kingsao Rev. W. E. S. Holland indake seaha :

“India toromni bidingó a'gilsak gimikni manderangni bakgnini baksani ma'gipa ong'a. Indiani manderangni gimin talatna segipa kirtapo toromna agre mamungkoba sechengna man'jawachim. Indiani manderangko uamang'ni toromtanga agre mamungchiba chu'ongnikatna man'jawa. Indiani toromni chubatsranggipa miksonganiara a'gilsaknirangko wat-anian ong'a. Sadhurangni saknaanirangko aro dukrangko kusi onge chakchikna amaniara gisikni bidingo bilakako mesokani ong'a. Ia bilko jakkale nama miksonganiko chu-sokatna man'na gita India Kristoko uina nanga.”

Kristoko uianian Sadhu Sundar Singhni bil ong'a. Jechi re'angoba ua manderangni kosako ia bilko jakkalacin a'gilsaknirangko watna nanga ine Hindu toromo skianiko Kristoni a'sel pilakkon watna nanga ine skianiona ra'ba-skaaha. Ua antangan a'gilsaknirangko wate Kristoko antango mesokaha. Hindu sainasirang dukrangko chakchikanichi antangna namgniko ra'bana man'a ine bebera'a. Indiba Sundarde Isolni namnikaniko kusi onge chu'sokatnasa duk-rangko chakchikachim.

#### **Keshab Chandra Sen Indake Aganaha.**

“Indiani manderangni nangnikbeenggipa toromni nang-rimgrikaniko on'na aro uko chu'sokatna, Kristo an'chingona Asiani mande gita re'baaha.”

Bang'bea manderang uni skianiko knatimna re'barong-achim. Uni skianirangara Kristian ong'bo ong'jabo pil-aknan gisik nangbeani ong'achim.

Uni a'gilsaknirangko wate kangal ong'aniko aro gisik pile Nama Katako aganprakaniko nikahaon manderang uni Sadhu onge skiprakaniko bebera'gijan dongna man'jachim. Indiba pilakande uko-bebera'jaha. Ua Indiani mande onge Indiani manderangko Jisuona salbana cholko man'bataha.

A'song gipinni manderang ka'sagiparang ong'oba indake dakna man'jawachim.

Indiani dal'gipa mande saksa Sadhu Sur'dar Singhni gimin indake aganaha :

"Saksa changrogipa aro pedawelko kan'dike ratgipa aro ro'gipa cholako gangipa dambe mandeni aganprakaniko manderang kantingija dongnan man'jachim. Maina uni aganprakanio katchinikgipani aro watatarangni aganprakanio bil gnga gita uni katarangoba bil gngachim."

Indiani manderang jerangan toromni ning. tugipa mangsonganiko am'engachim, uamang uko Sadhu Sundar Singho nikna man'achim. Uni janggi tangania Jisuko mesokani ong'a aro uachi ua manderangko Jisuona salbana man'achim.

"Young Men of India" minggipa 1918 ni magazineo indake seaha

"Sadhuni gimin manderangna katarangchi talatna man'java. Ua Sadhu ong'na an'tangko on'kangaha ; maina Isol uko Sadhu ong'china okamaha, ine ua bebera'achim. Sadhu gipin bebera' giparangna bate rongtalatako man'a ine ua bebera'jachim. Uni skianirang gita, uni kamrangba apan ong'achim, chong'motan ua tom'tome aro Isolo bebera'e salrangko re'atna man'ani gimin an'ching uan Isolni ripeng ong'a ine bebera'gija dongna man'ja. Ua aganprak mitingo an'tangna ong'gimin a'selrangko toe skianirang gita agandape an'tangni janggi tanganio mangsonganiko talataha. Indake toe agananirangchi-ua manderangna gualna man'gijagipa gisik ra'ataniko dakaha. Bebera'ani bidingo ning'tue uigipa kakket ong'e bebera'gipa aro Kristianna krakra ong'gipa ia Sadhuko man'ahani gimin. Indiani Mondolirangna kat'chaani ong'a."

Ia Sadhu toromna pagla ong'gipa ba ka'tong mogipaba ong'ja. Ua je boksirangko man'aha ua gimikkon ua

Kristonasa pakwatachim. Ua badiaba dingtangmancha dolni ong'ja. Uni dakkbewalo, Isolna bame janggi tangchina, antangnirangko Una on'china aro mandeni janggina dondikgija kam ka'china Indiani manderangko didiatani ong'a. Janggi tangani gamchatania maiba dal'a miksonganiko chu sokatnasa ong'a ine ua chanchiaha. Ia chanchianirangko ua antangni kamrangchi mesoke manderangna skiengon uamang chakchikgija re'bana krara ine ua bebera'aha.

### Jat aro atchiani

Sadhu Sundar Singh Sikh ong'achim. Sikhrang banga dakbewal ango gipinrangoni dingtang'ong'a. A'bachengo uamang dingtang toromko bikotaha. Uamang totromko nambatatna, rongtala olakaniko dakna mangsonge dol dake ua toromko b kotaha. Ja'mano umang toromni aro sipaini bidingo dilsretgiparangko aro a'rikgiparangko a'jak sokna miksonggipa dol ong'baskaaha. Ritichani riticha bilsirangna ia dol bang'a dukrangko chakna nangaha; indiba uamang jattangni bimungna dakgrikakgipa ong'anichi aro uamang'ni toromni skian o rim'kingkinganichi Sikh jatni dal'a miksonganiko da'alona kingking rakienga.

History of the Sikhs minggipa ki'tapo Cunningham indake seaha :

Riticha chi'dok bilsirango Punjabo sason ka'enggipa rajarang a'palchini napbaenggipa rajarang baksa dondikgija dakgrikaha. Unomiting Sikhrang chongipa dolsan ong'aiengpitichim. Indiba ia somoimitingo uamang ka'sne ka'sne dal'rorobaaha. Champenganirang dongahaoba uarango minggija dal'roroe bilakgipa jatsa ong'rorobaaha."

Ia Sikhrangn a'song chibima dilbongani gisepo Punjabo donga. Ia a'songkon uamang sason ka'achim. Sikhrang mande bang'beade ong'jachim, indiba uamang'ni bang'ani krina bate uamang'ni bilan batachim: maina uamang

toromtangna aro jatangna dakgrikanio gisiksan ong'giparang ong'achim. Uamang ka'donggiparang aro dukrangko chakna ambegiparang ong'achim, aro uamang'ko amoba ka'donga gri ong'atna man'jachim. Uamang Guru Nanak aro Govind Singh iamang sakgnini a'bachengatgipa Sikh torom basakobade mangsongbatgipa torom ong'gen ine ka'donge nisogiparang ong'achim.

Sikhrangni gimin bang'bate agananiko ia ki'tapni bon'kamachi nikkugen. Uamang jatni aro toromni dakbewaltango bilko man'giparang ong'achim aro Sundar Singh indakgipa jato atchiaha.

Captain Cunningham aganaha : "Sikh dilgipako uni be'en bimango jedake niksenga uandaken toromni bidingo uni ning'tue chanchianiko aro Isolni sepang ong'aniko uni mikkarang aro bimango niksenga. Sikhrang toromo nangchapgiparangko aro a'gilsaknirangko man'na skani bidingo Indiani gip n manderangoni d ngtang ong'sranga.

Sundar Singh indakgipa jatoni ong'achim. Uni pagipa Sikh ong'achim aro uko Sirdar Sher Singh mingachim. Ua man'e cha'begipa ong'achim aro Patiala Stateni Rampur minggipa songo dongachim. 1889 bilsini September 3 salo Sundar Singh atchiaha. Ba'rimarangni gisepo ua chonbatgipa ong'oba, ua chubatgipa kamna okamako man'skaaha. Uni ba'rimarangoni sakksa Sirdar A. Nath Singh Sikh A'songni Indiani mingsinggipa regimentni commander ong'achim, aro gipinrangoni mitam dal'dalgipa kamrangko ka'giparang ong'achim.

Bi'samit ng somoio Sudar Singh mahamaha dake janggi tanganio dal'atbaako man'aha. Bilsianti ding'kari sokbaahaon ma'drang baksa ua Himalaya a'briarangni ka'singipa biaprango ding'karini salrangko re'atrangachim. Mangsongbate uamang Simlaona re'ange dongrongbatachim.

Uni ma'gipa gisik gnanggipa, rinok rinok dakgipa, ka'sachakgipa aro skia man'gipa ong'achim. Ua American Presbytsrian Missionni me'chikrang baksa meliachim uni gimin uamang uni nokona champengani gri-re'ange rona man'achim. Uni chonenga intal ma'gipa una ka'sabatachim; maina uan uni bon'kamgipa depante ong'chim. Ma'gipa Sundar Singhko an'tangoni chel'e roanma on'rongjachim. Ma'gipa una indake aganrongach m : "Na'a nang'ni adatangrang gita a'gilsaknirangkosan man'na skaina nangja, indiba na'a janggini neng'takaniko aro tom'tomaniko am'na nanga. Na'a toromna ka'sana nanga aro salsao na'a rongtalgipa Sadhu ong'na nanga."

Ia agananirangko Sudar Singh ma'gipaoniko jring-jring knaahani gimin una agre ua gipin janggi tangani ramako chanchiangjaha. Ma'gipa jechi re'qba Sundar Singhba uchin uko watgija ja'rikrongachim. Unigimin ma'gipa una nambatgipa skie on'anirangko on'na man'aha. Bilsni on'gahaon ua Sanskritchi segipa Bhagavadgitako a'bachengaoni bon'aona kingking gisiko man'pile skiako man'aha. Indiba Sundar Singh bilsni chi'bri on'gahaon uni ka'sabegipa ma'gipa siangaha. Sundar Singh ma'gipani siani gimin badita dukko man'enggenchim uko pilakba aganna man'jawachim. Ma'gipa tangkuengode uni indake kam ka'engako nike badita kusi ong'begenchim ine Sundar Singh chanchirongaha.

---

OIDHAI II  
ISOLNI OKAMAKO MAN'GIPA

**Am'china Okama.**

“Na'simang angko am'gen aro angko nikgen, na'simang angko gisik gimikchi am'ode.” Jer. 29 :13.

Aganani ngang, dal'gipa manderang uamang'ni bi'samitingo ma'giparangni skianina gro nanggiparang ong'a. Iara mangsongbate Sundar Singhni gmin aganania indake ong'bata ine aganna man'genkon. Uni bi'sani salrango ua mite nokrangona ma'gipa baksa re'angachi nama skianiko man'aha; una bateba uni ma'gipa janggi tanga gimiko toromko chu bate donchina una skiaha. Ma'gipani rongtalgipa manderango sing'na re'angarango uaba re'angpaaha aro rongtalgipa manderango maikai mandera'achim ukoba ua nikrongaha, aro Sundar ia pilakkon gualna man'jaha. Sundar iarangko nike Sadhurangni janggi tanganiara nambatsranggipa ong'a ine nikaha.

Ka'tongni tom'tomai ngang aro uko gisik nangbee am'na nanga aro uko man'ahaon uan a'gilsako gamchatbatsranggipa gam ong'gen ine Sundar toromibegipa ma'gipachi skiako man'aha. Uni ma'gipa iako una pil'nipil aganrongachim. Ua badita dal'rorobaaha inditan gamchatbatsranggipa gamko am'na skaniba batrorobaaha. Hindurangni rongtalgipa manderangni ja'o asonge, mite nokni do'gacholo mikkingchi natrokroggipa chonbegipa bi'sa da'o ua an'tangan ua gamchatbatsranggipa gamko am'na a'bachengskaaha.

Sikhrangni Sastro Granth, Hindurangni Rongtalgipa Sastorang aro Muhammadanrangni Sastro Quran aro



indakgiparanko ua dontonggija poraie janggini tom'tomaniko am'aha. Bang'a somoion uni ma'drang gimik tusitokmanahaon ua asonge ki'tap kingprakprakoniko dingtang dingtang somoirango gisik nange porairongachim Uarangoni mitamko ua mukusto man'pilachim. Indiba uni bang'bate uianiranga uni gisikko dongtojabatatroengachim.

Mite nokni kamalrang, uni nikronggipa Sadhurang aro uni toromigipa ma'gipaba namnambegipa Sastrorangni bakrangko minge on'ahachim. Indiba uni ka'tongna tom'tomaniko on'na man'jaha. Pagitchamrangni indakgipa be bera'anio dal'atako man'ahaoba uko chu'ongnikgija, aro Kristo aro Kristianrangni toromko uigija, ua Missiوني School ona watatako man'aha. America Presbyterianni Mission School uni songon dongachim. Ua schoolo salantian Bibleko skirongachim. Sundar Singh ia skianiko knahaon uko namnikjaha aro mitchinikaha.

Uni schoolona re'angani salon Bibleko poraichina uko ge'etaha. Unon Sundar Singh, Sikh ong'ani gimin, namen ka'onangbeaha. "Maina anga Bibleko poraina nanga ? Chingade Sikhsa aro chingni Rongtalgipa Sastrode Granthsa" ine ua aganaha Sundar Singhko aro apsan jatni mande uni ripengko, "Na'simang Schoolni niamko manina nanga," ine aganon uamang uko manina ku'rachakaha Indake ua Niam Gital kingsako breaha aro uko poraina ab'achengaha Ia ki'tapo skianiranga uni bi'saintal skia man'bagiminrangoni bikpilsranga ine nikahaon, uko poraina mitchinikaha, aro poraina amjajok Ua toromtango dal'kapahani gimin iana ka'onangbataha. Ua ruutgijan Kristianrangko aro Kristian toromko mitchigiparangni dilgipa ong'baaha. Ua an'tangni bregipa Sastro Niam Gitalni mitam jakrangko chite ra'e jinmani mikkango so'e galaha. Iako knae uni pagipa, "Bible namgipa ki'tap ong'a, aro uko so'e galana batede Missionaryrangna on'pilode nambatgenchim ine uni kamrangna uko manengaha.

Da'oba Sundar an'tangni rongtalgipa kirtaprangko poraitaitaie nipilengachim. Inpako ua Kristoko mitchiani gisikan gape uni ma'gipani agangipa gisikni tom'tomaniko krengbate am'engachim. Ua Indiani toromrangni gimin sandiasan ong'ajaha, indiba sksa Hindu Sadhuo "Yogakoba" skie ra'e dikdiksana gisikni tom'tomaniko mikjumango man'na ama ine ua beber'aha, indiba dikdiksanasan ong'aia Mikjumangni ja'mano namjabatani ong'skaaha ine ua nikaha. Ua salrangmitingo uko Mission skuloniko Sorkari skulona rimangskaaha. Ia Indiani ding'begipa biapo sal rakbeako chake salanti re'na nangani gimin uni be'enni an'senganiko namen namgija ong'ataha. Uni gimin uni poraianiko matchotsrangatna gita Mission skulonan rimbapiltaina nang'aha.

Ia somoi gimikon ua bimchipbee ka'ton gn i aro janggini tom'tomaniko am'engachim. Indiba badita ua uko man'na ske am'a inditasa uni gisiko ka'don ggijani nabaroroachim, maikai bon'chotao uni janggini okkriako okkaatna man'jawa ine uni 'chanchia nabapilachim.

Mission skulona re'angtaiahaon ua Niam Gital Sastroko man'taiaha. Aro ua salantian Biblieni gimin skiako knaron gtaiaha. Unon uni ka'tongo Kristian toromko mitchiani gitcam gisikan nabataiaha. Ua inditan ka'onangaha changsao Missionary saksani jagring uni be'enko nangpakahaon ua an'tangko ong'sigipa ong'aha ine chanchie kontasa gimik an'tangko su'srangaha. Ia somini gimin Sundar Singh namjabatgipa ruraani somoi ong'a ine ja'mano aganrongaha. Uni kamenggipa gisikni tom'tomaniko man'jani gimin aro Kristian toromko agrepile mitchiahan i gimin ua Kristianrangni Sastroko porainan sikjachim.

#### Isolni Okamako Mana.

"Toromna okkrigipa aro ringna sikgiparang an'senga; maina uamang'ko okkaatgen." (Mati 5 : 6).

“Angona re·babo ...aro .anga nang·na neng·takna on·gen.” (Mati 11 : 28).

Ianona kingking Isol Sundarko u gija ramao dilbaaha gita nika. Uni uigimin toromrangni ki·taprangko poraiahaoba aro ua toromrangko dilgiparangni skianirangko knaahaoba aro an·tangni uia gita ning·tue chanchiahaoba gisikni tom·tomaniko man·jaha, maina uarango tom·tomani dongja ine Isol una mesokaha ine an·ching chanchina man·a. Bon·chotao, haida uni ka·onange so·e galgipa ki·tapon maiba dakchakaniko man·naba gnang ine chanchie ua Sastro Niam Gitalko poraina a·bachengaha. Duk aro ka·donga gri ong·achi sinjetako man·mitingo ua indake seako poraiman·aha :

“Angona re·babo ...anga nang·na neng·takaniko on·gen.” Ia katarang uni gisikko dingtangataha, aro chisolni golpoko poraiahaon ua aiao inmanbatroroaha.

Ua uni classni ripengskarang baksa Kristian toromko chonnikao jak on·pajaha, batesa basakoba basakoba uni Kristian toromko skigiparang baksa agangrikarangko uni ripengrang nikrongachim. Iarangko nike saoba saoba uni pagipana uko agane on·aha . Indiba uni pagipa una gisik nangbrejachim; maina ua an·tangni toromo mangrakaha aro uni toromigipa ma·gipa uko name dilaha ine ua uiachim.

Indiba nama katani wanti uni ka·tongo napaha. Maina Isol a·gilsakna inditan ka·saaha, ua an·tangni saksa kamkam depan tekon on·jok; maikai uo bebera·gipa sakantian gimagija, jringjrotni janggiko man·gen.”Ia Sastro ni bakko poraiahaon uni ka·tongona ka·dimeani gisik nabana a·bachengaha. Indiba dukni bojani a·sel ua neng·takaniko man·kujachim. Bon·kamgipa uni miksongani ian ong·a, uni gisiko dakgrikaniko bon·atsrangna mangsonge salsao ua wal seng·na skang tom·tomaniko man·chongmotna nanga ine ua chanchiaha. Man·jaode pring bonga bajio re·bagipa Express trainchi an·tangko saljetako man·atna mangsongaha.

Hinduni bewal gita ua aue, uni Sastro Niam Gitalko ra'bite, poraie, bi'e aro chanchie somoiko re'atna kuturio napaha. Pring ong'na skang skang kuturio aramni teng'suako ua nikaha. Ua aramo Jisuni mikkang gita bimangko nikengachim. Ua nikaniko nitate dongmit ngo Kristo una indake aganenga gita ua chanchiaha, "Na'a angko maina warachaka? Angan nang'ni jokatgipa ong'a. Anga nang'na chisolo siaha." Jisuni ka'saako nikahaon uni bobil dakna miksonganirang uni ka'tongoni gimasangaha. Ia nikaniko nike uni bebera'ani mangrakrooaha aro Kristoko ra'chakachi kema ka'ako man'aha ine ua bebera'aha. Ia bebera'anichi uni am'enggipa tom'tomaniko man'aha. Kusi ong'bean gape ua uni pagipani kuturichi napange, "Anga Kristian ong'aha, "ine aganaha. Uni depante iako g sik nange aganenga ine pagipa bebera'jachim. Indake uko re'ange neng'takchina watataha, aro pilakan namenga ine chanchie pagipa tutsiangtaiaha. Indiba ia gisikni re'baani walo bu'suni mukutko st kgipa Jisu an'tangko ja'rikchina Sundar Singko okamaha.

#### Duk Chakchikna Okama-1

"An'tang nokni manderangoni mandeni bobilrang ong.gen". Mati 10 : 36.

"Maina Kristoni gimin na'simangna iako ka'sae on'aha, uno bebera'anasan ong'ajja, indiba uni gimin duk man'naba." Phil. 1 : 29.

Sundar pagipani noko dongmitingo ua sal intal jaskuna kingking mingsani ja'mano minggipin bang'bea dukrangko chakna nangaha. Ua an'tangni jokatgipa ine Jisuko seaha ine uiahaon uni ma'drang una mitchisrangaha. Hindu dal'gipa ma'kringoni saksa, mitchia man'gipa Kristian dolona napan ara'aiao inmanpilani ong'achim. Uni pagipa uni gisik gri dake an'tangna aro ma'drangna mitchianiko ra'bana chaanchianiko watchina ka'sariri dake uko mol'molaha. Mik-

kangchi ua maironga mandera'ani, rasong aro gamrangko man'genchim uarangko uni pagipa una tale agane on'aha. Indiba an'tangni agananirangna Sundar gisik nangja ine nikaha. Uni gimin ma'gipani skianirangko gale una kratcha'aniko ra'bana mangsongengama ? ine pagipa uo sing'aha.

Ia dakmajoani badita bilaka uko Sundarna agre pilakba uina man'jachim. Uni ka'sagiminrangni kosakona jinmani mitchiani aro matnanganiko ra'bana uni gisiko duk ong'achim. Unbaksaba pagipani agangimin a'gilsakni gam aro rasongrangna uni gisiko mikbokaniba nabaaha. Indiba Isol Sundarko an'tangoni an'pilchina okamjachim. 'Ma'ana ba paana angna bate ka'sagipa angna kraja aro an'tangni chisolko ripee angni ja'man re'pagijagipa angna kraja," ine Jisu aganenga gita ua an'tangni gisiko chanchiengachim. Jensalo ua uni pagipani mikchiko nikaha unosa uni ka'tong be'na am'achim, aro uni gisiko dakgrikani ong'beaha. Indiba ua ka'sabeahaoba an'tangko okamgipana ka'saanian batahani gimin uko warachakna aro Jisuni agananiko manina bilko man'aha.

Ia salrangon Sundar Jisuko ja'rikna miksongchongmotaha ine ma'drangtrang nikahaon uamang uko toromtangona rimbapilna joton ka'taiaha. Man'e cha'begipa aro mande ra'ako man'begipa Sundarni wanggipa uko an'tangni nokona okamate nokni ning'tugipa kuturi chogipaona uko rimangaha. Unon uni wanggipa do'gako tekaha. Sundar uni bon'kamani sal sokahakon ine chanchiengachim. Wanggipa chabiko ra'e dal'gipa siltinko oaha. Unon Sundar bi'sa uintaltal mamung saloba nikkugijagipa gamko nikaha. Bank noterangni dolgimin katomrang damko uipilgijagipa ripokrang aro bang'bea tangkarangko nikaha. Uni wanggipaba Kristian ong'e ma'drangko kratcha'atjachina Sundarko mol'molaha. Unikoa ua an'tangni skooni kotipko oke uko Sundarni ja'ao donaha. Ian bon'kamgipa aro onbatgipa mol'molani chin

ong'achim. "Na'a ching baksa dongkuode ia nang'ni nikeng-gipa gimikan nang'ni ong'gen," ine ua aganaha.

Ia dakmajoani Sundarni gisikko namcn saknaataha Ia aiao in mangipa gamransan uko mikbokataijaha indiba waggipani kotipko an'tangni ja'ao nikon Sundarni mikron-rango mikchian gapaha. Indake nokdangoni chonbatgipani mikkkango uni waggipani an'tangko onatsrange mol'mol-anichi uni gisik ningtuen matatako man'aha. Indiba unochacha uni ka'tongo Jisuna ka'saani suakpilahani gimin ua dakmajoanirango jechakna aro warachakna nengraen amaha. Unbaksa uni ka'sabatsranggipa Jokatgipani an'tangko ra'chakaniko uni gisiko nabaaha. Uni Giteltangna kakket ong'na pilak miksonganirango ua gisiko bilakataha. Uni ja'mano uni pagipa, Sundar uni nokni depante ong'jaha indiba watgalgimin bi'sasa ong'aha ine bon'kame aganaha.

Sundar aro uni classni saggipin bi'saba ua Niam Gital Sastroko poraie sakgnian Kristoko ra'chakaha. Indiba uamang agre chonengani gimin ma'a paani nokko watna man'jachim. Uni gimin uamang Kristian dolo napna man'ku-jachim. Sundar Singhni ripengni ma'drang ua bi'sako drae Kristian ong'ataha ine American Missionaryrangni kosako nalis ka'aha. Bichal ka'gipani mikkango ua bi'sa an'tangni bebera'auiko kimkim ong'e saki on'aha. Ua bi'sa an'tangni chola jeponiko Niam Gital Sastroko bikote jako ra'e aganaha, "Missionaryrangni a'sel ong ja, indiba ia ki'tapko poraies a anga Kristian ong'aha. Uni gimin Missionaryrangko re-angna watbo." Indake ua nalis ka'ani mamungba ong'jaha, aro Sundar Singh aro uni ripengtang adita salrangna kingking ma'drang baksa dongangkuna nangdraaha.

Mikkangchi dal'bata kam aro bang'bata gamrangko aro nambata janggi tanganiko man'gen ine ku'rachakanichi Sundarni miksonganiko dingtangatna man'jahani gimin ua uni ma'drangni mitchibatsranggipa bobil ong'baskaaha. Uni

adatangan uni namjabatgipa bobil ong'aha. Uni gimin ua uni jakchi bilongbea a'rikaniko aro duk on'aniko manaha. Unikoa uk'o Mission skulonikoba salongkataha. Uamang'ni a'rikani gimin ua skulkoba chipna nangaha. Uamang ua a'songo donggipa Kristian dolni kosako bobil dakahani gimin, Kristianrang dokanoniko mamungkoba brena man'jaha. Iarangni a'sel uno donggipa Kristianrang gipin biapona jitungskana nangahani gimin Sundar ripeng gri dongrikna nangaha.

Indakgipa a'rikani bilongroroahani gimin Sundar pagipani noko dongangkuna man'jawaha ine nike Ludhianao donggipa American Presbyterian Missionni dongramona katangna nangaha. Iano donggipa Miss onaryrang uko ka'sae rimchaksoe una simsakaha. Unon Sundar High Skulo poraina cholko man'taiaha. Ia chanchininggipa Kristian pante Kristianrang maikai janggi tangna nanga uko uiaha. Ruutgijan an'tang baksa poraigipa Kristianrang bimungna mangmangsan Kristian ong'aia ine ua nikaha. Uamangoni mitamrangnid'a kbewalrangni a'sel ua skulko wate songtangchi re'angpilna nangaha. Ua Rampurona sokahaon ua Kristian ong'aniko watgalaha ine chanchie uni paa uko ka'sabee rimchaksoaha. Indiba ua skangna bate kimkimbate Jisuko ja'rikgipa ong'aha ine uamang bakbakan nikaha.

Sundar da'o Sikh torom doloni aro ma'drangoni eksrangaha ine uni kniko rasotachi mesokaha. Sikhrangni torom ki'tapo skiani gita Sikhrangko pangnaba kni rasotna on'ja, aro kakketgipa Sikh sakanti an'tangni knio rasong chaa. Indiba Sundar an'tangni kniko rasotaha. Ian uni Kristoko ja'rikna mangsongchong'motako mesokani chin ong'a. Uni ja'mano ma'drang uko an'tangtangni ine changija gipin ongipa jat gita uko chanaha. Indake ua ongipa jatrangoni onbat-sanggipa jatni mande ine chanako man'na nangaha. Cha-rimgijagipa dolni mandena gita una a'palosa cha'aniko on'aha

aro ua a'palosa tusina nangachim. Jensalo una iarangko dakna a'bachenga unon ua duk ong'bee grapna nangachim aro uni chisolni jrimara r pena amgijani gita ong'pilengachim.

Iarang Sundarna ong'engmitingo Naba Sateni Rajao dal'gipa kamko ka'gipa uni gumetangrangi saksa uko maibakai toromtangona rimbapilna chol ong'naba donga ine chanchie an'tangni noko salgni salgitammang dongchina rimang aha. Uno dongmit ngo ua Stateni Raja Sundarni gimin knaaha. Salsao ua uko an'tangni kamni gimin aganchina kachariona okamataha. Raja una bang'a on'anirangko on'na ku'rachakaha. Aroba ua uamang'ni jatni mikkim aro rasongko ong'siatna nangja ine aganaha. "Na'a Singh ma'chongoni ong'ani gimin singho gita bilakna nanga indiba Kristianara achak gitan ong'aia," ine ua Sundarna aganaha. Sundar maiko aganchakna nangachim ua somoion Isol una gisikko on'ahakon. Maina jegrikani, mol'molani, dal'a kamrangko gam aro rasongko on'na ku'rachakanirangba ong'na mangsongaoniko dingtangatna man'jaha.

Indake ua noktangona re'bapilaha. Unon pagipa uko bilongen ka'onangtaiaha. Pringo uko ma'drangni nokoniko rikgalatgen ine aganako knaaha. Sundar bilongen dukko man'aha aro ia bon'kamgipa walo ua pagipani nokni barandao tuaha. Pring seng'ahaoa sal nana skang uko rikgalbebeaha. Uni ganbita ba'rana agre una mamungkoba on'atjaha. Aro Pathialaona re'na rail ramnai korosna agre uo mamungba dongjachim. Song gri, ripeng gri aro mamungba ra'bita gri ua da'o bi'sa intal donggipa pagipani nokoni katangna nangaha.

Jisu, anga chisolko ra'aha,  
Nang'ko ja'rikna pilakkon wataha;  
Mamung gri, mitchia watgalako man'gen,  
Indiba angni pilakan nang'nin ong'gen.



## Duk Chakna Okama—II

'Una nang'ko okamaha, bang'a sakirangni mikkango nama ku'rachakaniko ku'rachakaha. ( Tim. 6 12 ).

Sundar Singh gario asonge re'angmitingo gisiko chanchiengachim. Ropur songo Kristianrangni donggipa biap gnang ine ua changsao knaahachim. Rampuro Kristianrangko a'rikani aro uamang'na chaktopilgijagipa obostarang ong'mitingo, haida ua biapni mitam Kristianrang ia biapona katbae dongegnaba donga ine ua chanchiengachim. Ropuro garioni ong'one pamong saksani nokona joljol re'angaha. Ua nokona re'angna gisikni dilaniko man'aniara Isolni una daksogimin chol ong'a ine ua ja'mano bebera'aha. Maina nokona sokani bakan ua saa bilongbeaha. Unon uamang uko sanna Doctorko okamna nangpilaha. Nokoni re'chakatna skang una je cha'aniko on'ahachim uno ma'ba ta'arakbegipa bisjko brinaha ine Doctor uina man'aha. Jatangna kratcha'aniko manderangna mesokna nangjana gita uni jatskani manderang uko siatna miksonge iako dakaha gita nikachim. Wal gimik pamongni jikgipa uni sambao asonge siako nisengsoana agre mamung dakchakaniko man'jachim; maina uko sanenggipa doctor ua sichongmotginok, uko gopnasa pringo re'bapilaiginok ine agane re'angaha.

Sundarni ku'sik gita namen an'chi jokengachim aro namen bilgri ong'angroengachim. Indiba Isol okambae on'tisaba Kristona saki on'gijade an'tangko siatjawa ine bebera'e tuengachim. Indake ka'donge ua namen Isolo bi'aha. Pring seng'ahaon namen bilgriahaoba ua tangpakuaha. Doctor uni ku'rachaka gita re'bae uni tangkuengako nikena aiao inmanbeaha. Ian ua doctorko inditan gisik nangatbeaha; maikai ua an'tangba Sastro Niam Gital kingsako bree uko poraina a'hachengaha. Ja'mano ua doctorba Kristaian ong'e Burmao Missionaryarngni kamko ka'aha.

Sundar saa mamkale bilaka chu'ongahaoa Ludhiana onan re'angpile American Missionaryrangni simsakani ning'o dongaha. Uano dongmitingo uni ma'drang uko man'bapilna joton ka'beaha. Changsao uamang uko saldrana am'aha. Unon golmalko namatpa gita policeni dakchakaniko nangpilaha. Salsao uni pagipa uona re'tae uni bon'kamgipa mol'molaniko dakaha. Ua aro uni nokni ma'drang gimik Sundarni gimin chanchie duk ong'anirangko grape aganahaon Sudarni gisiko namen dakgrikbena nanga-ha Ia dakgr kanio ua Isolni Gisikchi bilakatako man'e bebera-atango kimkim chadengaha. Pagipa re'na an'piloa Sundar an'tangko Kristona bon'kame on'kangaha aro uko ja'rikna pilakkon watsrangaha.

Ia a'selrangni g min uko jokatna gita Simlaoni mail kolgrikgitam chel'gipa Sabathu minggipa songona uko wat-ataha. Uno American Medical Missionni biap dongachim. Ia biapo Sundar pilak a'rikarangoni jakgitel ong'e Niam Gital Sastroko name poraie chanchina chol ong'aha. Uno dong-mitingo ua napbolako man'na skani gisik batroroaha. Pil'nipil ua napbolatchina bi'aha. Bon'kamao 1905 , September3 salo Simlao Rev. J. Redmanni jakchi Anglican gilja noko napbol-atako man'aha. Sundar Jisu baksa gopako man'e bebera-achi chakatatako man'aha (Kol. 2 - 12) ine uie uni gisiko kusi ong'an suakpilaha. Ka'sagipa Nokgipani bimungni a'sel indita duk aro neng'anirangko chakchikaniara ia gital kusi ong'ani salrango guuri gita balponge bon'angtokaha.

Jokatgipako aganprakna ua an'tangko on'kangsrang-ha aro da'o uko a'bachengna mangsongaha. Isol una jang-gini, tom'tomaniko on'bebeode ua uni man'a gimikkon Isol na on'pilskangench m ine uni duk chakbee Isolko am'ani salrango Sundar Isolna ku'rachakaha. Da'o an'tangko Jisu Kristona chu'g mik on'kangani sal una sokaha. Skang in-talan ua Sadhu ong'na skachim. Unikoa Sadhu ong'e jang-

gi tanganio mai ong'gen uko uiahaoba ua kusi ong'bee uko see ra'aha. Uni gimin ua an'tangni pilak ki'taprangko aro bosturangko paltoke 1905 bilsini October dok tariko, uni napbolani sal kolatchigitamni ja'mano ua ro'gipa chola gitchakmrangko ganchenge an'tangni janggi tanga gimikkon toromna on'kanggipa mande ong'a ine mesokaha. Ja'kop ga'gija aro dakchakna ku'rachakgipa donggija, uni jako Sastro Niam Gital kingsamangmangko ra'bitari, Isolo ka'donge Sadhu Sundar Singh skiprakna re'chakataha aro uni janggi tanga gimiko uko dakaha.

#### Dangdike on'na okama.

"An'tangni ka'saachi angko okamgipa Isol ong'a gipin jatrangna uni Nama Katako aganprakna man'na gita anggo an'tangni depanteko parape'na namnikani salo rang'san anga be'en aro an'chi baksa ku'mongjachim. (Gal. 1 :15-16).

Sundar gita an'tangni pilakkon watsrange toromni a'sel duk chakgipa a'gilsako manderang bang'gijasan dongaia. Hindu toromoni Kristian toromona uni ramara bu'surarasachim. Indiba bu'suni mukutko stikgipako gisikchi niksrangahaoa aro Jokatgipani una on'gipa tom'tomaniko ra'chakahaoa, uko ja'rikna pilakkon watna una mamung neng'ani dongjajok. Dr. Wattni dongkamgipa kata rango indake agana :-

Angni on'ge a'gmikan,  
On'genoba on'titisan;  
Indita ka'sara Isolni,  
Am'a janggimung p'lak angni.

Ua pante bi'sasan ong'aiahaoba Sundarni ka'tongo manderangna ka'saanin gapachim aro uamang'na Jisuni ka'saaniko aganprakna ua an'tangni songonan re'angchengna mangsongaha, jeo on'tisa salrangna skangmangmangsan

uko a'rikach m. Uni ma'drang una mitchiahaoba ua uamang'na ka'sakuengani gimin uni mangsongaha gitan ua Rampurona re'ange Jisuko aganprakna a'bachengaha. Mande bang'gipa biaprango aro ramarangosan skiaigija ua me'chikrangni dongramrangonaba nape skina cholko man'aha. Indake ua noksaoni noksaona re'jojoe me'chikrangnaba ia aiao inmangipa Jisuni kamrangni gim n aganaha. Saksanoba ua kengija Rampuroni gipin sepanggipa songrangona re'ange gis kni tom'tomaniko Jisu Kristoosan man'na amaigen ine skiprakaha.

Uni ja'mano ua Pujabni songjinmarango aro gittimrangona reange, Afghanistan aro Kashmirona kingking wengaha. Ian neng'begipa wenani ong'achim Sadhu rakgipa janggi tanganio dongrongpakujani gimin ua sin' a aro ding'ako bang'en chakchikna nangaha. Unbaksaba ian rakbegipa kam ong'achim maina Afghanistano donggipa manderang uni skianirangko knachakjachim. Salsao ua gitchambegipa Jalalabad songjinmao mitam Pathanrangko grongaha. A bachengao uamang uko gimaatna cholko dakachim indiba bon'kamao uamang uni aganprakenggipa katako ra'chakaha. Iani gimin gipin odhaio sekugen.

A'bachengaoni ia somoiona kingking Isol ka'sne ka'sne uni gamchatnikgipa a'gilsaknirangoniko Sun darko an'tangchina salbana man'aha. Ua bakdilrangoni, gamsengrangoni, aro nokdangtangoni chel'baaha. Ua uni gital Kristian janggi tanganiona napahaon, uni man'gni gipa pilak kusi ong'anirang aro janggi tangani namgipa cholrang una mamung gamchatani ong'jaha, maina ua a'bhirangni gittimrango Kristoko aganprakna cholko man'aha. Uni bararang ba'ani gimin ua sin'ako chakna nangachim, uni ja'parangko bu'surang bu'achim aro ro'ongrang matachim. Bang'a salrango sin'begipa aro mikka wabegipa salrango bano waltugen uko ua uisojachim. Aro pringrango skangrango okkriana bate namen okkriako chakchikna nangrongaha. In-

dakgipa obostao uni an'saogipa gisik nom'angna a'bachengaha. maina uni duk chakani namgni bang'ja ine ua nikaha. Bang'a salrangon manderang uni aganprakaniko gamchatnikjaha. Changni chang ua a'rikako man'e burungrango aro rong'kol-rangosa cha'ani gri okkrie waltuna nangachim. Sadhuni gandingko nikon una jeoba napna neng'ani dongja, indiba uko Kristian ine uiahaon gittimrangni manderang una mamung cha'aniko on'gija uko rikgalat rongachim.

Indiba mamung obostaba uko ka'donga gri ong'atna man'jaha. Kengni aro signirangko nikoba an'pilgija Sadhu Sundar Singh Indiani ki'tiksaoni ki'tiksaona aro uni nalsachi andalbatsranggipa biaprangonaba re'ange kamko ka'anguaha Ruuta bilsirangna ua manderangni janggirangna a'kawerango ba abrirango, dal'dalgipa songjinmarango aro gittimrango rake kam kaaha. Ia biaprango ua bilonggipa dukrangko chakaha, indiba uarango donggipa manderangon ua kusi ong'batsranganikoba man'aha maina Jisuni gimin uiatna man'aaian on'g'jaha, indiba uamang'oni mitamrangko Jisuona rimbana man'aha.

### Aganprakna Okama

"Maina Jisu Kristoko, aro uko chisolo datkapako uiana agre anga na'simangni gisepo mamungkoba uijana mangsongaha." I Kor. 2: 2.

Punjab, Kashmere, Baluchistan aro Afghanistan jol-rango neng'bee wenani ja'mano Kotgarhona re'bataiaha. Ian Simlani nalsao Himalaya a'briio damsia chonggipa gittim ong'a. Ia chonggipa gittim Sadhu Sundar Singhko gisik ra'an biap ong'a; maina uni kam ka'na a'bachengaonin ua ia biapo neng'takna dongrongaha.

Bilsu 1906 in-ding'kario Kotgarho dongmitingo ua Mr. Stokesko grongaha. Uan Americani man'e cha'gipa mande saksa ong'achim, aro Isolni rasongko Indiani manderangna

aganparakna kam ka'na ua Indiaona re'baaha. Ua Sundarko grongahaon an'tangni gamrangko on'e aro Sadhu baksa nang-rime ia rakbegipa kamko ka'na mangsongaha. Mr. Stokes Isolo bi'e chanchibeman'ahaoa Sundar baksa ku'monge Kangra a'kawe gita sakgnian re'angaha.

Ua jolo waltuani aro cha'anirangko man'na neng'beani ong'achim. Ia sadhu sakgnan namen dukko man'beaha, indiba uamang'ni kamrang namachim aro uamang namen melibeachim. Uamang ritchani ritcha mailrangko songreaha Bang'a changrangon moilagipa alda nokrango damsan tuna nangaha aro uamang namjabatgipa cha'anirangko ncng'edik-esa man'na amach m. Uamang ia namjabegipa biap jolko re'mitingo Sundar Singh bilongbee fever saako man'aha aro be'en ning'o kamgopa gita saknabeengachim. Ua sabeengoba bil amadipet re'angkuaha, indiba ja'mano ua saa amchakjae gitilaha. Indake ong'on Mr. Stokes uko name tuate, Mai ong'a ine sing'engachim. Unon ua bilgribeani ku'rangchi aganaha, "Anga kusi ong'bea." Mr. Stokes uni aganchakanina aiao inmane uko n engachm.

Ia obostarang a'bimandu burungosa ong'aha. Uni gimin Mr. Stokes mande donggipa b apko man'na gita che'e re'dilna nangaha. Ja'mano uamang adita mail chelgipa biapo Europeni mandeni dongram nokona sokangaha. Ia biapo Sundar Singh nampilaona kingking sanako man'aha. Ua nokni nokgipa toromni gimin gisik nanggipa ong'jach m. Indiba Sundarni salantio daka kamrangko nike aro agana katarangko knae ua Krist an toromni g min name chanchina a'bachengaha. Bon'chotao ua gisik pil'aha. Indake Sundarni saara mande saksako jokatna chol ong'skaaha.

Mr. Stokeso magic lentera gesa dongachim. Sundar uko ra'chake Ranpuro aro gipin biaprangoba a'palrango walanti skirongaha; maina manderang noksarangko nina bang'e chimongrongachim. Ia somoirango Mr. Stokes.

Sundarni kamrangko mitele aganrongachim maina ua pante bi· sasan ong'aioaba uo inditan aganprakani bil bang'a, maikai je biapoba uni agana katarangko knatimna manderang re· banan skaiachim.

1907 bilsio ia Sadhu sakgni Sabathuni konchi cha, giparangko donram biapo kamko ka'na re'angaha, aro ua b'ls'ni bon'achibara plague sagiparangko sanna Lahoreona re'angaha. Uamang walo aro saloba gisep gisep neng'take kamko ka'aha, aro tusina skoba sagiparangni sambao a'aosa tuach m.

Gipin bilsio Mr. Stokes chutina Americachi re'angahaon Sundar saksan ong'aiaha. Unon Sundar Lahareoni Sindhona re'angaha. Unoni ua Rajputana gita re'joljole Indiani Salgro jolonan re'bapiltaiaha. Ding'kari sokbaahaoa ua gipin a'· songni mandeko napna on'gijagipa Tibet a'songona skanggipa chang re'angaha. Unona re'angmitingo ua pilak biaprangon Nama Katako skijoljolaha. Sundarko gronggipa pilakan Jisu Kristo papirangko jokatna a'gilsakona re'babebeaha ine skiako man'gijade re pilangjachim.

Tibetoni re'bapilani ja'mano ua Palestinechi re'na gisik nangbeaha; maina Jisuni dongram, kamka·ram aro siram biapko nikanichi ua nambate aro gisik nangbate kam ka'na man'genchim ine ua chanchiaha. Indiba ua Bombayona sokeahaon re'angkuna chol ong'jaha ine nikahaoa'ua 1909 bilsio Central Province gita skiprakjoljole Indiani salgro jolonan re'bapilaha.

**Iara Maidakgipa Uiani ?**

"Iara baoniko iarangko man'aha ? Aro una on'gimin Uiania mai ? Mark 6 : 2

Sadhu Sundar Singh skiprakna a·bachengani salrango Isolni gisikko man'aha ine uina man'a, maina bang'a maderang uni skianiko gisik nangbee knatimaha. Uo Nama Katako agandrakna ong'ronggijagipa bil donga ine uni ripengrang nikna

man'aha. Uni gimin Kristian ong'gijagiparangnasan ski-  
aigija Krist anrangnaba skiode namgen ine uamang chan-  
chiaha. Ia kamko dakatna uko tarsona uamang uko Theo-  
logical Collegeona watataha. Ua skanggipa bilsini porikako  
ra'e pass ong'ahaoa gnigipa bilsina poraina ua Lahoreni  
Saint John's Divinity Collegeo napaha. Indake ua 1909 aro  
1910 bilsirango uno poraiaha indiba chutini salrangode ua  
skango gitan skiprakani kamko ka'anguaha.

Sundar Singh Collegeo poraimitingoba Sadhuni ro-  
gipa cholakon ganaiachim. Uororo Kistian ong'e sadhu  
ong'na kraja ine bang'a manderang chanchiachim. Indake  
jeanirang uona sokbaronganichi una jajaani ong'ahaoba uni  
kimkim mangsonganioni an'piljaha.

Ua salrango Mr. Stokes Americaoni Indiaona re-bapil-  
mitingo Englando dongdike "Jongada Ong'grikani" minggipa  
dolni gimin chanchianiko a'bachengataha. Ia kamara Isolna  
kam ka'na aro mandeskako dakchakna miksongani ong'  
achim aro skiprakanisan ongaigija kamchi dakchakna nangani  
ong'bata. Badita kamrang ona aro raka inditan nambata,  
ine ia dolni chanchiani ong'achim. Canterburyni Arch  
Bishopko gronge iani gimin agangrikaha aro Mr. Stokes  
Indiaona sokahaoa ia chanchianiko a'bachengatode namgen  
ine nike sakbonga memborrangko ra'e ua dolko dakchengaha.  
Ia sakbongaoni Indiani mandede saksasanchim aro uan Sadhu  
Sundar Singh ong'achim. Lahoreni cathedral dal'gipa gilja  
noko tom'e ia dolko Isolna pakwataniko dakaha.

Collegeko matchotman'oa Sundarko deacon ong'ate  
una skiprakna licenceko on'aha. Ruutgijani ja'mano ua  
Tibetchi re'angtaina mangsongaha. aro ding'karimitingo  
ua uchi re'ange kam ka'aha. Unikoa ua Kotgargona pil'bae.  
Church Missionary Society na dikdiksa kamko ka'aha.

Engilsh dal'gipa aganprakg pa John Welsley gita  
Sadhu Sundar Singhba a'gilsak gimikkon an'tangni kam



ka'ani biap ine chanchiachim aro an'tangni katarangko knatim-  
giparangna je biapoba skiprakachim. Indagpiba uni ka m  
ka'ani bewalko mitamrang namnikjaha. Anglican mondolio  
deaconni bewalo indake kam ka'na nitoa ong'ja aro pamong  
ong'e ua indake kam ka'na man'jawa ine uamang aganaha.  
Uni gimin ua aganprakani licsnceko Bishopnan on'pilaha  
aro ua jechi Isol okama uchin re'ange agaprakna nanga ine  
uni bebera'ako Bishopna aganahaoa uaba uko namnikpae  
Bishop Lefroy Sundarni agananiao gamchataniko nike uni  
licenceko ra'pilaha. Ia sal intal Sadhù Sundar Singh an'tangko  
pilak Kristianrangni dolrangnan on'aha aro India gimikni  
Kristian ong'gijagiparangnaba dal'bea kamko ka'na a'bacheng  
aha.

(5)

ODHAI-III

KAM KA·NA A·BACHENGANI

Sabhuni Dakchenggipa Kam

“Papigipako uni rama brangaoniko pil·atgipa siaoni janggiko jokatgen aro bang·a paprangko pindapgen ine uichina. Jakob 5:20

1911 a ro 1912 bilsirangni sin·kario ua Garhwal, Nepal, Kulu, Punjab aro gipin biaprango wene ding·kario Tibet a·songo wenachim. Ka·mao janapgipa a·selrang ua somoirango, uni janggi tangao aro kam ka·ao mai mai ong·ahachim uko mesoka.

Sadhu Sundar Singh salsao gittim damsaona saksan re·angmitingo uni mikkang mikkang re·enggipa mande sakgniko nikataha, a ro uamang·oni saksako rang·gitik nikjajok. Adita re·anguoa Sundar ua saksa chadenge dongenggipa mandeona sokeaha. Ua chadenggipa mande ba·rachi pindapgipa mandeko mesoke aganaha, ia angni ripeng da·o mang mang siaha aro uko gopna ango tangka dongja. Na·a angna tangkako on·na man·genma ? ine bi·aha. Sundaro gombol kingsa aro paisa pelgnina agre mamungba dongjachim. Ua paisaba cholgugako napna on·na nanganina donasachim. Indiba ua mandena uko on·aha. Ua chel·e re·angujaon ua apsan mande uko rikbaengachim. Sundarko srapeoa uni ripeng sibebeaha ine aganaha. Sundar maiko mangsongachim uko uijajok. Indiba ua mande Sundarna indake aganaha,

chongmotan uamang saksia sia dakmike rama repakanggi-parangoniko tangkako bi'e ra'rongachim. Ia kamko uamang bang'a bilsirangna dakbaaha. Indiba ia chango uni ripengko de'mesahaoa mamung aganchakani dongjani gimin ba'ra pin-dapako kikprake nie ua mandeni sibebeako nike namcn ken-beaha. Ua kengipa mande an'tangko kema ka'china Sundaro bi'aha, maina ia rongtalgipa mandeoniko indake ra'sekahani gimin uamang'ni miterang ka'onange uni ripengko siataha ine ua bebera'achim. Sundar ua mandena Jisuni gimin agane on'ahaoa, ua mande Sundarni katarangko ra'chake gisik pil'aha. Ua uko Garhwalni sepango donggipa Missionona watate ja'mano ua mande napbolatako man'aha.

Uni bakeoe a'brijolo wenarangoni changsagipao biap damsao rama dilgni pekwata gngangchim. Unon ua rama chongmotko uijae re'sretange song damsaoa sokeahaon ua rama chongmotoni mail chiesa chel'e re'baaha ine nikaha. Unoni re'hapilmitingo ua mande saksako si'ape un baksa agan-grike re'baengachim. Sundar una Kristoni gimin agana a'bachengaha. Ua mandeba an'tangni gandingoniko Sastro Niam Gital kingsako bikote mesokaha, aro Sadhuni re'baeng-ako niksoe uan Hindu Sainasi ong'akon ine chanchie una kenani gimin ua sastroko chola ning'o donuaha ine aganaha. Ua mandeo Jisuni gimin adita sing'na nanganirang dongachim. Uni sing'anirangna tale aganahaoa uaba Kristoko bebera'aha. Ja'mano Sundar Singh iani gimin indake aganaha, Anga maina rama brangaha uni ortoko da'o uiaha. Maina Kristo ua jajreng enggipa mandeni janggiko jokatna angko watataha.

Sundar Narkanda songo dongmitingo salsao ua mi ragiparang baksa kam ka'pae uamang'na Jisuni gimin aro jringjrotni janggi'ni gimin aganengachim. A'bachengao uamang gisik nanggija aro bebera'gijasa knatimengachim. Uamang knaronggijagipa toromni gimin knanan sikjachim. Uamang oni mitam uko sao on'na aro ka'mikkenna a'bachengaha,

aro saksade ro'ongko kole uko skoo gotataha. Dikdiksani ja'mano uko ro'ong gotatgipa mande rang'gitik saako man'e kamko dontongna nangpilaha. Sundar uni atchiliko ra'skae gipinrang baksa miko rapaaha. Indake dakanichi uamang'ni gisik dintang ong'aha aro salniahaoa uamang uko songona rimangaha. Atamo ua uamang'na Jisuni gimin talbate aganna man'aha aro aganman'ahaoa ua re'angaha. Mi ragiparang ua salo ra'gimin mirangko chimongahaoa aiao inmanpile nik'aha, maina mamung saloba gipin bilsirango indita bang'aha mirangko man'kujachim. Uni gimin uamang ua sadhuko am'na joton ka'aha. maina uni katarangko uamang knatimna sikbeachim, indiba uko nikjajok.

#### Duk Chakachi Maniani.

Depante ong'oba ua duk chakarangoni maniako skiaha." Ibr 5.8

"Anga pilakkon gimaa ong'nikaha.....indiba Kristoo bebera'achi chong'motan bebera'ani Isolni on'a toromi inako man'gen." Phil. 3. 8. 9

Sadhu Sundar Singhna agre uni nokgipana indita bilsirangna kam ka'anio badita duk chakaha uko sawa gipin uigen pil'nipil ua kraa gita cha'aniko man'jachim aro basak obade burungni biterangkosa cha'e tangna nangaha ine ua agangenchim. Basakoba basakoba ua songrangoni rikgalat'ako man'e bolrangni ja'pangrango aro rong'kolrango tusina nangachim, aro indakgipa biaprangon mitamo chipurang aro matburunrang dongachim.

Thoria Districtni song damsao songni manderang uko inditan namjabee jakkalaha maikai ua uno dongmiting somoirango ua burungosa waltuna nangaiachim. Andalebepa walsao ua damsao rong'kolo tusiaha. Pring seng'ahaosa ua apsan rong'kolo matcha mangsani tusikuengako nika ua il'engna changpilgija namcn kenaha. Indiba ja'mano ua a'palona

ong'kataha aro tusimitingo an'tangko jokatahani gimin Isolko mitelaha. Uni an'tangni agana gita, "Ia salona kingking mamung matburungba angna namgijako dakuja."

Changgipino songoni rikgalako man'e Sundar rong'kolni kurmango donggipa rong'brako chanchina re'angaha. Ua gisik nangbee chanchimitingo ua mangsa matchapeng gisimni kom'tote timengako nikataha. Kenbeoba ua kenako mesokgija Isolo ka'donge songchina re'angpilaha, aro mamung a'sel nanga grian sokeaha. Songni manderang ia ong'a obstako knahaon aiao inmanaha aro Sundar rongtalgipa mande ong'na nanga ine uamang aganaha, maina ong'jaode, ua matcha ua songni mitam manderangko chike cha'aha gita ukoba chikgenchim ine uamang chanchiaha. Indake uamang an'tangtangni jechakgimin katarangko knatimtaine re'batokaha. Uni gimin Sundar Isolko mitelaha aro aganangkuna ka'dongbatroraha.

Pringsao adita Sadhurang Reshi kesh minggipa Ganges Chibimani rikamo damsan ch mongtokengachim, aro uano toromni biding gita augiparangba bang'en dongachim. Uamang'ni jatchio Sadhu Sundar Singh sastro Niam Gitalko jako ra'e chadenge aganprakengachim. Uamang'oni mitam on'tisa gisik on'e knatimengachim indiba mitamde uko chon nike aro nachilake roengachim. Rang'gitik mande saksan'chengko jakamsa chin'e Sundarni mikronrango godapaha. Iako nikiparangoni mitam ka'onangchakaha aro ua godapgipa mandeko policeni jako on'aha. Sundar chibimachi re'ange mikrongrangko su'srangeaha. Unikoa ua policechi re'ange ua dosi dakgipa mandeko watchina mol'molaha. Uni ja'mano ua manderangna skiprakangkuaha. An'tangna dag min chonnikaniko Sundar maikai chakchikaha uko nike ua dosi dakgipa mande, Vidyananda, Sundar Singhni ja'ao ga'ake kema ka'china bi'aha, aro uni skicnggipa kata-

rangni gimin talbate uina skenga ine aganaha. Ia mande ja'mano Sundarni wenarango uko ja'rikꝑ pa ong'skaha, aro Sundarni skianirangoniko jokatani katarangko uina cholko man'aha.

Sundar bang'a songrango re'jojoaha aro Doliwala song-onaba re'baaha. Unona re'bamitingo namen sal ding'beachim aro chel'e re'na nangachim. Sokahaoa Sundar namen okkriaha aro neng'beaha. Songni sorokrango re'roroe ua waltuna nokko am'oroengachim, indiba biap antion ua Kristian ong'a ine uioa uko rikgalataiachim. Mikka jimbeengani gimin namen sin'beachim. Bon'kamao Sundar do'ga aro kelki grigipa galchippipa noko tuna man'aha. Indake ua mikka wadapaoni jokaha, aro an'tangni ra'bita gombolko ane okumu tusiaha. Pringo walsimsim dakengpition ua wenkone dong-enggipa maiba gisimbegipani an'tangni gombolo tupaako nikaha, aro uara chipugram gisimsa ong'achim. Ding'ako man'pana ua chipu uni gombolo tuaha. chipu tusiengpition ua chipuko kiki'e gale gombolko ra'e re'angaha. Uri tusimitingo an'tangna simsakahani gimin Sundar Isoko mitelaha.

Salsao Arya Samajni skia man'gipa mande saksa Sadhu Sunder Singhni song damsao napako nikaha. Sundar boltongo asonge Kristian gitko ring'aton mande jinma unona re'baaha. Unikoa Sundar Jisuni katarangko uamang'na skiaha. Unon jinmarang uko ka'orangaha aro uamang'oni saksa Sundarko bilonge dokaha, maikai uni jak aro peo maibeaha. Sundar ku'saba agangija batesa uni bobilrangna bi-chakaha, aro Kristoni ka'saani aro kema ka'ani gimir uamang'na skiangkuaha. Arya Samajni mande Sundarni bewalangko nike an'tangba ja'mano gisik pil'aha. Aro je mandean Sadhuko dokahachim ua Sadhuni jakchinnapbolatako man'na skachim, indiba chol ong'jahani gimit sakgipinni jakchisa napbolatako man'aha.

**Okumu Chaka.**

"Indiba na'a bi'an salo an'tang uokdringo napbo, aro do'ga chipchange dongnue donggipa nang'ni Paa bi.bo." Miti 6.66

"Indiba na'a okumu chakon.....dongnuao nik-gipa nang'ni Paa nang'na on'skagen. Mati 6.17 18

Sadhu Sundar Singhni napbola man'ani ja'mano uni gisiko sikbea minggni gnang. Mingsara Palestineko nikna, jeon Jisu Pagipani kamko ka'aha. Minggipin skaniara Jisuni daka gita sal sotbri wal sotbri okumu chake bi'na. Iarangko dakanichi ua janggini niksengbataniko ma'na ka'dongachim. Skangg pako chu'sokatna ua 1908 bilsio Bombayona re'angaha, indiba maibani a'sel re'ani cholrangko dakna man'ajok. Bifsi brini ja'mano Sadhuni gisiko okumu chake bi'na jinmaoni re'ongkatna chanchiangkuaha, maina indake dakachi ua dangdike on'ani bilko Isol baksa nangrime ia dal'begipa kam ko chu'sokatna man.batgen ine ua nikaha. Ia somoion ua Roman Catholicni doctorko grongaha, uko doctor Swift mingachim Uamang damsan songreangmitingo okumu chak ani gimin chanchigrikaha Dr. Swift Sadhu Sunder Singhko okumu chakna joton ka'na nangja ine beng'aha maina uko dakode sichong'motgen ine aganaha. Indiba ua Sadhuni miksongako dontongatna man'ja ine nike Dr. Swiftuni mong-songbatgipa ripengrangni bimungrang aro addressrangko bi.aha jedakode nangani salo uamang'na uiatna man'gen.

Iako dakmano uamang ekgrikaha. Catholic doctor an.tangni jongadarangona aro Sadhu okumu chake bi'aniko dakna re'angaha. Doctor Dehra Dunni sepango danggipa ripeng saksana Sundar Singhni obostarang maikai ong'engachim uko seatah aro unomiting Sundarde Hardwa aro Dehra Dunni gisepo burungona uni Isolni gimin saksan chanchina re.ekangaha.

Salrang re'angaha aro Sundarni gimin manderang ma-  
 mungkoba uina man'jachim. Unomiting ua burungo cha'ani  
 gri ong'e salantian bilgriroroengachim. Una mai ong'gen uko  
 una uiatmanahani gimin Sadhu ro'ong rong sotbriko kolaña  
 aro salko uina man'na gita ua salprak rongprak galatengachim.  
 indiba bon'chotachide ua ukoba daknan man'jajok. Ua  
 nikna ba kñanaba man'jajok, aro mikjumang niña gitasa ong'-  
 aiachim. Uni sambarango mai ong'enga uko uien gobaba uo  
 tangengani mamung chinkoba nikjaha. Be'enni bilrang re.  
 aagsrange ua bilgribeahaoba uni gisikni uiani bilakbatroro-  
 engachim. Indakgipa obstao ua lsolo pangchaksrangna  
 nangahachim aro gisikni mangsonggipa nikanirang una parak  
 ong'ahachim. Indake untal gisiko kenchakanirng uni kosako  
 mamung bil man'jajok. Indakgipa obstao dongmitingosa  
 wa'a den'giparang uko nikdikaha aro chola gitachakm rang  
 ganako nike uan Sadhu ong'a ine uie uko detome Dehra  
 Dunona ra'angaha. Uanoni ua Annfieldona gario watatako  
 man'aha. Jerang ong.angaha uarangni a.sel uni mikkang bimang  
 dingtangbeahani gimin Annfieldo donggipa uni Kristian  
 ripengrang uko uip l'ajok. Ua sawachim uko sastro Niam  
 Gitalo uni bimungko seako nikosa uko uienba uamang sim  
 sakbee sane tangpilataha.

Ia kenchakbegipa obostrangni ong'anichisa Sundar  
 Singh gisikni uianiko bang'en man'dapaha. Ua bañita sa  
 okumu chakaha uko tiktak uijaoba uan sal sotbri ong'jawa  
 ine uina man'a. Jeba ong'bo uni okumu chaka sal sotbri ong'  
 jahaoba ua okkrie sinasiahachim. Inkake ua gisikni man  
 depanirangko janggitangko gimaatsrangnasiachisa man'ah'

**Wenkuani Aro A.rikanirang.**

"Janggi tangachi ong'chong siachi ong'chong angr  
 be'enc Kristo rasongko man'gen." Phil. 1 : 20

Uni okumu chakaoni nampilman'o 1913) bilsini ding  
 kario Sadhu Sundar Singh Tibetchi re.angtaiaha. Ua re'



bapile sin'karini somo o Indiani salgro jolo wenaha. Gipin bilsini a'bachengachibara ua Bengaloni Darjeeling gi'a kam ka.joljole Sikkimona sokangaha. Indian salgrochipak donggipa Nepal, Bhutan aro Sikkim, ia a'songrangko jatangtangni rajarangchi sason ka'a aro uamang'ba Tibet gitan Kristian toromko namnikjachim. Uarango donggipa manderang a'paloni re'bagipa gipin toromko skiprakna rake champengahachim. Sibotangbo uko chanchigija 1914 bilsio Sadhu Sundar Singh Nepal a'songo napaha. Adita salrangna kingking champengani aro ka'mikkenatanirangko man'ahaoba ua biapsaoni biapsaona wenjojoe llom minggipa biapona kingking skiprakna man'anguachim. Uaro sokani ruutgijan uni skiprakako dontongchina beng'ako man'aha. Dontongjaode uni kosako maiba ong'gen ine una tale uiataha.

Indiba uni skiparakaniko dontonggijako nike uko patoko chipna hukumko on'aha. Uni skiprakmitingo uko rim'aha aro ramram pa ok noko cha.ugiparang, mande so. otgiparang aro gipin namgijagipa manderang baksa dongchina chipataha. Ianoba ua Isolni gimin aganprakna cholko man'aha. Ua duk ong'gipa koedirangna mandeni ka.tongko dingtangatna man'gipa aro koedirangni janggimangnaba tomtomaniko ra'bana man'gipa Kristoni bilni gimin aganna a'bachengaha. Bang.an uni agana katarangko bebera'e Kristoko ra.chakaha. Indake ia dukni biap Sadhuna aro uko knatimgiparangna katchaani aro patianiko man'ani biapas ong'skaaha.

Koediskarangni ka'tongrangkoba Sadhu dingtangatenga ine sason ka'giparang knaahaon Sadhu Sunder Singhko patok nokoniko antidamona mande jinmani nikao sasti on'na ra'ongkatbaaha. Iano ba'rarangko kiktoko uko a'ao asongataha. Uni ja'a aro jakrangko bolplengni a'kolrango salkroke siksak il.engna man'gija salgimik walgimik cha'ani ringani gri donaha. Uni dukko bariatna gita bang'bea ru'atrangko

rim'chimbangbace uni mangglonggipa be'enrango galdapeaha. Unon uarang uni be.eno malp'prae uni an'chiko opna a'ba chengaha. Kal'stekgipa jinma uni indake duk chakengako chadengduule niengachim. Pilakba uni be.enni dukko komiatna gita chi mangmangkoba on'jachim. Ia duk chakanini gim n segipa mandena agane on'engon ua indake inachim "Maikai indake ong'aha angan uija; indiba angni ka'tongo kusi ong'an gapachim aro anga git ring'gija aro skiprakhgija dongan mar.jajok."

Walgimik ua indake duk chakange uni an.chirang ru'at chike komiroengchim. Pringo ua sina kraahaoba ua tangengpitichim. Uko duk on'gipa manderang Sadhuni mikkango tom'tomaniko nikahaon kengokaha aro ua maiba uamang'ni uigija bilko mang'gipa ong'a ine uichong'mote, uni ja.a jakrangko bolplengo sikrokako saloke jakgitel wataha Indake duk on'anirang uko inditan bligr'ataha, maikai ua uigija gitilaha. Aditani ja'manosa joton ka.taita e ua biaponi malbrake katangna amaha. Ia biapo mitam Sainasi Missionni manderang gngangchim aro ia ka'sachakgipa manderang Sadhu Sundar Singhko nokona rimange bilakkujana kingking uko simsake sanaha.

Garhwalni Srinagar songjinmaoba una ong.ronggi-jagipa obosta ong'aha. Ia biapo Kristoni gimin aganprakna kenbeani ong'a ine Sundar uiachim. Salsao ua songjinmani a. palo skiprakmiting'õ mitam panterang. songjinmani ning.o skiprake nibo, ine Sundarko chonniko ra.biaha. Indake ua ia ra'biako ra'chakna draatako man'aha. Songjinmani antidamona napange ua skiprakna a'bachengaha. Iako nikon chadenggiparangoni mitam ua songni skulni masterko rimbana skele re'angaha aro ua Sadhu baksa jegrike uko kratcha'atgen ine uamang ka.donge nisengsoengachim.

Master ua biapona sokeon jinmani nikao Sadhuni ku.siko uni jaksi ge'gniko donpenge ua indake aganaha, "An.-

OIDE

Oid

Oid

Oid

Oid

Oid

Oid

Oid

Oid

Oid

Oid

chin,  
ni be  
sakg  
nika  
bobi  
roar  
man  
ban  
ka.s  
Kri  
uan  
kan

mal  
ran  
aia  
ach  
ach  
ran  
ma  
tan  
der  
be  
do  
tar  
Ur

pi  
ch  
ch  
in  
ur  
ba

ching jongada on'ga aro nang'ni chanchichipa gita anga nag'ni bobil ong'ja ine mesokna anga iako dakaha, maina an'ching sakgnian Jisu Kristoan Jokatgipa on'ga ine bebera.a." Ia nikania jinmako rang'san aiao inmanatah aro ruutgijan pilak bobilrang katangtokaha. Ia namgipa master baksa agangrike roani Sundarna kusi ong'batsranggipa sal ong'achim. Ua mang'ni agangrikanio ua master gipinrangko seng'aona rimbanasa ia biapo ruute dongena ine uina man'aha. Isolni ka.sachakanichi ua sakchi'dok manderangni janggirangko Kristoona srik srik rimbana man'aha. Je salona Isol uko uano kam ka'atkuna nangnika ua salona kingking ua uno kamko ka.angkugen inesa Master Sundarna agaraha

Sadhu Sunder Singh aganprakna wenmitingo mikmalgijagipa aro ka'saninggijagipa manderangni dongram jolrangko re.na nangachim. Indakgipa biaprango ua bang.en aiao inmanpilgipa a'sel ong'anirangko re'grongna nangrongachim. Salsao ua Bhulerani dikbegipa burungko re'na nangachim. Ia biap cha'ugipa aro dokprete ra'giparangni dongram biap ong'achim. Ua mande sakbriko grongaha. Ua mang'on saksa ro'gipa kukkuriko saloke chabaaha. An'tangko jokatna chol ong'jae aro siani salsokaha ine bebera'e den'ako be'entango ra'chakna bangopaha. Ia ong'ronggija bewal ua mandeko jajaataha. Ua kukkurichi su'ani pal uo donga gimikko on'china bi.aha. Indake uni be'en gimikoniko tangkarangko am'aha, indiba mamungkoba man'jachim. Unon un gombolko ra'seke uko re'angchina watataha.

Signioniko jokatanina Isolko mitelbee ua re.angengpition chel'e re'angna skang uamang'oni saksa uko re'bapilchinn okamaha. Unoa ianpakode sichong'motgen ine chanchiedua re'bapilaha. Unon, "Na'a sawa aro maiko skienga ine uo sing'aha. "Anga saksa Kristian on'ga" ine Sunda una aganchakaha. Iako agane ua sastro Niam Gitalko mesok badale, "Man'e cha'gipa aro Lasarni" gimin uamang'n.

poraie on'aha. Ua mand gisik nange knatimaha. "Na'a maiko chanchienga" ine Sundar uo sing'on, "Ia man'e cha gipan gimin anga jajrengenga maina on'titi papni giminan ia kenbegipa sasti ong.ode una bate dal'batgipa paprangnade mai ong'sranggen, " ine ua aganchakaha.

Bakan Sadhu ia cholko ra'e, Isolni ka'sachakani gimin, una agane on.aha aro iako knaahaon ua mandeni ka.tong moaha. Ua uni dakgimit dal'dal'begipa papni kamrangni gimin grape aganengachim. Unon ua Sadhuko an'tangni rong'kolona rimange cha'anirangko tarie uarangko cha'china uko mol'molaha. Adita agangrikkuanu ja'mano uamang dikdiksa bi'e sakgnian tusiaha. Pringo ua mande Sadhuko de'mesae uko rong'kol ge'gipinona rimange, uno dandakgimin misilgipa mande grengrangko, una mesokaha. "Iarar angni paprang ong'a. Anggita mandena maiba ka'dongani dongpakugenma ?" ine ua grengrangko mesoke gam'bee grape aganaha. Sundar ia mandeni papni gimin be'gimit gisikni dukko nike una ka'sachakbeaha. Ua Kristoni sambao chisolodatkapa ma'gipa dokprete ra'gipani gimin aro maikaichisoloba ua kema ka'ako man'kuaha uarangni gimin una tale agane on.aha. Unon uamangja'sku dipane Isolo bi'ahaoa ua mande gisik pil'e grapaha. Unikoa uamang Lapchaona damsang re'angaha aro Sundar ia mandeko Missionaryrango donangaha. Ja'mano ua mande napolatoko man'aha. Gipin sakgitam uni ripengrangba uamang'ni namgija janggi tangani bewalrangko watgale namgip janggi tanganio tangna a'bachengaha. Indake ia sakbri papirangko gisik pil'atna Isol Sundar'ko jakkalah.

## OIDHAI IV

### TIBET

#### Tibet

Chumbi a'kawe Darjeelingni salgrochipak donga aro uan nitobatsranggipa biap ong'a. Tibetona ua a'kawe gitan rama dakanga.

Tibeto skang intalan napna man'ja indake ong'jachim. Ritcha chi'chet bilsirangona kingking Lhasaona re'angna abrirang aro chibimarangna agrede mamung chamgpena dongjachim. Jesuitrangaro Capuchinrang Lahasona re'ange uano ruuten dongaha, maina basakoba basakoba Tibetni Sorkari gipin a'songni manderangko uno dongna on'achim. 1325 bilsimango gipin a'songni manderang Tibetona re'angaha ine uina man'a. indiba Europeni manderangde 1661 bilsiosa Lhasaona re'ange dongeaha.

Bilsi ritchnimang ong'angaha, Europeni manderang da'ororona bate Asiani mitam biaprango kenmangija re'jojona man'achim. Skango Asiani manderang Europeni manderangko nknasa skachim, indiba daororode uamng'na kenasa kenskaaha. Bilsi ritchnasini bon'achibara Nepalirang Tibetko ambaahani gimin Tibetni manderang an'tangtangko dakchakchina Chinarangko okamaha. Indake uamang Gurkharangko bon'srang nasipile so'ottokaha. Ia salrang intalan Chinarang Tibetko sason ka'a gitan ong'pilani gimin ua a'songona gipin jatrangni napbaaniko beng'sranga gita ong'pilachim. Chinani bil Tibeto komiahaon Tibetni manderang Russiaona dolsa Missionko watataha, je mission torom ni biding ong'bata gita nika. Indake dakachi Russia Tibetni kosako adita bilko man'aha. Uamang'oni Buriat

Lamarang Russiaona porako skina re'angaha. Uamang'oni mongsonggipa dilgipa Dorjieff minggipa ong achim. Ia mande 1901 bilsio Russo-Tibetan Missionni dilgipa ong achim. Dorjieff aro uko ja'rikgiparangni miksongani ian je, pilak a'songni Buddhistrangko nangrimatna Dalai Lamani bilni ning'o ong'atna chanchiachim aro iako Russiani sipaini bilchi ong'atna man'gen ine ka'dongachim, maina skia man'gijagipa Lamarang, Russiaba Buddhist toromko ra'giparangni a'song ge'sa ong'a ine bebera'achim.

Tibet a'songona gipin a'songni manderang napna man'jani gimin Tibetni gimin tale uina man'ja. Ua chengoni soibho ong'gipa a'song ong'achim. Uamang chasong git-chamni bewalosa sorkariko chalaiachim. Montol dakanirangchi, jarianirangchi aro chi ritachi dosi dakgipa mandeko man'na bichal ka'rongachim. Mande gimik Tibeto Lak chigitam hajal sotchetmang (13,80,000) dongaia.

Lhasao Dalai Lamani nokko a'timbo dakgipa dal'gipa rong'brako rika. Uko Potala minga. Ua nokni guarerang ritcabea aro nokni kosako rikarangko sona aro gamchatgipa ro'ongrangchi ching'chet ching'chet nitoatachim. Uni ka'mao moilagipa Lhasa songjinma gnan. Buddhist toromo pilak janggi gnanngiparangko rongtala ine chanoba ia biapo mande so'otanirangan gapsranga.

Buddhist toroma jat gimikko ku'cholsan ong'ate rakkina namgipa chol ong'a. Nokdang ge'prakan Lamani dolna nokoni depante saksakode on'na nangachim. Ritciani ritcaba bilsio re'angaha, Tibet changsao gipin jatchi amako man'gen ine saksa Buddhist toromigipa agansoaha. Iani giminsa kengoke, toromko name rakkina sikgiparang gipin toromko skigiparangko raken champengaha, aro a'songon napnan on'srangjachim. Ia beng'aniko pe'e skiprakgipako uamang rim'na man'ode, chaktogijagipa dukrangko on'e uko so'ote galrongachim.

Sadhu Sunder Singh antangan Indiani salgrochipak atchigipa mande onge Himalaya a'bri-rangko uiahani gimin, indakgipa Kristoko uigijagipa manderangni dongramonasa ua re'angna nangnikskaaha. Jisu Kristoko tale uiahani gimin ua neng'batsranggipa kamko aro kengnibatsranggipa biapko antangna seoke ra'e Tibetona re'angna mangsongaha. Bilsi ritchasana baten Indiao Missionaryrang kam ka'aha aro hajalni hajal manderang Kristian onge jatangna aganprak-giparang ong'baskaaha. Uni agana gita, Indiao bang'bea aganprakgiparang gnang. Uni gimin ua Kristoko knana man'kugijagipa a'songrangona re'angna gisik nangskaaha.

Gipin a'songni Missionaryrangko Tibeto napna on'ja-chim aro Indiani manderangba unona altue re'angna man'jachim, maina uno namen sin'ako chakna nanga aro torom-tangna warachake bobil dakgiparangna namen kenna nanga-chim. Indiba Sadhu Sunder Singh antangni janggi tanga gimiko Jisuna duk chakna mangsongahani gimin mikkangchi ong-gnirangna kengija ua pante bi'sasan ong'aioba Tibetona re'chakataha.

Kristo, Isolni Depante angko watataha  
Andalgipa a'songrangona,  
Uni mata man'gipa jakrangni  
Ge'etachi.

### Sundar Tibeto:—I

t "Uamangni ja'arang an'chi ong'atna gongraka aro tom'omani ramako uamang re'ja." (Rom. 3.17)

"Ua janggitangko galpile Kristoni kamna siaona sepangaha." (Phil. 2.30)

Tibeto wenaniko sulsul see rakkianiko Sadhu Sunder Singh dakjaha. Uni gimin uni kamrang, duk chakanirang

aro ua kenbegnigipa a'songo chu'sokatanirang aro una ong'a a'selrangko uni agananichisa uina man'iaha.

1908 bilsio ua Tibetchi re'angchengaha aro ua somoio uni bilsio chi'skuan ong'srangkujachim. Ua Tibetni mande-rangni ku'sikko uijachim. Indake ua simajolo kam ka'enggipa Moravian Missionaryrangni dakchakaniko man'na joton ka'aha. Ia missionaryrang baksa Pu minggipa biapo antisa dongaha. Unikoa uamang an'tangtango kam ka'gipa sak-sako un baksa re'angpachina watataha. Tibetrang gipin ski-giparangko napna on'ja ine uiana agre Sadhu Sunder Singh uamang'ni gimin bange uijachim. Indiba ua Tibetona sok-angahaoa uamang'ni gimin bakbakan skie ra'aha.

Uni skiprakako namnikja ine ua bakan uiaha maina ua jechi re'angoba pilakan, mongsongde Lamarang, uko wara-chakrongachim. Ia manderanga dingtangmancha ka'tong-rakgiparang ong'achim aro uamang Sadhuko knatimna tom-bagiparangni mikkango ka'mikkenatanirangko dakrongachim. Indimangba ua mongsonggipa songjinma Tashigang minggi-paona a'sel nanga grian sokangaha, aro ua biapni Lamarangni skotonggipani an'tangko name ka'sae ra'chaksoako nikahaoa ua aiao inmanpilaha. Ia mandeni ning'o adita ritcha Lamarang ngangchim.

Ia Lama uko ka'sae rimchaksoasan ong'ajaha, indiba una cha'a ringani aro tua donganikoba on'soaha. Ua somoio sin-beengani imin ia ka'sae soka chakaniko ua namnikbeaha. Unbaksa Lama an'tangni manderangko Sadhuni aganprakako knatimchina okamchimongaha. Indake Sadhu Nama Katako aganprakna cholko man'aha.

Ia biapni re'ange ua songjinma ge'gipinona sokangaha. Ia songjinmani Lamaba Tashigangni Lamani ripeng ong-achim. Ianoba uko name rimchaksoahani gimin skiprakna cholko man'taiaha. Ua ia biapni re'ange bang'a songjinma



aro gittimrango skiprakjoljolangaha. Indiba ia biaprango skangona bate uko warachakbataha. Bang'a biapranon uko katangchina a'rikataha, aro katjaode maiba a'sel ong'gen ineba uko mikrakatachim. Indiba ua ka'mikkenatanirangna tang'pilgija kamko ka'angkuaha.

Salsao Rasar minggipa songjinmao uko skotongipa Lamona rim'bae uko ua a'songona nape Kristoko skiprakahani gimin bichal ka'aha. Unon uko dosio ga'akate ka'sanninggijagipa manderang uko so'otna rim'angaha. Uamang ia minggni cholrangchi mandeko so'otrongachim. Mingsa matchu bigil gittango mandeko sikchipe salrakao done sijana kingking duk on'a. Minggipin, chi grigipa chiakolo uko galsrue chiakol kumangko chabi tekchange uno sichina galchipe dona. Ia ja'mangipachi Sadhu Sundar Singhko so'otna mangsongaha.

So'otram biapona sokahaon uni ganding chindingko kikaha. Unikoa uko ka'sachaka gri chiakol ning'china galonatahani gimin uni jakrani jak saknaako man'aha. Iana skang bang'a manderang ia chiakolona galonako man'ahan gimin Sadhu mande grengrang aro soenggipa be'enrangni kosako ga'akeaha. Je cholchiba so'otbo iana batede nambatkugenchim. Jechiba uni jakrangko donatbo uchin ua soenggipa be'enrangko rim'manaiachim. Soani seenga una inditan chaktogijani ong'achim, maikai Jisu gita "Angko maina watgalaha," ine chrikna nangpilaha.

Salba walba una mamung dingtangja aro tusina manjachim. Cha'ani-ringani gri bang'a somoirangna uno dongaha. Indakgipa obostao Sundar ruute tangna man'java ine chanchiachim. Gitamgipa walo ua chrike Isolo-bi'engachim. Unochacha a'kolni kumango gam'engako knaaha. Saoba ua pindapaniko oengachim. Ua chabini gam'akoba knaaha aro ua pindapaniko salengako knaengachim. Unon chiakolni kumango buduko dingonafe uko ketket rim'china

aganatengakoba knaaha. Ua budu uni sambaona sokang  
 oa ua an'tango dongkuenggipa bil gimikchi ketket rim'ahaon  
 uko ia namgijagipa biaponiko namgipa balwako man'gipa  
 a'palona ka'sne saldobaaha.

Uko a'plona saldoman'ahaon ua pindapaniko donpile  
 chabiko tektaiaha. Ua niwilwaloba an'tangko jokatgipako  
 nikjajok. Uni jakpong saa dongjaha aro a'palni namgipa  
 balwako rang'sitna man'e janggi tangani cho'ko man pilaha.  
 Ia aiao iinmanpilgipa jokatanina Isolko mitelana agre mamu-  
 ngkoba dakna amjajok. Pring wal seng'ahaoa ua neng'bee  
 songjinmaona re'bapile adita salrangna alda noko neng-  
 takani ja'mano skiprakna a'bachengtaiaha. Manderang uni  
 skipraktaiengako nikon bang'en jikjakani ong'kataha aro iako  
 Lamaona bakbakan ra'angaha.

Sadhu da'oba rim'ako man'e Lamani bichal ka'ramona  
 rimbaako man'taiaha. Uko bichal ka'e maikai jokaha ine  
 uo sing'ahaon ua uamang'na aiao inmanpilgipa jokani gol-  
 poko agane on'aha. Lama namen ka'onangaha aro saoba  
 chabiko cha'ue ra'ange uko jokataha ine chanchie chabiko  
 am'oa an'tangni kang'kareoniko uko nike ua namen kenaha.  
 Unon ua Sundar Singhko unoni bakbak re'angchina ge'etaha,  
 jedakode uni bilagipa Isol una aro uni manderangna maiba  
 dal'bea namgijako ba dukko ra'abajawa.

Ia chubegipa Tibetni a'brirango balwa ta'ake balgipa  
 biapo songdonggiparang bang'ja aro je bang'gija manderang  
 gnanguamang'ba Sundarni skiprakanirangko ra'chakjachim.  
 Batesa uamang bang'a salrangon una cha'ani ringaniko on-  
 gija songoniko uko a'rikatsrangachim. Indake ua  
 bang'a duk aro a'rikanirangko chakchikaha. Bang'a sal-  
 rangon jeo gipin a'songni manderang re'rongbrejachim in-  
 dakgipa biaprango Sadhu wenjojoe skiprakaha. A'brirangni  
 chubegipa a'kimbrirangko nikahaon Isolni kamrangni gimin

ua gisik nange chanchirongaha aro pil'nipil ua Isolni ka' singipa ku'rangko knaaha.

### Sundar Tibeto—II

Dr. Fosdick uni 'Manhood of the Master' minggipa ki' tapo agana. "Jisu an'tangko bobil dakgipa manderangko grongahaon uamang'ko a'jak sokgija jokatani cholkosa daka, uamang'na bi'chaka, patia aro pilakkon gimaateba uamang'na namgniko am'a."

Ia apsan kamko Sadhu Sundar Singhni pilak daka kam-rango nikna man'achim aro Tibet a'songo uni wenjojoe Kristoni Nama Katako uno donggipa manderangna skiprakmitingo uni dakchakarangoba uko nikna man'gen. Changsao ua Tibeto sin'begipa balwa balmitingo songreangengachim. Ua somoio suurirang namen ga'akengachim. Ua aro uni re'rimgipa saksa Tibet mande sakgnian sin'a amjae uamang'ni re'enga biapona sokgijan sichanggenma ine jajrengbeengachim. Uamang tu'be gipa a'kongdaponasokeon mande saksani siaha gita gitile dongengako nikaha. Sundar ua mandeko namkalgipa biapona ba'tome donna uni ripengko ku'mongaha, indiba Tibet mande uko dakna jechakaha aro an'tangni jokani giminsa chanchie miksonga biapona bakbak soknasa nangnike ua saksan re'angjojolaiaha. Sadhu Sundar Singh ua sibokeng-gipa mandeko pakkreo gate uni jrimbegipa bojako ripee ka'sne ka'sne re'angaha. Uni kregani uni be'enko ding'ataha, aro uni be'enni ding'ara uni ripegipa mandeni be'enkoba ding'atskaaha Indagipa obostao ua chel'e re'angujaon uko gale katbagipa Tibet mandeko srapeaha Ua ro'ong gita chacha gitile sisrangahachim Sunder jenten uni mangsonge re'enggipa gitimona sokeaha Unomiting ua sibokgipa mandeba mik-rakbapilahachim Uamang sakgnian an'tangtangni janggiko siaoniko rakiahani gimin Isolko mitelaha "An'tangni janggiko jokatgipa uko gimaatgen, indiba angni a'sel an'tangni

janggiko gimaatgipa ukon jokatgen," ia skianiko Sundar  
Singh kamchi dake mesokaha.

Changgipino Sadhu ga'nanggijagipa rong'grimko ga-  
doangengachim. Ua damsia rong'kolona sokahaon ua mande  
saksani bi'engako nikeaha. Ua mande tusijana gita uni ro'gipa  
kniko rong'kolni nokkingo kaachim, aro indake ua  
mikronrangko mikchipe changprako on'tisa somoiko  
ra'e bi'na aro chanchina joton ka'engachim. Sundar ua rong-  
kolona napangaha aro maina indake duk chakenga ine uo  
sing'aha. Gipin maderang gita a'gilsaknirang-  
ko man'na chanchie ua an'tangni janggi tangani bang'bata  
salrangkon re'ataha indiba mikkangchi mai ong'gen una kenani  
gisik uni ka'tongo dongachim. Ia kenani uko a'gilsaknirang-  
ko watchina draataha aro ua chel'gipa biapona re'bae bi'achi  
aro chanchiachi an'tangni jajaenggipa gisikko chu'ongnikatna  
ma'na ka'dongachim indiba ua mamungkoba man'kuja ine ua  
aganaha. Unon Sadhu uni ra'bitgipa sastro Niam Gitalko  
badale "Angona re'babo anga nang'na neng'takaniko on'gen,"  
ingipa bakko poraie on'aha. Jisu Kristoona re'baanisan  
rama chong'mot ong'aia ine Sadhu una agane on'na a'bacheng-  
aha. Ua Sadhuni agana katarangko aiao inmane knatimeng-  
achim. Bon'chotao ua bilchroke indine chrikaha, "Da'o  
angni gisik tom'tomaha, angko uni sninggipa ong'ate uona  
dilbo." Ua bakbakan an'tangko napbolatchina Sadhuko  
mol'molahachim, indiba Sadhu uko sepanggipa Mission Centre-  
ona rimange Missionaryrangni simsakani ning'o nambata ski  
anirangko on'kuchina agane donangaha.

Sundar minggipinkoba aganaha. Ua song damsiaona  
re'angahaon manderang uni aganprakaniko namen bobil dake  
warachakahaoba maibakai uamang ripengrang ong'baskaaha.  
Ua salsao chubegipa a'briko maldoangengachim. Unon  
ua ga'soltape gitilaha aro uni gitilon ro'ong dotsa biaptangoni

tang'oke a'kongchi romromangaha. Ua ro'ong jeo ga'akea-  
chim ua biap tiktako dal'begipa chipu gram mangsa dong-  
engachim aro ro'ong ga'akjete ua rang'san siaha. Pante  
bi'sa saksa sambao matchu nirike ua ong'ako niengachim,  
aro ua uko Sadhuna aganna katangaha. Uni ja'mano ia ong-  
ako aganna ua pante songchi katangaha. Unon songni  
manderang iana inditan gisik nangaha aro Sadhuni dakako  
namnikbeaha, maina ia apsan chipuan ua songni adita bang'a  
manderangko sue siataha. Uni gimin ua rama gita pilakba  
re'na pa'jachim. Uamang Sadhuko an'tangtangni songona  
okamataha. Indake Sadhu Kristoni kasaani katarangko ua  
songni uigijagipa manderangna skiprakna namgipa cholko  
man'aha.

#### An'ch Ong'gipa Ja'arang :

Ua ga'nanggijagipa a'brini ro'ongrang Sundarni ja'arangko  
an'chi ong'ataha aro ua uko ba'rachi katipna asongengachim.  
Mande saksa ua apsan rama gita re'bae sadhuko aro uni ja-  
arangko nike ja'ara mai ong'a ine sing'aha. Indake uamang  
agangrikna a'bachengaha. Uamang ruute agangrikani ja-  
mano Sundar salanti chel'bea ramarangko re'e chisololo an'chi  
ong'e sichakgipa Jisuni gimin aganpraknasa wenjojoaha  
ine ua mande miksongako tale uiaha. Uamang sakgni gisiko  
nangbeen agangrikengachim, maina unbaksa agangrikenggipa,  
mandea jokatani cholko gisik nange am'enggipa ong'achim.  
Uni janggi jok'ni cholko am'anio uni uisokgijanirang aro  
jajaanirang bang'en dongachim, iarang pilakkon Sadhu una  
talatna joton ka'aha. "Nang'ni an'chi ong'enggipa ja'arangko  
nikon, nang'ko indake duk chakna amatgipa maiba bil gnang  
ine anga uina man'a," ine Tashi ja'mano una aganaha. Tashi  
Sundarko antang baksa dongkuchina mol'molani gimin ua  
uni hoko antisamang dongkue una skiaha aro salanti unbaksa  
bi'rongaha.

Tashi uko uni ripeng saksa Lamaona watataha Ua  
 Lamaba Kristian toromni gimin gisik nanggipa ong'achim. uni  
 Sadhu Sundar Singh Tashini nokona sokbataion, uni Kri-  
 stoko uie katchabeengako nikaaha. Uni katchaaniko chu-  
 soksrangatna, uko napbolatana agre mamungba dongjaha.  
 Uni gimin Sundar Singh ua biapko watna skang, Tashi aro uni  
 nokni ma'drang gimik sakskuko napbolatana. Tashi Lamani  
 Chief Secretary ong'ani gimin Kristian ong'anina sastiko man-  
 na nangjachim. Indiba Kristian toromko aganprakna aro  
 sakgipinko Kristian ong'atna man'jawa ine uko beng.aha.

#### Bebena So'ota Man'giparang.

Bebena so'ota man'giparangni an'chi Mondolini bitchri  
 ong'a.

"Ua an'chingna an'tang janggiko on'chakata aro an-  
 chingba jongadarangna janggitangtango on'chakna ranga."  
 I. Johan 3 :6. Bang'a manderang bebena so'otako man'aha.  
 Sundar Tibeto dongmitingo indake toromna so'ota man'gi-  
 parangoni mitamko nikaha. Uamang'oni saksa. Sundarni  
 atchiram biap Pathiala Stateni Kartar Singh ong'achim. Ia  
 pante Sikh toromko ra'gipa aro uni pagipa saksa man'e cha-  
 gipa Zamindar ong'achim. Kartarna agre uni ma'a paani  
 noko gipin depante dongjani gimin ia bi'sanasan ka'dong-  
 soengachim. Sundar aro Kartar sakgnian bi'samitingo maha  
 maha dake janggi. tanggiparang ong'achim. Kartarni ma'a  
 paa una nama leka porako on'e mikkangchi jangi tanganina  
 tarisoengachim. Una leka porako skiani bidingo toromni  
 gimin gisik nangatani dongjaoba ia bi'sani toromna gisik nang-  
 aniko a'gilsakni leka pora chu'ongnikatna man'jaha. Kar-  
 tar Kristian toromni gimin knae aditako uina a'bachengaha.  
 Bon'kamao ua Kristian toromko ning'tuen uiaha. Ua Bi-  
 bleko badita poraiachim inditan uni gisikni okkriako okkaatna  
 ama ine ua uibatoroaha; uni gimin ua bon'kamao Jisuko ja-  
 rikna mangsongsrangaha.

Kartarni Kristian ong'na mangsongsrangako uiahaon uni ma'drangrang namen duk ong'beaha. Uni ia gital miksongaoniko uko an'pilatna uamng joton ka'beahaoba ramram kamrangchi uko man'jajok ine nike, uni pagipa una nitobegipa me'trako bia ka'e on'na am'ahachim. Ua me'tra Kartarko Kristian ong'jachina aro an'tangko bia ka'china mol'molbeaha. Kartar ua me'trana ka'sachakahaoba an'tangko Kristona on'kangahani gimin ua me'trani mol'molani gita dakna jechakaha. Uni gimin ua me'tra uni obite ong'gnigipaona re'ba-pilaha aro uni pilak mol'molarang ong'gramaiaha ine aganeaha.

Rungtgian Kartar uni pagipani nokoniko a'rikatako man'aha. An'tangna nangarangko brepana tangkako man'na gita ua an'tangni pagipani noklorangni mitchinikgnigipa kamrangko ka'e dukko man'beahaoba ua an'tangni miksonganiko watgaljaha. Unikoa Kartar a'songtangni manderangna Kristian toromko anganprakna a'bachengaha aro wenroroe Pathiala Stateni songjinmarango aro gitimrango skiprakaha. Punjabni bang'a biaprango skiprakman'o Kartar andalbegipa a'song, Tibetona aro uni sepang jolo donggipa a'songrangona re'angaha.

Tibeto Budhist toromko ra'giparara ong'ani gimin Jisu Kristoni bimungmangmangko manganan manderang bilaken warachakaniko dakaha. Tibetni manderang uko ka'sae jakkalahama jakkalja aro uni skiprakaniko ra'chakahama ra'chakja iarangko mamung serikani dongja. Indiba Kartar ua biaponi re'pilna mamung chanchiani dongjaha gita nika. Maina uni siani ja'manosa uni kam aro saki on'ani biterangko nikaha.

Jisu an'tangni signiko uisoaha gitan Kartarba an'tangni signiko uisoaha. Kristian toromko aganprakaniko dontongchina uko beng'ahaoba dontongjahani gimin salsao uko Tsinghamni Lamani mikkangona rimbaha. Da'o uni jokani

chol dongjaha ine uiahaoba ua skiprakangkuaha. Uni gimin bon·kamao uko bichal ka·ramona rimange bichal ka·e uko so·otchina hukum on·aha. So·otram biapona rimangmiting-oba, ua Jisu Kristoosan jokataniko man·na amaia ine jinmana skiangkuaha.

Jensalo so·otram biapona sokaha unon uamang Kartarni ba·rarangko kiktoko uko matchu bigil gittango sikchipaha, aro ran·china salo ramaha. Uni sal gitangipao Kartar uni bon·kamani sal sokaha ine uie an·tangni jakrani jakko dik-diksamangmang watpachina mol·molaha. Unon uamang uni jakrani jakko watoa, an·tangni bil gimikchi krenge Kartar uni bon·kamgipa katarangko uni Sastroni bigilnini ning·o sea grigipa lekao see donangaha. Ua seani ian ong·achim :

“Ian Kristianni sina tuani palangma ?

Oe, indiba uni ong·ja, iano Sia an·tangan siaha.”

Uni ku·chiloni mamung chrikani ba ma·amani ku·rangba ong·katjachim, indiba atam ong·ahaoa, Kartar gam·bea ku·rangchi, “Gitel Jisu, angni janggiko ra·chakbo,” ine gam·bee agane ua siangaha.

Sadhu Sundar Singh Kartarni pagipa tangenga ine uie uni nokona re·ange uko am·eaha. Uni depanteni siako aro Kristoni una ka·sae simsakaniko aganahaon Kartarni pagipa gisik nange knatimaha. Unikoa, “Angaba bebea·a” ine ua budepani aganako knae Sundar Singh kusi ong·beaha.

Kartarni siako nigiparangni gisepo Tsianghamni Lamani Chief Secretaryba saksa ong·paachim. Ua Kartarni an·tangni sastro Niam Gitalo seako niengachim aro ja·mano ua uko poraina kolame ra·angaha. Ua Kartarni kamrang aro katarang gimikko gisik ra·e uni sastro Niam Gitalo poraiahaon, janggini katarangko ra·chakna uni ka·tong oako man·aha. Adita salrangna ua an·tangni gital bebera·aniko chanchiaha aro uni ka·tongo uarangko rongtalbate uirooangahaon, ua



jripjrip dongchana amjajok. Indake ua salsao uni nokgipa Lamana uni ka'tongko Jisuna on'manaha ine aganaha. Lama uko ka'onangbee na'aba sina nanggen ine aganaha, aro uko bichal ka'e Kartarna on'a gita dakgipa hukumko unaba on'aha. Je sastiko on'e Kartarko siatahachim, ua sasti manderangko kenatna chu'ongkuja ine nike. matchu bigilo kochipgimin be'enko wal'chaenggipa silchi su'protaha. Unikoa uko siningatna ske matchu bigilo kochipaoniko bikongkate, uni bnekgimin be'eno buduko kae, songjinmani sorokrango saljojoaha, aro uni jakskil aro ja'skilrango saknadapatna gita wa'arango petchoke su'prottokaha.

Indake songjinmani a'palo jaboldamo sichina galeaha. Indake dakmanoa uamang noktangtangchi re'angtokaha. Ua jaboldamo ruute siboke dongani ja'mano, da'nang, ua ka'sne ka'sne mikselbapilaha aro neng'edike malame re'bana man'aha. Uko siaha ine galbagiparang uni tangpilako nike gisiko kena napaha aro so'otna joton ka'taina ka'dongjaha. Maina uko tangpilatgipa bilakbatgipa Saoba gnang ine uamang beber'aha. Kartar an'tangan iarangko Sadhu Sundar Singhna aganahaon, Sadhu uni janggiko rakikue Kristoni katako aganprakna cholko on'anguahani gimin Isolko mitelaha. Sadhu Sundar Singh Tibeto dongmitingo iarang gita apsan ong'gipa gipin golporangko knarongahachim.

### **Sundar Singh Aro Kailasni Maharishi**

Changsao songbad kingsao indake seaha :

"A'gilsakni gimin, an'tangni gimin chanchigijagipa aro toromigipa Sundar Singh salsao Kristian sainasi Maharishiko Kailasho grongaha. Ua ia suuriarigipa Himalaya a'briodonge a'gilsakna bi chakengachim. Na'a a'gilsakna chingni dongnugipa dolni saksa Kailashni Maharishiko mesokaha,

Tibetni saliramchipak wenmitingo Sadhu Sundar Singh, an'tangtangni bon'kamgipa salrangko Isolni gimin chanchie

re'atna ia suuriarigipa a'brirango dongenggipa sainasirangko am'rongachim.

1912 bilsini ding'kario Sadhu Sundar Singh saksan Kailas a'bri jolko songreaha. Biap damsao ua suriarigipa rong'brakko re'angengachim. Sin'a aro neng'a amchakjae ua gitile sibokaha. Sibokaoni mikselpilahaoo ua an'tangko damsada'gipa rong'kolni ku'mango dongenga ine nikaha. Ua rong'kolni ning'o saksan Maharishi gisiko nangbee Isolo bi'engachim. Ia nikanian inditan nikronggijagipa ong'animin Sadhu Sundar Singh kengoke jadip changpilaha. Ia nikaniko ua rongtala nina joton ka'aha, aro ua nikanian saksan budepabegipa mandesa ong'achim, ine ua nikaha. Uni mangsonge am'enga gita ua Maharishiko niggakeaha. Uni be'eno kimil dikbeani gimin uko matburung gitasa nikaiachim. Sundar jadip changa nampilahaon ua unbaksa agangrikna a'bachengaha. Unon Maharishi bi'aoni nichaoe uni ching'gipa mikronrangchi Sadhuko nitate indake aganaha : "Hai, an'ching ja'sku dipane bi'na." Unon ua Kristianni bewal gita bi'e Jisuni bimungo machotataha. Iarang matchotoa Maharishi Greek ku'sikchi segipa Nama Katarangko Mati oidhai bongani mitam podrangko poraiaha.

Sundar Maharishini kursikonikon uni aiao inmangipajanggi tangani gimin aganako knaaha. Ua bang'a bilsirangana janggi tangaha ine aganaha. Ua Greek oikorchi segipa Bibleko poraiaha aro ua uko Francis X'avieroniko man'rikaha ine aganaha. Ua an'tangko Alexandriani Mahamadan nokdango atchiaha aro Mahamad Katchinikgipani ja'rikgipa ong'china dal'atako man'aha ine aganaha. Bilsin kolatchi ong'ahaoa ua an'tangko toromna on'kangsrange torom noko dongpaaha. Indiba ua badita Quranko poraiachim inditan ua kusi ong'rorojaha. Ia salrango uni gisikni duk ong'be'mitingo ua Indiaonj re'bagipa namgipa Kristian saksan Alexandria aganprakako knae uni ka'donga grigipa janggina

kusi ong'aniko man'aha. Ua torom nokoni ong'kate ua Kristian baksa aganprakna wenanirango ja'rikpaaha. Indake adita salrangni ja'mario gisikni dila gita aganprakna ua saksan re'oroaha.

Neng'bee kam ka'ani ja'mano ua Kristian mande, jeo Sadhu uko nikaaha, ua biapo janggi tanga dipet dongna re-baaha. Aro ua biapo dongmiting salrango ua a'brini burungni sam bolrangni gimin namen uiaha aro uarango cha'e janggi tangenga, ine ua Sadhuna aganengachim. Sadhuni Maharishiko grongani somoio namen sin'be'ngachim. Sadhu ua Kristianni on'a maiba bolni bijakko cha'ahaon uni be'en gimik ding'ako uiaha.

Ua Sadhu baksa toromni gimin ruuten agangrikaha. Sadhu bang'bea knaronggija katarango uni ku'sikoniko knaaha. Sadhu manderangna skiprakmiting toe aganna ua Kristianni agananirango jakkalrongachim. Ia Maharishiera sainasi doloni ong'achim. Uni Sadhuna agananirang inditan ong'ronggijagiparang ong'a, maikai ua aiao inmangipa gisikni nikanirango see rakiode Parape'a ki'tap kingsa gita ong'pilgenchim. Uni agangimin gisikni nikanirango uarang gita tiktak orto pe'jachina Sadhu poraigiparangko mikrakataha. Sundar ua Maharishiko chang gitam re'ange grongaha.

---

OIDHAI V.  
SUNDAR SINGH ARO SAINASI DOL

Sundar Singhko Kristian sadhu ong'china Isolni okamania  
Uni aiao inmangipa daksoani ong'achim. Kristianrangni  
gisepo uni chola ro'gipa gitchakmrangko gananian uni ski-  
prakaniko gisik nangatani ong'aha. Nama Katako agan-  
praktgiparang Sadhu Sundar Singh gita ong'tokna man'ode In  
diani Mondolirangko namattokna man'genchim. Kristian  
sakanti Sadhu gita an'tangko on'e aro ramram dake rakina  
nanga;maina Sadhu indake ong'anichi Kristian ong'gijagipa  
rang baksa nangrimna cholko man'achim.

1912 bilsini bon'achibara Sarnat (Budhani skichengani  
biap ) minggipa biapona re'angaha aro iano ua adita sainasi  
gita gangipa manderangko grongaha. Uamang baksa agan-  
grikanio, uamang'ba Kristianrangan ong'a ine Sadhu uina  
man'aha. Uamang an'tangtangko Dongnugipa Dol (Secret  
Organization ) mingachim aro uamang'ni dolo sak 24,000  
mang India' gimiko piprae dongengachim. Uamang'o dol  
gni gnanngchin, uaranga Ripengrang aro Aganpraktgiparang  
( Shishas and Swamis) ong'achim. Ripeng minggipa dolara  
ramram bebera'giparang ong'a. Uamanga ramram kam-  
rangko ka'e janggi tanggiparang ong'a. Aganpraktgiparangni  
dolo sak 700 mang gnanng. Uamang sainasirang gita gana  
china, aro uamang dormaha gri aganpraktgiparangni kamko ka'a aro  
Ripengrang minggipa dolni manderangko gilja ka'dilronga.

Uamang napbola aro Gitelni Meatamkoba mania.  
Ia Dongnue Bebera'gipa(Secret Believers) dolni manderangko  
Indiani bang'a bakrangon nikna man'a. Indakgipa ka'sa-

chakgipa manderangni dakchakachi, Sundar Singh changsao Nepal a'songo a'rikako man'ani somoio, sanako man'aha. Ia manderang tik ka'gimin gita pringwalo olakiram biaprango tom'ronga. Uamang'ni tom'ram biaprangko mite nokrang gita nika, indiba mamung bimang dakani ba noksarangba dongja.

Uamangni tom'ao Bibleko poraia, Biblieni katarangko talata aro Kristianrangni lekarangkoba suala. Salaramni bewalrangko uamang gisik nange ja'rika aro bi'mitingo tuchi-kope bi'a. Bebera'e bi'ringode gisikchi nikaniko nikna man'a ine uamang agana. Ia Dongnugipa Dolni (Secret Organisation sadhu aro sainasirang man'e cha'giparang, skia man'giparang aro chugipa gadango janggi tanggiparang ong'a. Uamang ia dolko rakina tangkarangko jaksrame on'achim. Uamang'ni bang'a gilja ka'anirangon Sadhu an'tangba dongpaaha, aro pil'nipil uko uamang'oni saksa ong'a ine uisretachim. Kristokc parake ra'chakchina ua uamang'ko mol'molahaoa, mikkangchi indake dakna miksonga gngang ine uamang aganchakaha.

Changsao Sundar Singh Ganges chibimani rikamo ski-prakmitingo, uko sainasi gitade namnika indiba uni agan-prakanikosa namnikja ine aganaha. Unikoa uamang, Hindu gita nkgipa saksa mingsinggipa skiprakgipako grongchina Sadu Sundar Singko aganaha. Ua skiprakgipara bang'a manderangni gisikko salna man'achim. Sal gitamna kingking, mande bang'beani gimin, Sundar uni sepangona re'angna man'jachim. Salsao ua uko sakgnisano grongna chol ong'aha, aro uaba Kristiansa ong'a ine Sadhu Sundar Singh uina man'aha. Ua skigipa uko gipake aganaha, "Jong, an'ching apsan kamkon ka'enga. "Na'a Kristian ong'ode maina Kristoko aganprakja?" ine Sundarni sing'ani gimin ua indake aganchakaha, "Biapko tarichenggija bitchriko satgipa gisik grigipa

gamgipa mandeko banoba nikama ? Anga skang knatim-  
giparangni gisiko toromni gamchataniko ma'siatchengna  
ska. Unikoa toromna okkria aro ringna skako uiahaoa anga  
uamang'na Kristoni Katakō aganpraka. Ia chibimani rikamo  
anga re'anggipa salrango sakchi'gni skia man'gipa Hindu  
manderango napbolataha." Unikoa ua antangni ra'bitgipa  
Bibleko Sadhuna mesokaha.

Oid

Oid

Oid

Oid

Oid

Oid

Oid

Oid

Oid

O

O

**OIDHAI VI**  
**SUNDAR SINGH INDIANI SALGIPENGO.**

**Indiani Salgipengo.**

“Anga uoniko jeko knaaha, uko a’gilsakna aganenga.”  
“(Johan 8 : 36 ).

“Jihovani ku’rangko manibo, anga nang’ko mol’mola indake nang’na namgen aro nang’ni janggi tanggen.” (Jer. 38 : 20 ).

Sadhu Sundar Singh bakroe re’na nanggniko uisojahani gimin, ua Tibetchi re’na skang 1918 bilsini a’bachengo Madrasona adita biaprangko nina re’angaha. Ua Madrasona sokangahaon, uko mingsinga pilakchin gipangahani gimin bang’a biapरणonan uko okamataha. Uni gimin ua Ceylonona, Burmanona, Malaya Chichangona, Chinaona aro Japanona kingking re’angna nangaha.

Kosako janapa biaprago dongmitingo, banoba banoba, hajalni hajal manderang uni skianiko knatimna uko ja’rikaha, aro ua uamang’na Kristoni gimin bilake saki on’aha. Uni skianiko knatimgiparangoni mitam, toromni bidingo ma’sibregijanirangko sing’na uona re’baaha. Unon ua uamang’na tale agane on’aha. College aro High School donggipa songjinmarangona, ua somoi man’a gita pringo ba atamo re’ange chatrorangna aganprakrongachim.

Sadhu an’tangko ja’rikchina sininggiparangko am’jaha. Indagipa kamko jako ra’nara uni janggi tangao Isolni okamchongmotako man’na nanga ine ua bebera’achim. Uni pilak ku’patianiranga gisik gnangani aro ja’rikna amani ong’achim. Ua me’chikmarangna ku’patianiko on’mitingo, uni namgipa ma’gipani toromtango (Hindu toromo) an’tangko

name dal'ataniko mesokani gita aganrongaha. "Kristian ong'gijagipa ma'gipa detanko toromo indake dal'atna man'ode na'simang Kristian ma'giparang detangtango maina Kristian toromo dal'atna man'jawa," ine ua aganrongachim. Sadhu pante chonengmitingo sastro Niam Gitalko namnikjae so'e galachim, indiba da'o ua uko namen gamchatnikaha. Uni gimin bi'sa intal Kristian ong'gipa manderangde Sadhuna bate uko gamchatnikbatna nangachim ine ua uamang'na aganahaon uamang'oni bang'an gisiko nangbeaha,

Indiani Salgipengo uni dongmitingo bang'a somoirangon mitam Hindurang uko grongna walo sriksrik re'barongachim. aro ua uamang baksa bang'a katarangko agangrikrongaha. Indake Sundar singh gipinrang tusimitingo bang'a kamrangko ka'aha. Uni skianiko knagipa manderangoniko, an'tangtangna bi'chakchina sea chitirangko ua man'sorongachim.

Hajalni hajal Kristianrang, Sadhu Sundar Singko nikachi, an'tangtango Isolni on'kange kam ka'giparango Isolni dal'a chu'sokatanirangko nikna man'achim. Jechi ua re'anga ua biapni manderang uko aro uni katarangko kusi ong'been ra'chakachim. Indiba ua an'tangni agangimin katarangni gimin ma' derangna talbate agane on'na uamang baksa ruute dongna man'jachim. Sadhu Sundar Singh, ua somoio donggiparangna Isolni watata mande ong'a ine bang'a manderangan bebera'achim. Maina ua Kristona an'tangko on'kange toromo janggi tanganiko manderangni mikkango mesokaha.

#### Sadhu Sundar Singh Kristianrangni Dal'gipa Tom'anio.

Uni Okamani :- "O panterang, na'simangni samtangtango badita manderangni janggirang gimaangenga, nibo. Uamang'ko jokatna na'simangni kam ong'jama ? Kristoni ka'donggipa sipairang ong'bo. Isolni ganding chindingko gane Satanni kamrangko bnekatbo, unon CHEANI na simangnin.



Isolna rasong ong'china. Isol na'simangko jokataha aro uamang'ko jokatna cholko on'aha. Na'simang da'on sim-sakjaode, mikkangchi na'simangna chol dongjanaba donga. Salrang bakbak re'baenga, jensalo na'simang toromna so'ota man'giparangko uamang'ni rasong chabeao nikgen; jerangan gipinrangko Kristoona rimbana uamang'ni gam aro janggi tangani gimikkon Kristona on'aha. Uamang Isolna kam ka'beaha. O an'ching ua salo kratcha'jaodechim."

—Sundar Singh.

Ia okamani Indiani Salgipeng gimikni pilak ka'tongrangko moataha, indiba Travancore aro Ceylonni tom'arango uni okamani katarang gisiko nangbatani ong'aha. Indake Sadhu Sundar Singh uni skiprakanichi ua jolo Kristianrangni dak-rongbaenggipa tom'anirangko nambatataha. Uni ua jolo dongmitingo mitam tom'anirang anti gimikgimik ong'achim aro manderang salprakprako bang'batroroe tom'aha. Anti gimikni salrango bang'a tom'anirangon Sadhu aganprakachim, indake manderang Sadhuni dongpaanichi bang'a patianiko man'aha. Travancoreo tom'anio mande bang'batahani gimin uan dal'batgipa tom'ani ong'achim.

Bilsa 1918 Februaryni bijatchimango Travancoreni salgro jolo Jakobite Syrian mondolini tom'ao Sadhu dongpaaha. Ia tom'ao mande sak 20,000 mang ong'achim aro ua tom'anio uamang kusi ong'bee salrangko re'ataha. Ua jani bon'achibara Sadhu ianoni re'ange Mar Thomas Syrian mondolini tom'aniona re'angskaaha. Iaba Travancoreni salgto jolon ong'achim. Ianoba manderang antisana kingking tom'aha. Bang'bata gilja ka'anirangon Sadhuni skiprakna a'bachengon, sal ding'beoba manderang tom'tom jripjrip asongaha.

Ia tom'anio Sadhu manderangko indake mikrakataha. Isol an'tangni katako aganprakchina Syrian Mondoliko

Indiani Salgipengo chasongni chasongona rakibaaha. Indiba Syrian Mondoli Isolni mangsonga gita chu'sokatjahani gimin uko chu'sokatchina gita Americani aro Englandni Missionary rangko ua okamskaaha.

Sadhu Syrian Mondolinasan ong'aigija ua sal intal Indiani Salgipengni gipin mondolirangnaba ia mikrakataniko uiataha.

### Ceylono :

"Na'a nang'ni nikarang aro knaanirangni gimin pilak manderangna Uni saki ong'gen." Wat. 22 : 15.

1918 bilsini May jaon Sadhu Indiani salgipeng jolo neng-bee wenanirangko dontongaha. Ua Indiani salgro saliramchipak re'bapilna skang, atchiram a'songtango wate Colombochi re'ange anti dok dongaha. Indiani salgipeng jolo ua jeje kamrangko ka'aha uandakgipa kamrangko unoba ka'aha aro una jeje obostarang ong'aha uandakgipa apsan obostarang unoba ong'aha. 'Pilak ma'malrangni Missionaryrang, pamongrang aro ramram manderang ia chichangni mangsonggipa songjinmarango skiprakna apsan nangrime kam ka'aha. Indake uamang'ni nangrime kam ka'anichi Sadhu mangsonganiko chu'sokatna cholko man'aha.

Mr. Wilson. Programme Committeeni Chairman indake aganaha; "Uni (Sadhuni) skianirangko knatimna manderang namen katchabeaha. Atamni 6 bajio skiani ong'genchimode, manderang salni 3 bajion tom'na a'bachengaha. Colombooni mail sotbri chel'gipa biaprangoni bang'bea maderang re'baaha, uamang'oni mitam Catholicrang aro Hindurangba bang'achim. Indake bang'bea manderang re'baahani gimin tom'ram biaprang chakjapilaha."

Ua chichangni dalgipa songjinma Jafna gisikni biding bebera-  
 ani gimin skibataha. Rev. G. G. Brown Sadhuni gimin indake  
 seachim : "Ua toromni gimin maiba ning'tugipa aro  
 d'ngtangmanchagipa uiani gnang. Anga Jaffna songjinmao  
 indagipa dal'gipa tom'aniko aro manderangni gisik nang-  
 aniko pangnaba nikkuja. Uni (Sadhuni) skianio mande-  
 rangko indita gisik nangatna man'aniara, Kristoko Indiani  
 manderangni janggi tangan aro chanchiani baksa nangrime  
 aganprakani gimin ong'a"

Sadhuni skianiko knatimna re'bachina pilak manderang-  
 nan uiataha. Unon bang'a Musalmanrang, Hindurang aro  
 Budhistrang re'batokaha. Uamang gisik nange knatimode  
 man'dapa gri re'angpiljawa ine uamang'ko ka'dongataha.  
 Tom'bagipa manderang Sadhuni skianina inditan gisik  
 nangaha, uni re'angani ja'manoba, school aro Collegen  
 skigiparangko aro pamong aro procharokrangko, uni skiani  
 rang gita dakchina didiate songbadrango seaha.

Ceylonni manderangoba Indiani manderango gita jat  
 سوالani donga ine ua uni gimin kenchakbea gnangsa agan-  
 achim, aro uni uianirang ramram ong'a ineba mesokjachim,  
 ba gipinrang uni bewalko ja'rikna nanga ineba mesokjachim.  
 Manderangko uni rim'ani chong'mot, Jaffna songjinmao  
 indagipa dal'gipa tom'aniko aro manderangni gisiko nang-  
 aniko pangnaba nikkuja. Uni skianio manderangko indita  
 gisiko nangatna man'aniara Kristoko Indiani janggi tangan  
 aro chanchiani baksa nangrime aganprakani gimin ong'achim.

Ceylonni manderangoba Indiani mande.ango gitan  
 jat سوالani donga ine ua nikaha. Ia jat سوالania manderang-  
 ni gisikni bidingo dal'rcroaniko champengani ong'engachim.

Sadhu Sunder Singh an'tangba dal'gipa aro rasongko man'gipa jatni mande ong'achim. Indiba Kristian ong'ahaon ua iarangko watgalaha, aro Jisu Kristoni chisolna gre mamung gipin rasong chaani dongja ine ua mesokaha.

Rangoonona sokangahaon bang'a tom'anirango uni Urduchi skianiko Englishona unikoa gipin .ku'sikona pe-skana mande sakgniko nangahani gimin uni mangsonge skianiko adita dingtangataha ine ua nikaha.

Oid

Oid

Oid

Oid

Oid

Oid

Oid

Oid

Oid

Oid

Oid

Anga

( G

Bom

groch

fluen

"Ia

jahan

on'al

U

Tago

ona

okam

S

bi na

nike

E

mand

dingt

gench

ku'sik

Engli

E

aganp

toron

joton

## OIDHAI VII SALARAMCHI RE'ANGKUANTI.

**Anga bebera'achi tanga.**

“Isolni depanteko bebera'ao anga janggi tanga.”

( Gal. 2 : 20. )

July jao Sadhu Indiaona re'bapile Saliramchi mikkange Bombayo Kristianrangni tom'aniona re'angaha. Unoni salgrochi Calcuttaena re'baaha. Uanona sokahaon ua influenza saaha. Uni saani gimin seanio ua indake janapaha, “Ia saanio salgipengo kam ka'mitingo neng'takna man'jahani gimin neng'takchina aro bi'china Isol angna cholko on'aha.

Uni saaoni nampilahaoa Bolpuroa Sir Robindra Nath Tagore baksa dikdiksaṅa dongna re'angaha. Ua Calcuttaona re'bapile Burma aro Strait Settlement a'songrangona okamako man'ahani gimin uchi re'na re'chakataha.

Sagalo Burmaona re'angmitingo ua indake seaha, “Anga bi na bang a somoirangko man'aha aro ong'telaigiparangko nike bang'a skianirangkoba man'aha.

Bang'a tom'anirangon uni Urduchi skianiko pe'skana mande sakgniko jakkalon uni mangsonge skiani chong'motko dingtangatenga ine ua uie Englishchi skina man'ode nambatgenchim ine chanchie ua saksan dongani somoirango English ku'sikko poraiaha aro jeo chol ong'a unon sakgipinrang baksa Englishchi aganna ranta ka'aha.

Rangoono aro gipin songjinmarangoba Arya Samajni aganprakgipa saksa uni skiprakani ja'man ja'man re'e Kristian toromni gimin matnange Sadhuni skianirangko bikpilatna joton ka'aha.

Indiba uni skiarangna manderang gisik nangjaha, aro bon'kamao ua bikpilatna man'jae dontongsrangaha.

Salgipeng Indiao aro Ceylono gitan ianoba una bang'a tom'anirango skichina uko donsoengachim. Bishop Lefroy-mi ua jolo wene Sadhuni gimin agansoanichi uamang uko name rimchaksona tarina cholko man'aha. Bishop tom'arangoni changsao tom'dilgipa ong'e Isolko mitelpilanina on'china tom'arangoni changsao Indian National Missionary Societyna tangkarangko on'pachina didiataha. Indake mitelpilani gilani ko dakaton Rs. 500/- ko neng'mangijan man'aha. Sadhu Sundar Singh tangka gri, dingtang dingtang jatrangni ku'sikko uigijagipa manderangko didiataha. Unon Sadhuni cha'na ringna nanganirangnasan ong'aigija, uni China aro Japanona re'angani korosrangnaba chu'ongge tangkako man'aha.

"Nang'ni janggina maiko cha'gen ba ringgen ba be'enna maiko gangen-chingen," ine Isolni aganania pangchake Sundar Singh Sadhu ong'e janggi tangaha. Uni pangchakani gitan Isol una bang'en patiaha. Indiaoni Burma, Mandalay, Perak, Singapore, China aro Japanona re'angna man'ania aizo inmanani ong'a. Uni pantemitingni salrango Kristian toromko ra'chakgijagipa Tibetona re'angmitingo jedake ua Isolo bebera'achim, ua apsan bebera'anio pangchake ua jolchi re'angaha. Ua an'tangni Isolna kusi ong'e bangipa mande ong'chongmotachim.

Bang'a jatrangni brine donggipa Rangcon songjinmao, Singaporeo aro Penango bang'bea manderang tom'aha. Ia biaprango Sadhu Chineserangko, Japaneserangko, Malay-anrangko Europeni manderangko aro bang'bea Indiani manderangkoba grongaha. Uni aganprakanirangko sakgni manderang pe'skaaha. Bang'a jatrangoni badinggiparang, sipaini dolrang aro Governmento kam ka'giparang Sadhu baksa asonge tom'anirangko mikkim chaatachim.

Kristian songbad dongja aro ua an'tangni kamrangko serongjani gimin uni kamrangko knaatna mamung chol dong-jachim. Indiba sokachakgiparangni aro ripengrangni chitirangoniko uni kamrangko adita uisona man'achim. Sadhu Mayamoonna re'angaha. Ua ka'singipa biap ong'ani gimin ua uko namnikachim. Ua nitogipa biapo ua adita a'songtangni mande Punjabirangko grongaha. Uamang Kristian ong'jaoba an'tangtang baksa cha'rimchina uko okamahani gimin ua namen kusi ong'beaha. Ua biapni Missionary saksa indake seaha.

"Ua manderangna jedake skiaha ua gitan ua janggi tange mesokna man'achim. Ua manderangni janggina seng'ako donangrongachim."Perakni Iphoni indakgipa katarangko knasoachim. "Sadhu chingna bi'na skiaha aro da'o chingni bi'ani bewal dingtangsrangaha. Anga Kristian ong'gijagipa aro mamung saloba Kristian ong'jawa ine krenggipa ong'oba Sadhu chingni noko donge ia panteni pilak uisretanirangko talatahaoa ua da'o napbolna ku'rachakengjok."

Bassino Hindurang aro Musolmanrangoni mitam dilgiparang una tom'anirangko dakna tarisoanio kam ka'paanirangna ua kusi ong'beaha. Penango ua St. George gilja noko Sikhrangna tom'aniko dake skiprakaha aro gilja noko chakjapile manderang tom'aha. Ia tom'ani matchotarmande saksa chadenge, Sikh torom nokona re'ange aganprakchina uko mol'molaha. Policeni dal'batgipa tom'a changsao dilgipa ong'aha. Ua skiprakaniko knatimchina gita kam ka'giparangko adha salna chuti wataha.

Sadhuni kamrang inditana chu'sokgipa ong'anichi uni gisikna ruraani sokbanaba gnanng ine mitam biaprango kenchakani dongpilachim. Indiba ia ruaanina Sadhu Sundar Singh an'tangan gipinni chanchiana bate gisik rakbatengachim.

1919 bilsini a·bachengao, Sadhuni kamrango dingtang ong'anirangko nikna man'achim. Ua China aro Japanona re'angna skang, Januaryni 29 gipa salo, ua Singaporeo dongmitingo English ku'sikko agangipa manderangni gisepo ong'achim. Uano Hindustanni ku'sikko saksaba pe'e onskana man'gipa dongjani gimin ua Englishko jakkalna draat-ako man'aha. Ia sal intal ua Englishchi aganna a·bachengaha. Gipin chel'gipa a'songrango maikai Sadhuni kamrang chu'sokgipa ong'gen indake una cholko on'china manderang Isolo bi'aha. Sadhuni Englishchi kenmangija aganengako nikon, uamang'ni bi'ako Isol knachakaha ine uamang uiaha.

Singaporeoni ua Chinaona re'angaha aro uano ua bang'gija salrangna dongaiahani gimin bang'a tom'anirangko dakna man'jaha. Maina ua Japanona bakbak re'angna nangnikaha. re'bapilon uano adita somoirangna dongna ku'rachake Japanona re'angaha. Jensalo ua ia a'songona sokeaha unon ua Japane-serang'i Englishchi aganako knae katchabeaha. Ua Isolko mitelaha, maina uko a'kitikona kingking aganprakna aiao inmanpile amataha.

**“Okangimin, Seokgimin aro Bebegipa :-**

“Aro unbaksagiparang okangimin aro segimin bebegiparangba amgen.” (Para. 17 : 14)

Japanona sokangahaon Sadhu Sundar Singh indake nikaha, chong'motan, Japanni manderang toromna gisik nangana bate a'gilsaknirangna chanchibatachim. Uamang tangkana mikboka, bil gnanggipa ong'na ska aro cholonni bidingo namjabeachim. Torom nokona re'anggiparangni gisepo olakigiparangna bate roaigiparang aro torom nokko mangmang nina re'anggiparangan bang'batachim.

Rev·Takaharu Takamatsu, Okasakini pamong, indake sea :-

“Saksa Japanese pante Third National College, Kyotoo chubatgipa classo poraienggipa, Sadhuni wenbana skang



angni nokona re'baachim. Ua Natural Scienceko poraieng-achim aro ua a'gilsakni biding uiani gita bebera'aiengipa ong'oba ua janggini seng'ako am'engachim. Ua Sadhuni skimitingo dongpajaoba Bible Classo angni Sadhuni gimin aganako knapaaha. Ua jrip jrip sko choknoke dongengachim. Ontisa salrangni ja'mano Collegechi re'angmitingo ua angko grongna angni nokko nappakbaaha. Uni jakrani jakko ba'rachi kagopachim. Walo ua Isolni bilko nikaha ine angna aganaha. Ua jumango rongtalbee nike rang'san mikrakbaaha. Uni pagipa jumango uni namnikgijagipa kamko dakdraatengachim. Ua tuaoni chakate uni pagipa jedake uko jumango draataha ua gitan mikrakoba uni gisik ning'o uko draatengachim. Ua gisikni draatako warachakna krengengachim indiba ua uko amjajok. Uni ja'mano uni gisik ka'tong gimiko katchabeahani gimin ua gam'e grapaha.

“Uko knae uni ripengrang mikrake mai ong'enga uko nina e'batokaha. Unon ia pante uamang'na inditan gisiko nangbee skiprakengachim ; maikai ua rake tableko dokjoljole skiani gimin uni jak kagopna nangpile saknaaha.

“Ua angna ia ong'anirangni gimin aganahaon Kristo uko okamenga aro ua uko knachake gipinrangna aganskana nanga ine anga una talataha. Uni ja'mano ia panteni gisik nange skiprakanichi uni ripengrangoni mitam Kristian ong'na gisik nangaha. Indiba Sadhu Sunder Singh Japano bang'gija salrangsan dongaiahaoba nama kamrangko chu'sokatna man'aha.”

Adita salrangni ja'mano Sadhu Sunder Singh Chinako nappake Indiaona re'bapilaha.

Sadhu Sunder Singh Indiaona sokbapile ding'kari a'bachengao Tibetona re'angna mangsongaha. Ding'kari a'bachenga somoi batangahani gimin unona bakbak re'chakatna man'na gita, Madrasoni Simlaona re'baaha ; maina Simlaoni Tibetona seng'sotgipa rama gnanngchim.

## OIDHAI-VIII

### TIBETO-WENANI-1919.

#### **Tibeto wenani :-**

Ianoni Sabathuona re'ange ua kuturi ge'sao dongeaha, je kuturio ua bilsu chi'brina skang bi'beani ja'man<sup>o</sup> Sadhuni gandingko ganna a'bachengaha aro Kristoko ja'rikna, aro jechi ua dila uchin re'na mikchetkangaha. Uanoni ua Kotgarhona re'angaha, aro uano ua ja'a mate adita jimani gimin uni Tibetona re'chakataniko ruutataha. Indiba ua Julyni brigipa tariko ua nampiltaie, uni ripengrangko wate re'chakataha. Indake ua suuri tin'kagipa chugipa biapona saksan re'angaha.

Ia ki'tapko segipani mol'molahani gimin Sadhu an'tangni re'anirangko see rakiaha. 1919 bilsio uni re'aniko serikani-rango indake sea gnang :-

"Julyni a'bachengao anga Kotgarhko wate Tibetni saks Kristian Thaniat minggipa baksa re'chakataha. Kotgarhoni Tibetni simaona mail 130 mang chel'engpitichim. Chinga Hirath, Rempur, Bushaher, Gaura, Sachan, Chaura, Tranda, Paunta, Hachar, Kotgaon, Karcha, aro Kemparam minggipa biaprango skiprake Yangpaona sokeaha. Yangpa Tibetni nikchenggipa ong'a. Ianoni mail 40 na kingking burung-rarachim aro banoba banoba mes nirikgiparangko uamangni mesrang baksa nikana agre ua jolo nok te'sakoba nikjachim. Ia a'bimanduo chinga walbonga waltuaha. Walsao chinga bol salakimo aro walgipino rong'kolo tuana. Unonide biap chubeani aro sin'beani gimin samsi dikja aro bol pang-saba dongangjajok. Niksoka dipetde a'bri aro a'timborangna agre mamungba dongjachim.

**A'brirango Sin'a**

"Chinga ft. 16,000 chugipa biapo bangbango tusiaha. Uano namen sin'beani gimin be'en gimikan goka ong'pila-chim. Walsao mikka jimbeani gimin chinga chata ning'osa walgimik asonge walko seng'ataha. Ia biapo bang'a manderang suurio siahani gimin ua kengnigipa biapba ong'achim.

"Julyni 15 tariko Hangpu La a'gitokona sokeaha. Iano chinga sakgitam manderangni manggisirangko nikaha. Iamang sin'dugaani gimin siachim. Ia chubegipa biapo chinga rang'sitna balwakon man'na neng'achim aro chinga sko aro ka'tong sapolachim. Indaken chinga ka'tongtang'angni cha-suakon knapilachim. Iano dal'dalbee suuri tin'kagiparango bang'a manderang siaha aro da'alona kingkingba uamang'ni manggisirangko nikkuja. Ia kenbegnigipa biaponi jokahani gimin Isoina rasong aro mitelani ong'china.

"Julyni 16 tariko chinga Tibetni Mudh minggipa gittim damsiona sokeaha. Ua gittimni skotonggipa mande chingko ka'sae rimchaksoaha. Ua walo ua saksa mongsonggipa Lamako ching baksa cha'pachina okamataha. Ua Hindustani ku'sikko uiachim aro chinga una skiaha. Ua gisiko nangbee aro katchae knatimaha. Indake ua gipinrangkoba knatimna cha'hpeng-jaha. Salgipino chinga Taling aro Sangnam songrangona re'angaha. Uanoni chinga Inamb, Kveling, Kuring aro Sal-ingona sokange, unoni Sideng, Sare, Koze zro Rangriko nap-pakjoljole biapantion skiprakangaha.

"Unoni chinga Koo Gunraona sokeaha; uano dal'gipa mite nok gnanng chim. Aro ua mite nokni nangchapgipa noko Lamarang sak 400 mang donga. Skotonggipa Lamade Lhassaoni Lama Tashichi watatako man'achim. Indake ia skotonggipa Lamara Lhassa baksa nangrima gnanng. Ia skotonggipa Lama baksa chinga salgni dongaha aro ua ching baksa toromni gimin agangrikna gisik nangbeaha.

**Chirango Kenanirang :-**

“Tibeto bang'a neng'anirang aro kenbegnirang gnang. Sorokrang dongja, chiringrang aro chibimarang bang'a aro uarangko bate re'na jal'anrang dongjachim. Chirang suuri gitan chikachim. Badiaba badiaba biaprango chi ta'ra'jaode chinga uarangko jrobate re'angna man'achim, indiba badiaba badiaba chi inditan ta'raka aro chiningoba dal'dalgipa ro'onrang dongani gimin chinga uarangko jrobatna man'achim. Salsao Morang chibimako jrobatna anga nalsachina jentensa sokangaha, chi namen chikbeani gimin angni be'en gimikan tin'kaa gita ong'pilaha. Anga Thaniat chibimao gitilaha aro changgitamna kingking chiningchina napsrimachim. Anga krengbeesa aro neng'beesa chiningoni ong'katbapilna man'aha. Ia chibimao bang'a manderang sripe siaha.

“Cha'aniko man'na amgijani minggipin neng'ani ong'a. Tibetni bang'bata biaprangon rokomsa mi gindeko jo'e cha'ana agre mamung gipin cha'aniko man'achim. Un baksa cha rokomsa makon aro kariko brine tarigiminko ringna man'a. Basakoba basakoba ia jo'gimin mi inditan namja. maikai gure ba gada:mangmangba uko cha'jawachim! Ia neng'beanirango mingsa ka'dimeaniba gnang, maina ia neng'aniranga Kristoni angna on'gimin chisol ong'a jechi bang'a manderangni janggirangko jokatna man'a. Angni a'sel Kristo salgiko wate an'tangni kosakona ia chisolko gataha, jedakode anga Indiaoni Tibetona manderangni janggirangko jokatna Jisuni ge'eta gita re'baode angna mamung rasong chaani dongja : indiba re'bajaode una dal'bea dai nangani ong'skagenchim, maina ian rongtalgipa ge'etani ong'achim.

**Bara Surao Pap Nanga :-**

“Tibetrangni nokrang namen chonchona aro rongtalja-srang. Uamang nokrangko ro'ong aro ad'ubek brine rikachim. Manderangni an'dil seengako chaktopiljachim. Lara ming-

gipa gittim damsao anga mande saksako nikaha. Ua mande moila gapsrangani gimin simpilachim. Angni chanchiao haida ua mande bilsa chi'bongamangnan aujaha gita nika. Mandarangni ba'arang kimil gipokko dakoba moilani giminan uarangko bigil gisimko daka gita nikipilachim, maina uamang mamung saloba ba'arangko su'achim. Kiwar songo chinga chiringo ba'ra su'achim aro pilakan chingko nina re'baaha. Chingni ba'ra su'ani gimin uamang namen aiao inmanaha. Lama dal'batgipa indake aganachim, "Paparangnasa ba'arangko su'ani nama indiba namgipa manderangnade namjabea."

"Ia wenanio neng'beanirangko grongahaoba gipin changrangona bate on'tisa komibatachim. Mitam biaprango Lamarang chingko name rimchaksoachim. Uamang kari nanggipa chako aro jo'gimin mi gindeko on'e cha'paachim. Salsao uamang angni kni roani gimin dingtogijako nika sakbri Lamarang mes kimailko rasotaniko ra'bae uchin angni kniko rasotaha.

### **Dokprete Ra'giprangna Kenanirang :-**

"Chinga Kiwaroni Chikanona re'ange Skite, Hause, Sasar aro Pangreonaba re'anguaha. Chinga uarango aganprakna nama cholrangko man'aha. Ia jolo mande dongram biaprang bang'jabeani gimin cha'ugipa aro dokprete ra'giparangna namen kenani ong'beachim. Saksa namgipa mande indake aganachim, "Ia jolko na'a slai ba tonual gride re'angna man'jawa; maina bang'a manderang ia jolo so'otako man'aha." Anga aganchakaha, "Ango gombol kingsa aro ia Bible, chong'motan Isolni tonual gnang aro janggini Gitel angbaksa donga. Ua Gitel angko jokatgen." Chinga ia kenbegnigipa biaprangko re'ange mande so'otgiparangna aganprakaha. Indake chinga Uni kamko ka'aha. Indiba chinga mamun ga'sel ba duk on'aniko man'jaha. Ia biapo mande so'otgiparangni den'sotgimin ja'kanda jakkanda dakgipa

manderang dongachim. Indiba ia biaprango Isol chingko kengnirangoniko jokataha. Unigimin Isolna mitelani ong-china.

**Tibetrangni Toromni Dakbewalrang :-**

“Tibetni manderang rongtalgijagiparang aro uigijagiparang ong’oba uamang toromni giminde gisik nanggiparang ong’achim. Mitam districtrango depante dejakrako nokdangko nirokchina done gipin depanterangde pilakan Lamarang aro kamalrang ong’tokna nangachim. Bang’a manderang lekarango aro bararango uamang’ni rongtalgipa kitaprangoniko seokgimin katarangko see uamang’ni nokrangni kosako nisanrang gita kadingdee songdoe donrongachim. Aroba uamang OM MANE PADME HUM ia rongtalgipa katarangko lekarango see pitolai silni chongipa tinrango chipe uarangko dontonggija wilwilata.

“Mitamrang uarangko chichi wilwilatgipa chakani kolrango sea, unon uarang dontonggija wilwila. Indake iarangko dakanichi uamang’ni dontonggija bi’aniko mesokani ong’achim aro iako dakachin uamang paponi kema ka’aniko aro patianiko man’a ine uamang bebera’achim.

“Isol chong’motni gimin uamang mamungkoba uija; indiba uamang’ni toromo uamang “Saksano Sakgitam” ko bebera’a. Uamang SANGI KUNCHEK, ba Budha Isol, Lama Kunchek ba kamal Isol aro Ghho Kunchek, ba Sastro Isol ine minga. Budhist torom Tibetona 629 A. D. mango Raja Shang Taing Sunganponi chasongo a’bachengaha aro 749 A. D. jolo Padma Samphave (toromna train ka’ani nok) a’bachengatgipa ia Lama Lhassani sepango monasteryko rike Lama ong’aniko a’bachengataha.

“1640 A. D. bilsio Mongoliani raja Gusari Khan Tibetko amaha. Ua Drepungni Monasteryni Lama dal’gipana Dalai bimungko on’aha. Indake ua skanggipa kamal-Raja aro

Dalai Lama ong'achim. Uni bimung Magwan Lobang ong'achim. Ua mandeo chuna skani aro a'song aro toromko ra'dime sason ka'na skani gisik dongani gimin ua an'tangko Tibetni mongsongbatgipa mite Chanrezing Avalokitesvara mande pil'e atchiaha ine an'tangko aganprakaha. Tibetni manderang mite mande pil'e atchigipani sason ka'ako man'na namnika gita nika, maina indake agananichi uamang'ko sason ka'na man'engachim. Indiba unæ bribatgipa aro chubatgipa. Troshini Shiphoni Lama baksa namnikgrikgija ong'jana gita Troshini Lamako Amitabhani mite mande pil'e atchigipa ong'a ine ua aganprakataha. Indake Dalai Lama an'tangko Avalokitesvarani mite mande pil'e atchigipa ine aro Tashini Lamako chubatgipa mite mande pil'e atchigipa ine aganprakaha. Indiba Tashini Lama il'longna man'gijagipa mite ong'ani gimin a'gilsakni kamrangko jakdangdikgija uni depante Avalokitesvara Dalai Lamanasa a'gilsakni sason ka'ani kamrangko on'na nangani ong'aha.

#### Tibetni Sainasirang (Hermits) :—

“Bang'a Tibetni Sainasirangni janggi tanganirang aiao inmanani ong'a. Uamang andalbegipa kuturio chipchange donga. Mitamrang bang'a jarangna, mitamrang bang'a bilsirangna aro mitamrang janggi tanga gimikna indake dongachim. Uamang mamung saloba a'palona ong'katgija aro salko nkgija an'tangtangko chipchange pangnan andalao a'ongge bi'ani chakako jakchi wilwilkame gopramo gita dongachim. Ia chongipa kuturio ge'sa chonbegipa kelki ba a'kol dongachim. Ugita manderang ia sainasirangna chanirangko on'atrongachim. Anga uamang baksa aganrikna joton ka'beoba cholko man'jachim, indiba anga sastroni mitam bakrangko see ua a'kol gita sikataha jedakode uamang basakoba a'palona ong'katode uarangko poraie uina man'gen.

“Ia mingasa skianiko anga uamang’oniko man’aha ; ia manderang an’tangtangni toromni kri Nirvanako man’na indita duk chakode indide sakanli Jisuni on’gimin chisol-tangko an’chingba Kristona ripee aro ka’sroke uni on’gimin kamko ka’e dukko chakna nangjawama ?

“Ia a’songo suurini aro sin’dugaani gimit bilsio chang-sasan rakari ong’aiachim. May jao bitchilko sate September jao biteko raachim. Mitambiaprango gomko aro gipin biaprango besualko ge’achim. Burungarigipa mitam biaprango bibalrang biaprangko nitoatachim, aro banoba banoba rasin burung aro bangsirangkoba nikna man’achim. Indiba uno donggipa manderangni cholon. bewal aro chanchianirangba namjabeani giminan aganna kracha’ani ong’pilachim.

#### Pil’nipil Songreani :—

“Chinga adita bang’a biaprangona re’angaha aro mande-rangna kam ka’aha. Rama gipin gita re’bapile Kyamo, Hal, Maling, Khurik, Sumling, Phiti aro Boldar minggipa biap-rang gita re’pakbaaha. Anga Kailas aro Rasalona saksan re’angna skachim, indiba ianpako angni Tibetona re’baani somoi ja’manchakaha. July 30 aro August 9 ni gisepo ua jolo suuri namen ritcheae pindapa aro bang’beachibimarang aro chiringrang gngangchim. Bang’a chibimarango suurini jal’-angrangsa indiba mitam chibimaruagođe jal’angrangan dong-jarang aro uarangko jrobatnaba namen kenbeani ong’achim. uni gimin anga uchina re’angna man’jaha. Re’baenggipa Aprilo Isol agna ia pilak biaprangona re’na cholko on’china. Anga September jaona iano dongkuode suuri on’beani gimin angni ramako champenggenchim aro October jaode Indiaonan snoknan amsrangjawahachim.

“Ianpako angni Tibetona re’anganio anga sal’prako mail chikungmang re’e gimik mail ritcheabongamangko songreaha. Angni sokanggipa biap damprakni gimin anga aganna sik-



genchim indiba gimikkko sena somoi dongja. Tibet chong-  
 moto aro sima sambajolo donggipa Kristianrang angni uia  
 dipet, Isolni ka'sachakachi name dongenga. Pante bi'sasabsa  
 Tsering songo dongachim. Ua Hindustani ku'sikko man-  
 bea aro ua Indiaona angbaksa re'bapana skachim, indiba uni  
 ma'gipa uko watatjaha. Ua gipin bilsio angbaksa re'bapana  
 man'gen ine anga ka'dongenga aro Jisuni gimin name skiako  
 man'ahaoa ua re'angpile Tibeto namgipa procharok ong'gen  
 ine anga bebera'a. Indake Isolni katani bitchriko, jekon anga  
 Isolni ka'sachakachi sate donbaaha, Uni namnika gita bang'en  
 bite nangnok ine anga bebera'a."

—Sundar Singh.

## OIDHAI IX

### CHOLONNI MITAM BAKRANGKO JANAPANI

#### Sundar Singhni Gisikni Ning'tuani (Mysticism)

Sadhu Sundar Singh gita dakgipa mandeni cholonko name sandie nina gisiko nangbeani aro skiako man'aniba ong'chongmota. A'gilsakna chanchiaigipamangba ugita mandeko a'gilsaknirangchi dingtangatna man'ja. Maina Sundar Singh uni gisik aro ka'tong gimikchi Isolko am'e nikaha aro uni katarangko manisrangna mangsongaha.

Indake Sadhu Sundar Singhko ning'tue chanchirakgipa ine chanachim. Sastro Niam Gitalo Kristoni janggi tang-aniko jekai mesokaha ugita ua ning'tue chanchie poraie niahani gimin ua Jisu gita pangnan janggi tangna man'aha. Ramram Kristianrang basakoba basakobasan Sundar gita dakpana man'aiachim.

Sadhu kangal onge bang'a biaprango re'roromitingo pilak kamrangan Isolni dakchakani donga ine bebera' chongmotachim. Gipinrang salantini nanganirangko man'ani ong'rongbewal onganisa ong'a ine chanchia indiba Sadhu uarangna Isolko mitelrongachim. Gisikni bilonge saknaaniko aro kusi ong'srangnikoba ua uiachim. Salgimik Gitlena kam ka'e, basakoba basakoba ua walgimik Isolo bi'achim. Isolo bi'e Sastro Niam Gitalko ning'tue chanchie poraian baksa gisikchi Kristomung nangrimna man'rongachim. Gimagimin janggirangko jokatna ske uni dontonggija kam ka'an baksa ua Jokatgipana ka'saaha aro Uko dal'nike olakiahani gimin uni ka'tongo tom'tomaniko man'achim. Uni gisikni janggi tangani a'gilsaknirangna

bate bebe ong'batachim. Ua Isolni sepang dongronggipa ong'ani gimin sa'grerangni una gisikni bidingo dakchakania ong'ronggijani ong'jachim. Janggi tangani, Siani aro uarangni nalsao mai ong'achim iarangni gimin ua jajaani dongjachim. Ua an'tangni aganako knatingiparangnaba iarangni gimin mamung jajaanikoba on'jachim, maina ua an'tangde uarangni gimin namedake chanchiaha aro gisiko chu'ongnikanikoba man'ahachim.

Sadhuni mitam aiao inmangipa kamrangko uni sok anгна skangan mitamrangko knasomanaha. Sadhuni aiao inmangipa kamrangko knasogipa manderangoni mitam uni kamrangko bebera'na anjaengachim, indiba mitam uarangko bebera'aha aro uoniko maiba chinko nikgen ine ka'dongaha. Jeba ong'bo sakantian uko nikmano aro uni skiprakaniko knaman'oa uni gisik gnange skianina aiao inmanachim.

A'sel nanganirangoniko an'tangko jokatanirangko agananirang pilakan Watatarangni aganani gitan ong'pilachim. Ia a'sel ong'anirangko agananirango pilakba uko jokatna man'jahaon Isol an'tangni jakko snile uko jokataha ine Sadhu Sunder Singh aganrongachim. An'ching uni aganako bebera'na nanggenchim maina Tibet aro Nepal ia a'songrango Isolni dakchakani gri Nama Katako aganprakna man'jawachim.

A'selrango ga'akahaon Sadhu maikai jokatako man'aha uarangko ka'mao mesokenga. Changsao Khantzi Nepalni gitimo ua aganprakengachim. Iano ua bang'en champengako man'aha. Songni manderang uko gombolo remerme songoniko ra'ongkate burungchi galeaha. Indiba re'pakangenggipa saksa a'gital mande uko jokataha. Salgipino ua ua apsan biapon aganpraktaiengachim ian ua songni mande rangko ka'onangbatataha maikai uamang uko rim'e, bolo ka komtote burungon donbaaha. Indake dongmitingo ua okkribeaha aro uni sambao chuao donggipa bolni biteko mikbokbee

nigitoengachim. Ua bolo kaa gnang tusingaha. Pringo ua mikrakoa uko kagipa budurangni ge'engako nikon ua aiao inmanbeaha. Ua bolni ja'pango tuengachim aro uni sambao adita biterang gnangchim. Uni duk chakara Kristoni a'sel ong'ani gimin ua Isolko mitelaha aro biterangko cha'aha. Unon ua Nama Katakoko skiprakna re'anguaha.

Changgipino Teri minggipa biapo dongmitingo ua mitam manderangko grongaha. Gipin songo Nama katako knana skenga ine ua biapni manderang una aganaha. Uamang'an una ramakoba tale aganataha. Uamang'ni aganata gita ua chibolarigipa biapko ruuten re'roroe niaha indiba ua songni ramako nikajok. Burunrang dikroroaha aro bon'chotao ua diltubegipa a'bimanduo brangaha aro bachinan re'genchim ua uko uijajok. Ua chiringona sokeoa nalsachide rama dongnaba donga ine ua chanchiengachim. Indiba ua chiona ong'onange nioa chi inditan ta'raka, uko batna man'chongmotjawa ine ua nikaha. Unon atam walna sepangbaengahachim aro uni gisiko ka'dongani gri ong'e duk ong'e chiring rikamo asongengachim. aro maikoba dake nina chol ong'genma ine chanchiengachim. Indake dongengmitingo ua maiba knaronggija gam'ako knajok. Andalbatrorobaengon uni gisiko kengokanirang nakatengachim; maina kenbegnigipa matburunrang biaptangtangani cha'aniko am'na ong'katbagen unon una kenani bang'batginok ine ua chanchiengchim.

Ua gisiko nangbee Isolo bi'aha aro chiringni nalsachiko niwatatengachim maina unon walangroroengahachim. Nalsachi ua mande saksako nikataha aro uni agana ku'rangko knaaha, "Anga nang'ko dakchakna re'baenga." Unon ua mandeni'chiona bilone jrobatbaengako niksoaha aro sokbae ua Sadhuko an'tangni janggilo gate ua chiring nalsachina jrodilangaha. Rikamona sokeon ua wal'timko nikahaoa uano sosigipa ba'rarangko angna a'bachengaha, indiba indake dakmitingo ua a'gital mande bachiba gimaaha. Indakgipa

chanchisokgijagipa obostarango uko jokatania Isolni kamko chanchichina Sadhuna cholko on'ani,ong'achim.

Aroba minggipinkoba iano agankuna kragen. Changsao Sadhu Kamyam minggipa biapo skiprakengachim. Uno una bobil dakgiparang bang'en ong'kataha. Salgimik cha'ani gri ua skiprakengachim aro pilakoba cha'aniko man'jachim. Indake neng'e, okkrie. ua an'tangko galchipgimin biapo ong'enga ine nikaha aro bakbakan walangengijokchim. Neng'bee aro duk ong'bee ua bol ja'pango tuon rang'san tusi-angaha. Waljatchimango saoba an'tangni be'enko dangdik-enga gita ua uiaha, chakate cha'china an'tangko ge'etako ua knaaha. Nigitoe nioa ua sakgni manderangko chi aro cha'aniko ra'e chadengengako nikaha. Uamang songni mitam una ka'sachakgipa manderang ong'akon ine chanchie uamang'ko miele ua cha'aha. Ua okkae cha'manoa una cha'aniko ra'bagiparang baksa agangrikna chanchie uamang china an'piloa ua biapo saksakoba nikjajok. Uamang maikai, bachi gimaaha uko aganna man'jajok. Indiba uni neng'bemitingo an'tangna cholrangko on'anina ua Isolko mitelaha.

Iarangna agreba Sadhu Sundar Singhna indakgipa ong'anirangko bang'en janapna man'kugenchim, indiba uarang pilakan Isolni Sadhuna dingtangmancha dakchakani ong'a ine uie Isolko mitelnasan nangaigenchim.

### Sadhuni Chisolna Ka'saani

Kristo baksa anga chisolo datkapako man'aha, (Galati 2.20.) "Indiba an'chingni Gitel Jisu Kristoni chisol ong'jaode, angni rasong chaa ong'jachina, uachin angna a'gilsakko aro a'gilsakna angko chisolo datkapaha." (Galati 6.14)

Sadhu Sundar Singhni pilak skiani ja'pangrang Kristoan ong'a chim. Kristoni chisolona pilak manderangko salbana uni skiani mongsonggipa miksongani ong'achim, maina uanon

n'tangba tom'tomaniko man'aha. Uni gimin ua gipinrangna isolni bilko bil gnange aganna man'achim. Uni aganronggipa ataranga pilakan an'tangni dake uigiminrangsa ong'rongachim. Anga ka'donge aganna man'a, jerangan chisolko-ripea ua hisol jokatgipani sepangona sokjana kingking uamang'ko peskagen."

Saksa Missionary chisolni gimin aganmitingö Mussalian saksa indake aganaha, "Na'a ia golpoko angna mesokaha ita Indiana mesokode Indja uko ra'chakgenchim." Ua Musssalmanni aganaha gita Sadhu Indiani manderangko iaha aro ringna sikenggipa janggirangna ua Jisuni giminsan kiahaha. Ua chisolni gimin Niam Gitalo gita skiachim aro n'tangni pilakkon watsranganichi aro duk chakanirangchi ni skianirangko mangrakbatatachim. Chisolko ripena aro ni Gitel gita ong'na Sadhuni sikbeani ong'achim. Ua autograph ki'tapo indake seachim :- "Inditana kingking seng'ao ngni kusi ong'ani dal'a; maikai duk minganti kusi ong'aniko a'bara.

Japanni Missionary saksa Sadhuko sing'e inaha, Da oba kango gitan na'a cha'ani gri aro dongchakani gri Indiao wenojoengpitima ? Ia sing'anina uni aganchakani uko gisikotangataha. "Ong'ja, da'o Indiao umang angko uiaha; anga ongjinma damsiona re'angode dal'gipa tom'chakanio angni ikiprakaniko knatimna hajalni hajalni manderang re'bachimonggenchim. Indiba chisolni rama indake ong'ja. Unade anga Tibetona re'angna nanggenchim."

Ua Trivandrumo uko namnikgipa manderang tom'baahaon ua inditan kusi ong'beengachim; maikai Jisuni ge'eta gita lakjaenga ine ua chanchiengachim. Haida ja'mano biapsaoni biapsaona bang'bea tom'anirangna ding'begipa biap-rango tom'on aro ringo songrena nangon aro matchu gari ba rail garirango walo songerena nangon, aro miksonga biapona soke bakan kamko a'bachengna nangon ua dingtang dake

chanchienganaba dongakon. Indiba iarangni gimin an'tangni ripengrangna aganon ua pangnan "Tan Isolni ska, " inesa aganrongaiachim.

Jensalo ua Salaramni Ilom patok noko donako man'e namgijagipa manderang baksa damsani dongmitingo uni sastro Niam Gitalni bigilni ningo lekao ua indake seachim.

Nepal-June 7. 1914

"Kristoni dongpaani, angni patok nokko salgi pi'ataha; indide iani ja'mano salgio maiko dakkugen ?"

Indake una skanggipa Paul aro Silasna gita uni patok nok Kristoko grongram biapsa ong'skaachim.

Kristoni jringjring dongpaako Sadhu inditan bebera'a. maikai ka'mao segipa a'sel una ong'on, uko aiao inmane nik jachim. Changsao Tibeto wenmitingo song damsani manderangni bobil dakani gimin napna man'jaenba ua rong'kolo dongaha. Ruutgijan ya songni manderangni ro'ong aro gol' dikrangko ra'bite an'tangona re'baengako niksoaha. Ua sina nangg nok ine chanchie bi'achi janggitangko Isolna pak-watengachim. Unona sepangahaoa manderang dongdikaha aro rang'san janggilchi bitine aganmitugrikna a'bachengaha. Unikoa re'bataie uamang Sadhuko inaha, "Nang'ni sambao ching'gipa gandingko gane chadenggipa aro bang'bea nang'ko dongduulenggi paranga sa warangsa ?" Unbaksa pilakba dongja ine ua aganchakaha. Indiba ia manderang kenbee rong'kolo chadengduulgipa dolko nikaha ine agantaitaiaha. Unon uamang Sadhuko an'tangmangni nokona mo'lmolerimbapilaha. Ua uamang baksa re'bapile Kristoni gimin uamang'na agane on'aha aro umang kene bebera'aha. Unon ua Isol an'tangni sa'grerangko watate uni gimagnioniko uko jokataha aro manderangna skiprakna cholko on'aha ine ua uiaha.

Changsao Sadhu indake seaha :-

Anga Isolko mitela maina anggita choligija mandeko panteon seaha, jedakode angni bilakmitingni salrango anga una dangdike on'na man'gen. Anga napbolako man'kujamitingo angna ramako mesokchina bi'aha aro ua jean Rama' Bebe aro janggiko angna mesokchong'motaha aro Sadhu ong'e Una dangdike on'china aro Uni Rongtalgipa Katako aganprakchina angna ramako mesokaha. Da'o anga okkriako' ringna skako' sin'ako' ding'ako, patoko donako, bilgriako a'rikarangko aro bang'a namgijarangko chakchikna nangahaoba anga uni Rongtalgipa Bimungna rasongko on'a aro Uni ka'saachi angni ka'tong pangnan kusi ong'a. Angni bilsichikungo uianirang gita anga jajrengman'gija aganna man'aje, jerangan chisolko ripea uamang'ko chisolana ripeskagen."

#### **Kristo Nama Katako Aganprakchina Watataha**

Kristo angko watataha... Nama Katako skiprakna. (I. Kor 1. 17) Anga Kristoni Nama Katako aganprakaha, oe, anga indake Nama Katako aganprakna joton ka'aha... jeon Kristoko aganprakkuja... maina sea gnan... jerangan uko agankuja, uamang nikgen aro knakugijagiparang uigen.... (Rom 15 19 21.)

Kristian ong'jaoba chanchininggipa manderangkode uamang'ni janggko Kristoni dabiani gimin chanchina gisik naata aro uamang'oni mitam Kristian ong'atako man'achim. Ua pangnan toaniko ba an'tangna on'gimin obostarangko ra' bae uni miksongani baksa nangrimate mesokrongachim. Kristian ong'gijagiparangna skiprakao, toromara jegrikani ong'ja, indiba an'tangni dake uigiminrangko dake mesokani san ong'na nanga ine ua aganrongaha. Uko knatimgiparang sakantian uni agana bebe ong'a ine uiachim. Jisu Kristona ka'sagiparang uni skianiko knae mangrakat'ko man'ronga aro simsakgijagiparang kamtangtangni gimin chanchitaina draatako man'rongachim.



Kristian ong'gijagiparangna skianio uamang'ni toromko matnange ba mamung namnikgijani katarangchi aganjachim. Indiba Jisu Kristo Isolni parape'ako man'kujana kingking ua ruute aro saknabee am'oba tom'tomani, kusi ong'ani aro chu'ongnikaniko man'gijakosa ua saki on'e aganbatachim. Jegrikachi ong'ja indiba paponiko piokna amgipa Isolni bilni gimin bilake saki on'na man'anichisa ua Kristian ong'gijagiparangko Kristoona salbana chanchiani uni bewal ong'achim.

Sadhu mongsongbatgipa uina nanganirangkosan skirong achim. Iarangni gimin ua mongsongbate skiaha. Isolni ka'saani gimin Kristoni siachi aro tangachi Isolni ka'saaniko saki on'ani gimin Jisuko ra'chakgipa sakaniko jokatna uni bon'changgijagipa bilni gimin. aro Jisu aro Jisuni chisolni gimin ua skirongbatachim. Iarangni gimin skianiko knägipa manderang Sadhu Sunder Singh Tanggipa Kristo gita ong'e ua iarangko skiaha ine bebera'achim.

## OIDHAI—X.

### A· GILSAKNA AGANPRAKA . . . I

“Na·simang a·kitikona kingking angni saki ong·gen.” Wat. 1:8

Pagipa Aro Degipa :—

Tibetoni re·bapilon Sadhu Panjab gita wenjoljolbae skiprak-baaha. Ludhianaona October 10 tariko soke ua Dr. Wherry ko gronge unbaksa agangrikaha, jean uni Kristian ong·chengani salrango uni kakketgipa ripeng ong·achim. Ua uni song Rampurko nape uni pagipa budepa baksa adita salrang,na dongpaaha. Ua songtangona sokbapilahaon mandera·e aro ka·sabee rimchaksoako man·aha. Ua bilsi chi·brina kingking Jisuna kam ka·e uni katarangko pagipana aganahaon uaba Jisuo bebera·ahani gimin Sadhu namen katchabeaha.

Sirdar Sher Singh, uni pagipa, Sundarni jakchi napbol,- atako man·na skachim, indiba uni kamara aganpraknasa, napbolatna ong·ja ine agane uni pagipani ska gita dakjajok. Ua bang·a gipin manderangko napbolatjaha.

Sundar Singhni pagipani nokko wate re·roromitingo noktangona aro toromtangona re·bapilchina mol·mole adita chitirangko pagipa seatachim, ua chitirangoni kingsao, Sirdar Sher Singh Sundarko bia ka·china ge·ete seaha. “Na·a maiko chanchia uko anga nang·o sing·na mangsongja, indiba na·a bakbak bia ka·na nanga ine anga nangko ge·eta. Nang·ni skionggipa Kristona bia ka·e kam ka·na man·jawama ?

Kristian torom ma'a paako manijachina skiama ?" Unikoa ua Sundarko kangal ong'ao janggi tangani gimin manenge aro Sundar uni ma'drangni ma'chongko ra'angode pilak gam-sengko unan on'pilna ku'rachake ua chitio seachim.

Uko okamania Sadhu chong'mot ong'e janggi tangchina, aro Sadhu ong'e janggi tangoa bia ka'na man'ja aro ua Kristian ong'ahaoa a'gilsakni gamko watgalsrangaha ine Sundar Pagipako mande ra'bee sechakaha. Aro indake sekuaha "Na'a gisik gnanggipa aro pilakkon dake uibagimin mande ong'a aro na'a an'tangna, nang'ni ska gita dakna man'a. Indiba anga an'tangde jensalo nanggriko rim'aha anga ni-piljawaha."

Sundar a'rikako aro watgalako bilsu ruutbee chakchik-mano aro dontonggija bi'mano pagipa aro degipa sakgnian Kristoo saksan ong'atako man'e Sadhu dal'bea katchaaniko man'skaaha. Indake ua salgipeng saliramchi re'angon uni pagipani nokko kusi ong'bee watangna man'aha.

### Englandona Re'anga.

1919 bilsini bon'achibara Sundar ripengrangoni bang-gija ua Englandchi re'na chanchienga ine knaaha, aro 1920-ni a'bachengao re'angchong'motgen ine ua uamang'na uiataha. Sirdar Sher Singh uni depante baksa nangrimpilaniko mesokani gita Europeona re'ani gimik korosna tangkako on'paaha, jedakode ua Kristoni bimungko saliramni jatrangna aganprakna skako chu'sokatna man'gen.

Tarisona somoi bang'jabeani gimin ua bang'a ripengrang-na an'tangni re'chakatgniko uiatna man'jachim. Unbak-saba Sadhu an'tangni re'aniko uiatsona nangnikjaha maina

uni ripengrangna uiatsoode uamang una maiba cholko dak-sogen ine ua uiachim. Indiba ua an'tangni ripengrangni una cholko dake on'aniko nangnikjachim; maina Isol uko uchi re'angatna namnikode ua una cholko on'gen ine ua bebera-achim.

Ua Indiako watna skang walsagipao watgrikani tom'aniko Bombayo dakatachim. Ia tom'anio dongpagiparangoni saksa indake aganaha ; "Ning'tua chanchiao janggi tanggi-pani chanchianirang ramramo janggi tangaigipa bang'a manderangna chanchisokgijanisan ong'pilala. Indiba uni aganako knagiparango mingsa baikamgipa uiani dongkama. Sadhu Kristoko mikkang chake nikaha, aro uni janggi tangao miksongani mingsasan ong'aia, uan Kristo ine bebeko am'gipa Sikh panteni golpoko knaon bang'gija manderangsan ka'tong mogija dongna man'aigenchim. "Da'o anga Kristoko uai-asan ong'aia indiba anga uko nikaha ine Sadhu aganrong-achim. Uni gisik nange bi'mitingni aro Krishnani pal Kristoko nikmitingo uni aiao inmangipa golpoko knagiparanga aiao inmangija dongna man'jachim.

City of Cairo minggipa jahaso 1920-ni Januaryni 16 tariko Sadhu Bombayko watangaha. Ramao ia jahas bang'gija bondorrongosan kapangaiachim. Robibar salo jahaso donggipa manderangna giljarangko ka'dilchina uko mol'molaha.

Februaryni 10 tariko ua Liverpoolona sokangoa uni ripengrang uko grongna re'baaha. Salgnini ja'mano ua Manchesteri Dr. Rendel Harisni nokona re'ange dongeaha.

#### Englandona Re'angani Miksongani.

Indiani manderang Englandchina re'angronga, indiba pilakan an'tangtangni nanganinasan re'angrongachim. Indiani gimin manderang indake aganronga ; "Indiara a'gil-

sak gimikni manderangni adhamangni toromo ma'gipa gita ong'a, aro a'gilsakni saliramni manderang Indiaona re'bae Jisuni gimin skiaha, da'o uamang Indiani Jisuni gimin skianiko knaskana sengoengachim. Indiba iana skang Sadhu gita Kristian toromni gimin uigipa Jisuni gimin skina Indiaoni mande saksaba a'gilsakni saliramni manderangona re'angkujachim. Indiao aro Englandoba Sadhu Sundar Singh a'songtangko wate skiprakna maina Englandonia re'angna nanga ine manderang sing'engachim. Indake (Press Representatives) Songbad segiparang uo uni miksongani gimin sing'on ua rongtale aganchakaha. "Walsao anga bi'mitingo anga Englandona skiprakchina watatako man'aha. Ia a'songo giseposa sal teng'suaioba anga ianona Jisuni gimin skiprakna re'bana man'ahani gimin anga kusi ong'enga aro katchaenga" Englandchi re'angani gnigipa a'sel, Englandni manderang Kristian toromo gisik ka'sinenga ine Indiani manderangni aganania bebe ong'ama ong'ja ukoba Sadhu mikrontangchi nikna skaniba g'ngangchim. Sadhu Englandni manderang a'gilsaknirangko bang'e man'na skè toromna gisik nanganide bang'ja gita nikoba, Jensalo ua uamang'ni nokdangrangko nape nion uamang toromnaba gisik nangchong'motenga ine nikaha.

England Sadhuna maiko dakaha iako uina skanina bate Sadhu Englandni manderangna maiko dakaha uko uina nang batgipa ong'achim. Iarangni gimin uina Sadhu skanggipa antirango mai maiko dakaha uarangko name niode nikhen.

#### Quakerrang Baksa :—

Ripengrangni Nangrimgrikani ine minggipa dol uko okamahani gimin Sally Oakni Friend Missionary Training Collegeona re'ange ua Collegen Principal Mr. Hoylandni

noko dongpaha. Ua English katarangko bang'e uipajani gimin suk ong'jachim, indiba changsao ua skiprakmitingo iani gimin chanchigijan aganaha. Mr. Hoyland indake aganachim :- "Ua skang intalan Englishko agangipa mande gitan ta rake aganna man'aha. Uni Englishchi aganna man'ania ong'telaigipa gisikni bilchisan ong'achim.

Uni bi'ani gimin skianiko manderang rongtalen uina man'aha, aro uni jokatanini gimin skiano jajaenggipa chatro saksani gisikna dakchakbeani ong'aha ine aganachim. Principal Hoylandni Sadhuni gimin aganani mingsako iano sena aro uko gisik ra'atna kraani ong'chongmota. Ua indake aganachim ; Ua jatni gimin sandigijagipasan ong'aigija ma'malrangni giminba sandigijagipa ong'a. Sadhu Jicu gita pilak ma'malrangni jegrikaniko namnikgijagipa ong'achim. Kristian ong'anio ma'mal dongna nangja ine uni skianichi Englandni manderangai gisik dingtang ong'bagen ine ka'dongani gnanng.

#### **Cowly Fatherrang Baksa :—**

Englandona re'chakatna skang Sadhu Poonao Cowly Fatherrangko grongaha. Uamang ka'sachakgiparang ong'achim : uamang Sadhuko recommend ka'e, aro uni Englandona re'angna miksonganiko namnikpaaniko Oxfordni Dal'gipa Fatherna (Father Superior) see uiataha. Unigimin Sadhu Birminghamoni Oxfordona re'ange Cowly Fatherrang baksa dongeaha. Indake ua Oxford aro Londonoba uamang'ni sokgipa ong'achim. Oxfordo ua St. John Evangelist gilja noko skiprakaha. Aro mingsingbegipa Bellol collegeoba aganprakaha. Ua biapo skimitingo bang'a chatrorang dong'achim.

Lodono dongmitingo ua Westminster, St. Mathew, Fleet Street, aro Bride gilja nokrango skiprakaha. Londonni songbadrango uni kamrangko see aro photokoba mesoke gat'atachim. Bride gilja noko knatimgiparangoni Saksa indake aganachim :—"Isol ia mandekó an'tangni miksonganiko chusokatna dingtangmancha tariaha. Salaramoni Saliramona re'bae sikprakani ian skanggipa chang ong'akon". Skiprakmitingo pilakan tom'tome knatimaha áro matchotahaa bang'bata manderang ja'sku dipane bi'aha.

Westminster Gazette, Londonni mongsonggipa songbado indake seachim, "Sadhu Sundar Singh jean Englando Kristian toromni gimin aganprakna re'baaha, ua pilak gipinrangna bate Jisu gita nikbata. Iako aganon Jisuko mandera'gijanide ong'ja.

#### Bishoprang Baksa :—

Marchni 9 tariko Sadhu Canterburyni Archbishopko gronge unbaksa agangrikaha aro salgipino Westminster gilja noko skiprakaha. Uno Church of Englandni sak ritichasai toromni kamko ka'giparang, Canterburyni Archbishop aro gipin sardok bishoprangba tom'paaha.

Marchni 12 tarikni 'Church Times' minggipa songbado ia tom'anigimin indake seachim. "Manderang tom'baahaon Sadhu Sundar Singh napbaaha. Uni skiprakania mongsongbatgipa nanganirangko aganprakanianong'achim. Uni skiprakanio Sadhu indake aganaha, "Jisu Kristoko saki on'na manderangnasa cholko on'aha. Sa'grerang bebeko parape'na man'a aro pilak donuanirangko mesokna man'a indiba uamang saki on'pana man'ja. Mandean Isolni ka'saako an'tangan uie mandeskarangna saki on'na bil gnang. Indake sa'gre gisikm nanganirangko Corneliusna aganaha indiba Pitorsa una sakiko on'eana."

### Dingtang Dingtang Biaprango Kam Ka'anirang

Londononi Franceona re'ange Paris Evangelical Missionary Societyni tom'anio aganprakaha. Unoni Londonona re'bapile, Aprilni 1 tariko ua Westminster gilja noko skiaha. Ia giljao tom'dilgipa Sadhuni gimin indake aganaha :-"Anga angni sambao asongenggipa saksa Indiani Kristianko ia singhasono asongatna dingtangmancha rasong chaa, jean Kristianni kamo patianiko man'aha.

Sadhu Londononi Irelandonaba batangaha aro bang'a tom'anirango dongpae skiprakaha. Unoni Scotlandona re'ange ua Edinburgh aro Glasgow Presbyterian mondolio dal'giparangna aganprakaha.

Sadhuni Scotlando dongpaani gimin Dr. Maclean indake aganaha, Chasongoni chasongona Kristian toromni gimaa aro tangpila dakaniko historyoniko nikna man'a. Cyprian, Tertullian aro Augustineni mondolirang pilakan gimatokaha. Mitam gilja nokrangko sipairangni dongram ong'atskaaha. Indiba Kristian torom an'tangde gimagijagipa ong'a. Basakoba changsao ia torom Salaramoni Saliramona re'bana nangskaani ong'naba donga. Haida Sadhuan uko ra'bagiparangni skanggipa ong'akon.

### Americao

Dr. Jowett aro gipin manderangba Americani manderangna Sadhu Sunder Singhni uchina re'angnasiani gimin uiataha. Sadhuni sokangna skang uamang una mamung chu'soke tarisoaniko dakna man'jahachim. Pond Luceum Bureau United States gimiko uni re'anirangna name tarisona ku'rachakaha. Uamang manderangna uiatsona gita aganprakaniko



chapa ka'aha indiba ia pilakan maiba man'dapanina dakanisan ong'a ine Sadhu uiahaoa uamang'ni daksogimin programmeko ja'rikna jechakaha. Uni gimin National Bible Institutesa jagnimangna, una nanga gita programmeko tariskaaha.

Mayni 30 tariko Sadhu New Yorkni Union Theological Seminaryo dongachim. Uni ja'mano Hartford, Baltimore, Pittson, Princeton University, Brank Presbyterian Church, New York, Marble Collegiate Church Brooklyn, Philadelphia, Boston aro gipin songjinmarango kam ka'aha. Juneni 25 tariko ua Silver Bay Studehts Conferenceona re'angaha aro ua biapo sak ritchachet chatrorangna aro dilgiparangna aganprake uno salbri dongaha. Julyni a'bachengachibara ua Chicago, Iowa, Kansas aro gipin biaprangona re'ange bon'kamao San Fransiscoona re'angaha. Ianon uni Americao kam ka'anirang bon'aha. Tibetona Kristoni katarangko ra'angna an'tangtango on'kanggipa Sadhuni uigipa pante-rangna dakchakatna gita mitam ripengrang tangkarangko gilaha.

Sadhu Americao dongmitingo mongsonggipa toromo dilgiparangko grongaha aro uamang'oni Dr. Robert Speer aro Dr. Fostick ong'achim. Skang salranggo Sadhuni ripeng aro Sadhuska Mr. Stokesni ma'gipani noko changsa una al-aniko dakataha.

Englando gitan songbadrango uni kamrangko seatachim, mongsongde Americani man'e cha'ani gimin, maha maha dake janggi tangani gimin aro a'gilsakni gita janggi tangani gimin uni agangrikanirangko songbadrango see gatatachim. New York Evening News minggipa songbado indake seaha; "Ia changrogipa pante a'gilsakni Kristian toromni gimin aganprakna Indiaoni re'baaha. Uko kusi ong'kamaigipa, bil

gnanggipa, aro gisik gnangan gapgipa gita nika. Uko Kristoni mikkangko noksarango dakgipa gita nika ine agantoka aro indaken ong'bebea.

Kristoni bon'changgijagipa bil aro kusi ong'ani aro ua Hindu toromoni Kristoona maikai an'pilbaaha aro gisikni tom'tomaniko man'aha, uarangni gimin saki on'na ua Indiaoni re'bara. Bang'a chasongrangona Kristoni bilni gimin aganprakna manderang Americaoni re'ongkatahaoba ua apsanko aganprakna Americaona re'bana uni gisik ong'ronggijani gita nikjachim. Kristianrang an'tangtangni uigiminko, kusi ong'aniko aro pilakkon aganskana nanga. Ma'malrang dakna nangani dongja ine Sadhu chanchia. Isol saksasan, maina bang'bea ma'malrang dongna nanga ? Tom'tomani nangrimani Kristoko uiaoni ong'baa. Indiba a'gilsaksa dang : Ma'malrang dongjahaon a'gilsak ong'jawaha, uan salgisa ine ua aganaha.

Hartford Theological Seminaryni Mr Frank Buchman Sadhu baksa wenpae uni gimin indake seahachim, "Americani nikbagimin manderangna bate ua Kristoona sepangbata." Mongsonggipa songbadrango Sadhuni gimin bang'en seachim. Uko cinemarangoba mesokachim. Ua songjinmarangni dal'dalgipa mongsonggipa manderangko gronggrikna man'aha.

Bang'a manderang uni katako knatimna matchotgijan re'baani gimin ua cha'naba somoi dongpiljachim. Anga saksa Head mistressni chitiko man'soaha. Ua chitio indake aganaha, Sadhuni tom'dilaoni ong'katon bi'sa sakantini mikkangko kusi ong'ani chinko nikna man'achim.

San Franciscooni Australiaona re'angmitingo Sadhu Honoluluko nappakanggen ine Honoluluo songdonggipa manderangna uiatsoaha. July 30 tariko ua Australiaona re'na Americako wataha.

**Australiao :—**

Jahas Honoluluo salsa saldongaiachim. Uano uni skiako knatimna Hawiianrang, Chineserang, Japanesarang, Englishrang aro Americanrang sak ritchabrimang tom'aha. Augustini 30 tariko ua Sidney bondoro gakate antisa dongmitingo gilja nokraŋgo, mondolirango aro Universityni nokrango tom'anirango dakdilaha.

Pertho jahasoniko Sadhuko drae rimbae an'tangtango waltuataha. Cathedral aro Victoria Hallo, Perthni Bishopni tom'dilarango bang'bea manderang tom'paachim. Jinmako chakgopna gita dal'gipa nokko man'jani gimin changgni tom'anirango dakna nangpilaha. Ua Indiaona re'bapilna Fremantleko watbamitingo indake aganachim. "Australiao anga jechi re'angoba kusi ong'bee rimchaksoako man'aha. Pilak ma'malni Kristianrang angna ka'sabee dakaha aro nangrime tom'anirangkoba dakaha. Anga uamang'ni kamrangni gimin rongtale sena nangachim indiba angna somoi dongsrang jachim; maina anga pangnan gilja ka'dilchina ge'etako man'rongachim. Pilak jahasni officerrangan angmung nangrimbea."

Ua Colomboko napakbae tom'a changsao aganprakbaaha. Uno uamang an'tangtangni nangbegipa kamko janape uko dongkuchina mol'molon ua jechakna nangaha. September 25 tariko ua Bombayona sokepilaha.

**Indiao Neng'taka.**

Ua Bombayona sokon pilak biapoba aganprakaniko dakgija tom'anirango dongpagija neng'take tom'tom chanchina aro bi'na Sabathuona re'angaha.

Sin'kario, wentaina skang uni neng'takmiting somoio ua king 200-na bate chitirango seaha. Neng'takani ja'mano ua songjinmarango, gittimrango aro gipin tom'anirango skiprakani kamko dakkuaaha, mongsongde United Provinceo, Chota Nagpuro, Bengal aro Punjabo.

1921, ni May jao Sadhu Sundar Singh Khandesho Kristianrangni dal'gipa tom'aniona skiprakna re'angaha. Unoni joljol ua Tibetchina re'angaha.

### TIBET-1921.

Sadhu uni kamrangni gimin uni Tibetoni re'bapilani bakan seaha. Uni ia ki'tapko segipana chitio ua indake seataha. "Chinga Tibetona Simla aro Sabathu gita Kotgarhoni May jao re'chakataha. Kotgarhoni Tibetni simaona mill 150 mang ong'a. Kuluo chinga Nama Katako skiprakna nam-gip cholrangko man'achim aro rama joljol songo donggipa manderangna aro songregiparangnaba Sastroni bakrangko bang'en suaana man'aha.

#### Ding'gipa Chimikrang :-

Kulu districto bang'a ding'gipa chimikrang donga. Uarangoni mitam autobea indiba mitamrang agre ding'a, maikai chiring chichapilnasia gitan ding'achim. Basakoba, basakoba, songregiparang merongko ba'rao ka'tome minute chibongamangna dim'sime donon mi minachim. Changsao bisa saksa uano ga'aksrue dikdiksani ja'manon siaha.

#### Kengnigipa Batsotanimrang :-

Simlaoni mail ritchasa sotland chel'ao Rotang minggipa a'gitok damsang nang aro ua foot 14,000 mang chua. Ian ken-

begnigipa a'gitok ong'a. Songregiparang uko May jana skang batsotrongja. Ia sorokko bilsio jasnina kingking re'na man'ja, maina'ua jarango suurian dongkamaiachim. Salni 12 bajini ja'mano salantian ta'arakbegipa balwa balronga aro basakoba basakoba ua balwa songregiparangko sikpakon uamang rongbrakni ka'machi tu'begipa a'kaweona ga'akon-anronga. Indake iano ritichani riticha songregiparang aro uamang'ni jillanirang sirongachim. Ianoni adita mile chel'ao Beas chibimani ong'katram biap ong'a. Ian Punjabni chibima dilbongaoni dilsa ong'a. Indake aganani gnanng je, saksu Hinduni rongtalgipa sainasi Vedarangko sena ia biapon adita bilsirangna bi'e aro chanchie dongachim.

Mayni 30 tariko chinga ia a'gitokko batsotna namen neng'nikaniko man'aha. Suuri onengpitchim aro namen sin'srangachim. Aro chingni batsotmitingoba suuri onengachim. Ka'singipa balwani baldapara namen sa'dikpilachim, maina chingni bigilrang gilskokpilachim. Indiba tange rakhiana chinga Isolko mitelaha. Iano suuri rurongana kenbena nanga. Changsao ianoni suuri rurongange song gimik gopako man'aha aro saksaba jokjajok. Ia a'gitokko batsote chinga Khaksarona re'angaha. Sissuo, Gandhalo, aro gipin gipin songrangoba chinga Nama Katakko aganprakaha. Unon chinga Kyelangona re'angaha. Ian Tibet sambao donggipa Moravian Mission ge'gitamoni ge'sa ong'achim. Uno Ladakhni aro Tibetni Kristianrang sak sotbrimang donga. Indiba Dalgipa Dakgrikani Skanggipa salrang intal Europeoni Missionary saksaba iano dongjaha. Sak kolatchimang Kristian ripengrang baksa chinga iano namgipa tom'aniko dakaha.

#### **Mandeko boli on'a :-**

Ia Kuelang songo skango bol pangsa gnanngachim. Ia bolni ja'pango manderang mandeko boli on'rongachim.

Iano mandeko boli on'aniko maikai bon'ataha iani gimin indake aganai gnang. Changsao me'chik segrini bilsi chet ong'aigipa saksa kam'kam depanteko boli on'na nangani ong'achim. Buddhistni Lama (Kamal) saksa re'pakange ua me'chik segrini grapengako knae uona re'bae "Grapnabe" ine aganaha. "Anga nang'ni depanteni pal boli on'ako man'na re'anggan" Somoi sokon Lama (kamal) re'ange ua bolni ja'pango asonge dongeaha aro manderangna aganaha. "Angko mamung daknabe. Miterang dongbebeode uamang re'bae angko den'kningchina." Manderang ua ong'aniko nina sengbeoba Lamana mamungba ong'jaha. Untal manderang miterango bebera'taijajok aro mandeko boli on'taijajok.

#### **Kan Ka'beani Salrang :-**

Anga, sakgni ripengrang baksa, (saksa Tibetni Kristian) rama gipin gita re'angengachim. Tibetni salaramo Nama Katako aganprakna chol ong'aha. Uamang'na ritichani riticha Sastroni bakrangko (tractrangko) sualatna man'aha. Chinga song kolatchisniko wenaha. Uarangoni songgitam Chuprang. Gnanama, aro Rukshak ong'achim. Mitam lamarang chingko champengahaoba songni manderang kusi ong'en knatimaha. Chinga toromko skiram biaprangko aro rongkolrangko niroroaha. Uarango donggipa Monkrang aro Sainasirang chingni sualgipa sastro aro tractrangko poraina ku'rachakachim. Indiba uamang chingko an'tangtang baksa minute chi'bongana agre dongatna namnikjachim.

#### **Pil'nipil Kenanirango :-**

Tibeto songrena nengraja aro kenani gri ong'ja. Sorokrang pongjasrang aro a'songo manderang bang'jasrang. Saoba mail sotdok ba sotdoksni re'angoba song songsakoba nikjawachim.

Ia a bimanduo donggiparang tamburango ba rong kol-rango dongjojoaigipa gypsirangsa ong batachim, jerangan mandeskarangoniko ra seke ra e janggi tangaiachim. Una agreba kengnigipa se elrang aro matchu burungrangba gngangchim. Bang'a ia jolko re giparangni janggirang gimaaha. Salsao anga angni ripengrangna skang re engmitingo mangsa matchu burungni anchipak chabaengako niksoaha. Ua biapo gakate katna bol, wa'a pangsaba dongjachim, indiba rongbrak dal gipa dotsa gngangchim. Anga ua rong brakona katange, uno gadoe kosako asonge nione dongengachim. Ua ka namgijagipa matchu burung ka onangbee rong brakko katduulaha indiba angna mamung kenani grichim. Anga ua chakramko man'ahani gimin Isolko mitelaha. Katnapram rong brakko chachiate angni ka tongo aiao inangipa tom-tomaniko man'aha. Ja manchi re baenggipa angni ripengrang ua matchu burungko nikate chel'aonin chrikataha. Uamang'ni chrikako knae sepango dongenggipa gypsirang uamang'ni tamburang aro rong kolrangoni chaongkatbae ua matchu burungko ro'ongchi gorurue rikgalataha. Unon chinga ua gypsirang baksa waltuna tik ka'aha indiba minggipin kenani gnganskachim; maina mikmalgijagipa matburungrangna bate mikmalgijagipa manderangnan kenbatani ong'achim. Ia ra seke ra giparang chingoniko pilakkon ra sektokaha indiba chingko so'otjahani gimin Isolko mitelaha. Unon anga uamang'na aganaha, Na simang chingoniko pilakkon ra sektokahaoba, na simangna chingni on'ani dongengpiti. Unikoa anga uamang'na aganprakna a bachengaha. Uamang gisik nange knatimaha aro uamang'ni ka tongo Gisik Rongtalgipa kam ka'na a bachengahaon uamang'ni gisikko moatbeaha. Uamang chingoniko ra sekahani gimin chingo kemako bi'aha aro uamang'ni ra sekgimin pilakkon on'piltokaha.

Da'o gipin neng'nikaniba dongengpitichim. Ia gypsirang chingna dut aro chaako tarion chinini pal kari aro makkonko

on'skaaha. Uamang'oni saksa angna chaako cupo runa a'bachengon anga ua cupko su'srangchengna bi'aha. Uana uamang aganchake inaha, Oh, indake dakna on'jawa maina na'simang chingni mandera'ako man'gipa sokgiparang on'ga aro chinga na'simangko indake dakna on'na man'ja. Anga an'tangan na'simang'na su'srange on'gen. Unon ua sserangko ote (haida uni sre inch dokmang ro'achim) cupni ki'tikona sokpile srakataha. Uko matchotoa ua chaako ruahaon anga an'tangan cupko su'srangna chaako pakgalataha. Iako nike ua aiao immanbeaha. Angni Tibetan ripengsa una Indiani manderangni bewalko, cha'na ringna skang uamang'ni jakrang aro cha'chak ringchakanirangko su'srangchengronga ine talataha. Gypsi unan aganchake inaha, Ian gokani kam ong'a, indaken ong'ode okningkoba salantian sulsrangna nangenchim.

Unon chinga rokomsa miko jo'gimin ginde baksa chaako ringaha. Isolo bi'ani ja'mano chinga tusiaha maina chinga namen neng'ahachim. Pring gipino an'chingni Jokatgipani gimin agantaimano, uamang baksa Isolo bi'rime chinga mail kolatchimang chel'gipa songona re'angaha.

#### Dukni Katarang :-

Ia somoirango, songrango kam ka'mitingo anga mitam badinggiparangkoba grongaha. Angni jaktangchi napbolatgipa T.Wangdi minggipa siaha aro uni siani ja'mano ua biapjolo donggipa Kristianrang bilding bildang ong'tokaha ine uamang angna aganaha. Ian dukni kata ong'achim indiba Isolni ska gita ong'aha. Anga ka'donga, badiaba salo Isol Tibet chipchangako man'enggipa a'songni manderangko Uona rimbagen. Isolni rasongna aro bang'ako jokatanina Tibeto kam ka'anirang bite gnagggipa ong'china anga Isolo bi'gen.....Amen.

—Sunder Singh.



## A'gimikon Aganpraka II

Tibetoni re'bapilani ja'mano Sadhu 1921 bilsini sin'kario Punjab aro United Province jolo skiprakna wenaha. Sali-ramchi wentaina mangsonga dongani gimin ua pil'nipil Sabathuona re'bana nangachim. Aroba ua sakgni pante Sadhurangko dakchakna aro skina nangachim maina uamang an'tangtango ia biapo sadhuni kamna tariengachim.

Sadhu Sundar Singh 1920 bilsio Europe, America, Eng-land aro Australia a'songrangona re'angaha. Ia a'songrango wenmitingo, bang'a biaprango manderangni toromni bidingo gisikni ka'sinangako nikbaaha. Unigimin 1922 bilsioaba ua ua a'songrangchi re'angtaina nangnikaha.

Sirdar Sher Singh jensalo uni depante Europechi re'taina miksonganiko uiaha, ua kusi ong'en tangkarangko nanga on'gitataha. 1922 bilsini a' bachengachibaraon Sadhu Sundar Singh Bombayona re'angaha, aro bon'kamgipa tarianirangko tariaha. Uni ianpako kusi ong'beani mingsa ian ong'acim, ua Europeona re'angmitingo Egypt aro Palestineko nappak-na gitaba passportko man'jolahachim. Indake Januaryni 29 tariko S.S. Caledonia minggipa jahaso gakate, Port Saido ong'one bakan Palestinechi re'angaha.

## Rongtalgipa A'songo (Palestineo)

Kristian ong'chengantal bilsio chi'dokna kingking ua Palestineni gimin chanchikamaiengachim. Da'o ua uchi re'angna cholko man'ahani gimin kusi ong'beenggenchim ine an'ching chanchina man'a. Biapsaoni biapsaona Jisuni agangimin kata aro daggimin kamrang uni gisikona nabatokaha. A'song gipinni ning'o donge biaprang aro

obostarang dingtangaoba, Jisu Kristoni iano janggi tang-aniko, kam ka'aniko, uko so'otaniko aro uni tangchapilani gimikkon uni gisiko nimgiminko ua dingtang atna man'jahachim.

Joitun a.brio aro Gethsemne bario bi'e ua bang'a kon-tarangko re'ataha aro unomitingo ua an'tangko Isolna on-kanganiko mangrakbatataha. Kristo sninggiparangna aganaha gitan da'o unaba, Kristo uno chadenge, Nang'na tom'tom ong'china, angni pagipa angko watataha gita, angaba nangko watata, ine aganenga gita ua chanchimanpilachim.

Ua salrango Jerusalem, Bethany, Jeriko, Sagal Gisi, Nazareth, Tiberias, Magdala, Kapernaum, Galili Sagal, aroba gipin gipin rongtalgipa biaprangko nimitingo Kristoni dongpaaniko ua uiachim.

Ua Jerusalemni Cathedralo aro Caironi American gilja noko aro giticham Cairo Coptic Kristianrangna skiprakaha. Ua pyramidrangkoba niaha aroba Jisuni Egyptchi katange dongmitingo je biapo uamang dongbaahachim ua biapo gilja nok rikgipaonaba rimangako man'e ukoba nikbaaha.

Gipin Robibaro ua Marcelleso skiprakani ja'mano joljolo-gipin biaprangoba skiprakangaha.

#### Switzerland :-

Februaryni 27 tariko Sadhu Lausanneona sokeaha aro uni salsagipao Bienne minggipa songjinmao dal'gipa tom'aniko dakataha. Salgipino Tavannes songjinmao tom'aniona bang-bata manderang re'baaha. Sepangjolo donggipa, haida hajal gitamna baten re'baahachim. Nambata biapko man'na mitamrang bolrango gakatpilna nangaha. Tom'ani matchoton

uamang'oni mitamrang indake aganaha, Ua an'chingni uigimin apsan jokatgipani gimin aganoba ian torom gital ong'a.

Salgipino suuri onna a'bachengaha indiba ia suuri onanichi manderangni re'baaniko champengani ong'jachim. Suuri-arigipa a'brirangni gisepo donggipa bang'a songrangoni manderang biap damsao tom'aha jedakode uamang apsan Gitcam Golpokon gipin gital dake aganako knana man'gen.

Genevao Sadhu Sundar Singh Reformation Hallo changgni skiprakaha. Ia nok dal'gipa ong'oba hajalni hajal manderang re'baani gimin biap chakjae bang'an pil'angpilna nanga-hachim. Ua iano dingtangmancha sak 200 pamongrangna skiprakaha. Genevaoni ua Neuchatelona re'angaha. Uano hajalchikung mang manderang tom'aha, aro bang'en gisik pil'giparangba dongachim. Gipin songjimarangona re'angani ja'mano ua German-Switzerlando napeaha aro Basle, Barne, Thun, Zurich, St. Gale aro gipinrangoba skiprakaha. Ua Switzerland a'songo Marchni 29 tariko bon'chote skiprakaha.

#### Germanyo :-

Germanyona sokangahaon Sadhu indake seaha, Mějalo anga Reformationni a'bachenggipa biap Wittenburghona re'angaha. Uano anga Marthin Lutherni donggipa biapko aro uni skironggipa gilja nokko nikaha. Gilja nokni do'gacholo Reformationni gimin sotskubonga niamrangko sea dongachim. Ia apsan gilja nokon uko gopahachim. Ua atamo anga ua gilja noko aganprakengachim. Ia gitcamgipa songjinmao Theological Collegen chatrorang aro skigiparangnaba anga angaparakaha.

Halleo ua Germanyni mongsonggipa Missionary dolni dilgiparangko melao gronge uamang'naba ua agarprakaha.

Leipzig songjinmao Universityni professorrangna aro chatorrangnaba ua skiprakaha. Indake ua an'tangni sena nangbatgipa chitirangko mangmangba sena somoi dongpiljachim. Pilak tom'anirngo Isolni dakchakaniko aro patianiko man'aha ine ua aganrongachim.

### Sweden A'songo :-

Aprilni 13 tariko ua Tyringeona sokeaha aro ua a'songni gittimrango aro songjinmarango jasana king king wenjojoe kamko ka'aha. Uanona re'amgmitingo ua Copenhagen songjinmao dikdiksana seng'take Bishop baksa mepringko cha'paaha. Helsingborg, Lund aro gipin biaprango dal'dalgipa toma'nirangko dakmano Sadhu Upsalaona re'angaha. Uano ua Archbishopni sokgipa ong'achim. Cathedral Universityto aro gipinrangoba Archbishop uni skiprakaniko pe'skaaha.

Stockolm songjinmao Sadhu, Swedenni rajani jonggipa, Prince Oscar Bernadotteni sokgipa ong'achim.

Nitogipa Stockoklm songjinmaoni re'ange Sadhu choncho nkalgipa bang'a biaprangko nieaha. Ua indake aganaha, Ia a'songni bang'a nitogipa gittimrango anga aganprakengachim aro mail sotsni chel'gipa biaprangmangoniba man'derang tom'aniona re'baaha.

### Norway, Denmark aro Hollando :-

Sadhu Swedenoni Norwayona re'angaha indiba somoi kan'dikangangani gimin ua ia a'songo salchikungsan dongna man'aiaha. Ua Hurdaona re'angaha. Ua biap skotong songoni mail sotdokmang chel'achim. Uano dal'gipa tom-

aniko dakaha. Christiania minggipa songo bang'a tom'anirangko dakaha, ua tom'anirangoni ge'sagipa mongsong Universityni chatrorangna ong'batachim. Ia songjinmao sak hajal gitamna batpilen, uni skiprakanirangko gisiko nangbee knatimaha. Gipin biaprangkoba nappake, Mayni 25 tariko ua Denmarkona re'angaha.

### SERMON BA SKIRPAKANI

Keswick tom'ao 1922 bilsio skiani :-

Text: Maina anga Nama katana kratcha'ja; maina beber'igipa sakantina Jihudirangna skang aro Greekrangnaba, ua jokatanina Isolni bil ong'a.

Rom 1; 16.

Paul Kristoni Nama Katako aganprakna kratcha'jaha; maina ua tanggipa Kristoni bilko uni janggi tangao ma'siaha. A'gilsakni manderang pap ka'na kratcha'jaode, maina uamang jokatanina kratcha'na nanga? A'gilsak bikpile re'a. Manderang Isolni skā gita dakna kratcha'a indiba uni namnik-gijako dakna'e kratcha'skaja. Manderang Nama Katako jegalna kratcha'ja indiba uko agang'prknade kratcha'skaa. Uamang Kristoni gimin uia indiba uni jokatna amani bilkode uiskaja. Bon'kamgipa Gitelni Dal'begipa salo, Ua indagipia manderangko indine agangen, Anga na'simangko uija, maina na'simang angna aro angni Nama katana kratcha'aha. Jihudina ong'chong, Greekna ong'chong, ba indakeba anga agangenchim, Hindu ba Mussolman ba Buddhistba ong'chong Uko uigiparangna ua bil ong'a.

Bang'a manderangni uiani iako saki on'aha. Bilsio gitamang re'angaha, Hardwarni sepango anga Hindu sainasi

saksako grongaha. Ua gojal ku'chotrangni palango tuengachim. Anga unbaksa agangrikon ua gisik nange bebeko am'gipa saksa ine anga nikaha. Anga una aganaha, Ia gojal ku'chotrangni bu'achi na'a maina an'tangko duk on'enga ? Ua aganchakaha, "Angni paprang angni ka'tongo gojal ku'chotrangni bu'a gitan bu'enga aro anga indake dakachi ning'o bu'enggiparangko galna man'na ka'donga, indiba angni ka'tong ning'o bu'enggiparanga angni be'eno bu'enggiparangna bateba saknabata. Unon An'tangni ja'a jakrango gojalni bu'arangko man'gipa saksani gimin anga una aganaha. Unikoa anga an'chingni ka'tongni ning'o saknaatenggipako ra'galna, anga an'tangna maikai Kristoni bilko uiaha uko una tale agane on'tokmano, una Niam Gital kingsako on'aha. Adita somoini ja'mano anga uko grongtaiahaon, ua jinmani mikkango Kristoni bilni gimin, aro uni ka'tongni saknaaniko ra'galaha aro maikai jokatani aro toin'tomaniko onman'aha uarangni gimin saki on'engako nikpilaha.

Changsao Nepal a'songni Iloilo skiprakmitingo saksa chugipa gadangni Hindu angko ka'onangbeaha aro angni skiprakako golmal ka'na a'bachengaha. Anga una Markni i sea Nama Kata kingsako on'aha indiba ua ki'tapko chite gale police na report ka'na re'angaha. Police officer re'bae angko rim'aha aro jadokna patok donataha. Patokko rakigipa angko gipin koedirang baksa donaton, anga Kristoni gimin uamang'na aganprakna a'bachengala. Koedirang angni skiako name gisik nange knatimako patok nitimgipa nika angko skjachina rake beng'aha indiba je dukko chakchikna nangoba anga nokgipako manina nanga aro Nama Katako aganprakna nanga ine una aganchakaha.

Unon ua koedirangchi an'pile angko knatimjachina uamang'ko beng'aha. Unon uamang unbaksa jegrikna a'bachenge

aganchakaha. Gisik pil'china aro nambate janggi tangchinan government uamang'ko patoko donataha, aro ia mande uni skiprakachi batesa Govenmentko dakchakengachim.

Unon patok nitimgipa chanchisokjae Governorona re'ange agane ua Sadhuko gipin kuturio donskaaha. Ia patok noko gimikna chakgipa dal'gipa kuturi gesasan dongaiani gimin patokko nitimgipani matchu nolo moila dakgimin biaposa angko donatskaaha. Uano kelki dongja aro cholguga gesasan dongaiani gimin matchu ki'i aro su'buni sengara chak-topiljachim. Uano angni jak ja'arangko katate donaha aro angni ganding chindingkoba oke galtokaha.

Angni dukko bariatna gita burungchi re'ange, ru'atrangko bang'e chimonge ra'bae angni be'eno galdapeaha. Unon ru'atrang angni be'eno malpriprae angni an'chiko opna a'bachengaha. Indiba anga angni gisik ka'tong gimikchi Isolo bi'engachim, aro anga gisikni tom'tomaniko man'aha. Indake anga gitko name ring'na changpajaoba mitelani gitko ring'na a'bachengaha. Angko report ka'gipaba gipinrang baksa cholgugao niengachim, ua ia ong'a obostako nike namen aiao inmanbeaha aro patok nitimgipana aganaha; "Ia mandeni gimin na'a maiko chanchia ? Ua dukko chakengoba kusi ong'beenga." Patok nitimgipa aganchake una inaha, ia mande pagla ong'akon. Unon sakgipin aganchake inaha, Pagla ong'e ia mande indakgipa tom'tomani gisikko man'ode angaba pagla ong'pana sikgenchim, angasan ong'ja indiba a'gilsak gimikan. Indakgipa pagla ong'ania a'gilsak gimikkon An'senggipa Biap pil'atskagenchim.

Patok nitimgipa ia ong'aniko re'ange Governorna agan-eaha, An'chingni miksonga namgni ong'jaenga. Ia sasti on'ani uko duk ong'ate uni skiprakaniko dontongatna man'gen ine ka'dongachim indiba una kusi ong'anikosa baristska-

enga. Unon Governor aganaha, Ua paglasa uko re'angchina watatbo. Indake uamang angko watataha aro anga an'chi komibeahani gimin bilgribeengoba, songjinma gimiko anga aganprakna man'kuaha. Ua chugipa gadangni mande jean angko riport ka'achim uaba angni aganprakako knagiparangoni saksa ong'e, uni chite galgipa Sastroni pal king gipinko on'taipachina bi'aha. Indita dukrangko chake aganprakna nangoba kratcha'jama ine ua angko sing'aba sing'aha. Anga una aganchake inaha : Anga Hindu ongmitingo Nama Kataka chite galna kratcha'jaha, indide angni janggi tangao uni bilko nikahaoa anga maina aganprakna kratcha'gen ?

Indiba anga an'tangni janggi tangao pangnande Kristoni bilko uikamaijachim indiba bang'a salon an'tangna ong'a obostarangchisa Uni bilko uina man'aha. Anga ka'tongtango Kristona on'chengon angni paprangko kema ka'aha ine uiaha aro kusi ong'beaha aro gisikni tom'tomanikoba man'aha. Unon anga napbolachi ku'rachakna nanga ine gisik ra'aha. Iani gimin anga chanchion indake dakachi anga a'rikani-rangko chakchikna nanggen aro noktangoni, ripengrangoni a'rikatako man'gen ineba uiachim. Angni pilak gam aro kusi ong'e janggi tanganikoba gimaatgen ineba uiachim. Ning'tue bang'bea chanchiani ja'mano anga chel'a biapchi re ange napbolenba nokona re'bapile noktango tom'tom Kristianni janggi tanganiko bi'ao aro Bibleko poraiao janggi tangna nanggen ine gisiktango tik ka'aha. Indake anga noko kusi ong'aniko, ripengrangko aro gamko kusi ong'en man'angkugen ine chanchiachim.

Indiba ia pilakko chanchimitingo angni gisiko tom'tomani gimasangaha aro Kristoko chanchianioba angni mamung kusi ong'ani dongjaha. Unon anga je obosta ong'oba chisoltangko ripena nanggen ine rongtalen uiaha. Indake anga



jinmani nikao napbolatako man'aha aro Kristoko ra'chakaha. Nokdang, gamseng, ma'a-paa aro ripengrang pilakan angoni re'angaha, indiba angni gisiko tom'tomani aro kusi ong'aniko man'skaaha. Indake anga a'gilsaknirangko mamung gitaba chanjaha. Kristoni ku'rachakgipa tom'tomania angni chisoltangko ripeao angko watgaljaha. Angni bilgriao anga Kristoni gimin kratcha'achim. Indiba anga chisoltangko ripeoa ua angna bil aro ka'donganiko on'aha. Untal kratcha'ani pal da'o Kristoko aganprakna angna rasong chabeani ong'baskaaha.

Changsao anga biap damsao aganprakengachim, unon, "Nang'ni uiani bil aro gisikni tom'tomania an'tangni gisikni chanchichipanisan ong'aigija Isolni on'gimin boksisi ong'a ine na'a maikai uia ? ine professor saksa angong'aha. Anga una aganchake inaha, Ua angni chanchianisan ong'aiode indide manderang jerangan ppsychology aro uni niamrangko skie uitokaha uarangde ia tom'tomaniko uimanenggnokchim. Indiba ia uiani mamung saloba indake ong'ja.

Ian saksa kanani gimin angko gisik ra'ataha. Ua sal rakao asonge salni ding'ako man'e suk ong'engachim. Salni gimin na'a maiko chanchia ine uo sing'on, indakgipa bostuan dongja inesa ua aganchaksaaha. Ia dal'begipa bostu bangbango robol gita rake dongenga ine agangiparang gokarangsang on'g'ia. Je ding'aniko man'a uan be'entangoni ding'gipa an'chionisa gipin a'paloni ong'kata. Unon anga ua professorko ia mande kanani gimin maiko chanchia ine sing'aha. Professor indake aganchakaha, Uara kana aro jarasa. Anga una indake aganchaksaaha, Na'aba gisiko kana ong'a aro ua Isoloni ong'gipa ua tom'tomaniko uigijaniara na'aba apsan ua kana gitan jara ong'aniko skiaha. Ia tom'tomani ljekon anga aganenga, uan jokatako man'ani chin ong'a, aro uan kenako gimaate, gisikna tom'tomaniko on'a.

Aro gipin skigiparangba gngang jerangan janggi jokanina Kristoni bilko nangja ine skia. Janggi jokaniko an'tangtangni joton ka'achin man'a ine uamang skia. Iarang bebe ong'a gita nikoba, ua skiani gita dake nigiparang uan ong'na amja ine saki on'a.

Mandeni janggi tangani koksepni ning'o donggipa do'o gita ong'a. Ua do'oni mikron aro grang gngang, jerangchi ua nikna aro bilna man'a indiba ua koksepni ningo' dongani gimin uarangko skatang jakkalna man'ja. Uandake mandeo chanchina changani gisik aro janggi jokani cholko uiani donga indiba papni aro gisikni bilgriani a'sel mande an'tangari jokna man'ja. Chekni ning'o dongmitingo na'tokrang bangbang gita chi gimikkon nikna man'a aro skatang jroe rona man'kugen ine chanchina man'genchim indiba uarang cheko nangako man'aha. Ia chek na'tokrangko so'otja indiba uarangko so'otna a'gaona saldoani cholsan ong'aia. Mandena ong'a obostani gimin apsan dake chanchina man'a ; maina mandeni janggi papni cheko nangaha. Ia papni chek mandeni Isol baksa nangrimaoniko saleke jringjrotni sastiona ga'akata.

Bebera giparang ia angni agangimin skisretanirangchi an'tangtangni gisikko brangatjachina. Indagpita skisretanirang skang intalan dongachim Indiba uarang pailakan chasongrang baksan gimaangtokaha.

Indiba ian, Kristoo bebera'e janggi jokatako man'giparang Kristoko jegiparangko bobil dakna nangja batesa uamang'ko Kristoona rimbana bi'achi aro ka'seani kamrangko dakachi joton ka'na nanga. Uamang'ko bobil dakode uamang'ni ning'o donggipa nama miksonganiko gimaatsrangnaba donga aro uamang'ko Kristoona rimbana man'ani mamung cholandongjawachim.

An'ching Nama Katana kratcha'na nangja. Nama Kata Isolni bil ong'a ine an'ching uia. Ia uianiko an'ching ku'sikchisan aganaigija kamrangchiba mesokna nanga.

**Songrekuanirang :—**

Ua Indiaona re'bapile, 1922 ni bon'kamgipa jarango, dingtang dingtang concentrangona aro melarangona re'angaha. Unikoa ua Indiani dal'gipa songjinmarango, chong'motan, Ambala, Delhi, Ludhiana, Allahabad, Benares Montgomery, Lahore aro gipin gipin biaprangchi re'angkue skiprakaha. Unikoa ua Christmasko manina aro neng'takna Sabathuona re'bapilaha. Növementber jao New Zealand aro Italyoni cable-rangko man'soaha. Ua uiataniranga ua a'songona re'angchina okamatanirang ong'achim. Indiba ua re'angna jechake seataha

1923 January jao Sadhu Karachichi re'angaha aro bang'a tom'anirangko dakataha. Tom'a damsagipao judicial commissioner antangan tomdilaha. Uanoni ua Minpuraro Saharanpur aro gipin songjinmarangchiba re'angaha. April jao ua pagipa siaha ine koborko man'soaha. Rasong gnange ua ia salna skang Rampurona re'ange uni nok gitichamo pagipani aro bakdrangni kusi ong'bee rimchaksoako man'e, bang'a salrangna uamang baksa dongrimbaahachim. Aprilni 10 tariko pagipani siani koborko man'on ua indake seaha. Angni pagipa Rampuro siaha. Anga duk ong'ja maina anga uko Rasongo niktaijen. Ua Kristian ong'e re'angaha. Ia dingtangatania dikdiksanasan be'eno dingtangatani ong'aia.

Ia a'sel ong'ani bak ja'mano, Simlani Alliance Bank be'aha aro Tibeto kam ka'na uni ripengrangni boksisi on'atgiparang bang'an ua Bank be'anion gimachapaha. Ua rasong gri-nina ua indake seaha, Anga ka'dong aniko tangkao rikjaenga.

Uko on'anina anga Isolko mitela aro uko ra'angpilaninaba mitela. **Angni Ka'dongani Salgini Bankosa Jean pangnaba be'na amja.**

Mayni gnigipa antio Tibetchina re'angna skang ua ripengrangna bon'kamgipa salaamni chitirangko seataha. Uni ja'mano Sadhuni gimin ruuten jrip jrip mamung kobor gri ong'achim. Unon rang'gitik ua siaha ine Bombayni Songbado seaha. Ua koborko bang'a ku'sikrangona pe'skae Songbadrango gatataha. Daily News minggipa Londonni songbado, la Sadhu Sunder Singh Indiani rongtalgipa Kristianko Tibeto Buddhistni Toromko ra'gipa ka'tong rakgipang so'otaha ine seaha. Cablerang aro telegramrangchi sing'grikaniko dakoba mamung nama bebera'na kragipa aganchakaniko adita salrangna kingking man'jahachim. Assamni bang'a schoolrangko kalimani chin ine chuti wataha.

Unon Kotgarho Sadhu dongenga ine telegramchi uiataniko man'soaha. Iani ja'mano uni ripengrangna indake ong'gija jangatanirangko dakanina duk ong'e, ua ro'gipa chitirangko seataha. Toromni aro Politicsni golmal dongani giminsa je koborko watatnaba man'ningjaha ine ua uiataha. Uni Tibetna Nama Katako on'na man'jahani gimin duk ong'achim aro ua indake aganaha, Salgini sa'gre angko Tibetona re'angna nangja ine beng'oba anga re'angaikugen.

Iani ja'mano Sadhu skiprake wenangkuala. Ua gipin a'songrangoni okamatako man'ahachim indiba Assamona re'na tik ka'manahani gimin uarangchi re'angna jeehakaha.

### **Sadhu Sea Jotanio**

Adita bilsirangni gisepon Sadhu an'tangni gimin bang'a ki'taprangko seaha. Gipin a'songni manderang Sadhuni

gimin uina skangan, Indian manderangoni Sadhuni gimin bang'a ki'taprangko sena a'bachengaha. Uni ja manõ gipin a'songni manderangba, uni gimin bang'a ki'taprangko seaha.

Indiao uko talbate uibaahaon mandeangni gisepo uni gimin bang'a agananirang ong'kataha. Indiba "Manderang angni kosako maikoba aganjaode, uamang angni gimin tale uikuja "ine agane, Sadhu chakchike dongaha.


Indiba mitam manderang uni kamrang aro bewalrangko nike, uan Isolni okamako man'gipa mande chong'mot ong'a ine bebera'e uni skianirangko jarikaha.

"Kristoo bimang gital ong'ana agre ua mamung gipinni gimin chanchia dongjachim. Ua Kristianrangni ma'mal ong'ani gimin gisik nangjachim.

Pil'nipil ua kenanirango ga'akahaoba, sin'a aro okkriako chakna nangahaoba, Kristoni Katako aganprakako dondikjaha. Uni pilak kamrang aro ong'a obostarango, uko saksan gita nikoba, Kristo unbaksa pangnan re'pae neng'arango aro dukrango uko dakchakaha. Sundar Singh da'o an'ching baksa dongjahaoba, uni agangimin katarang aro kamrang an'ching an'tangtangko nipilate mikkangchina, mikrakatani, didiatani aro bilakatani ong'a.







**Printed by :— Jay Kay Enterprises**  
**Guwahati-781001**